

JNIÑU JEHNU JEE NI CASAHA TEE APOSTOL

Jeē ni jéjnūhun ya quiji Espíritu Santo

1 Amigo Teófilo, nuū tútu jeē ní tee ná xíhna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quivī ní quejéé yá ni sáha ya ²te nde quivī ní ndaa ya cuanuhun yā andiví. Te nde ná tu ndaa ya quihīn yā, te ni sáha Espíritu Santo jeē ní ndacu ya jniñu nuū táca apóstol, tēe ni nacāji ya. ³Te nuū ni jínu ni ndoho ya jeē ni jíhī yā, te uū xico quivī te tijni jínu ni steén ndijin yā maá yá nuū tēe un jíjnáhan de, te súcuan ni cajini de jeē iyó ndáā jeē ní natecu yā. Te ni cahān yā jíin de siquī ndese ndácu Yaā Dios jniñu.

⁴Te ná cáhiin tútu de jíin yá, te ni cahān yā jíin ndihī de jeē ma quéndacoo de ini ñuu Jerusalén, chí áchí yá:

Condetu ró ndé quee Espíritu Santo jeē ni jéjnūhun maá Tátá rī Yaā Dios. Chí je ni cachi rī nuū rō jeē ni jéjnūhun ya quiji Espíritu Santo. ⁵Chí Juan, jendaá jeē maá ndute-ni ni scuándute de ñayuu. Te rōhó jíjnáhan ró, jecu na quivī te nájnūhun cuandute ró jíin Espíritu

Santo, cúu jeē condee yā ini anuá rō, achí yá.

Jeē ní ndaa Jesús cuanuhun yā andiví

⁶Yūcuán na te tēe cáhiin tútu jíin yá, ni cacajnūhún de ya:

¿A vijna te nasáha ní jēē ñáyuu ñuu yō Israel ndujéhu i ndacu i jniñu nuū nación yō chí naún? áchí de.

⁷Te ni cahān yā:

Ma cúu cuni rō quivī chí cuíyā jeē cóo jeē ni sándaā maá Tátá rī, chí maá iin-ni maá yá jíin yā na quivī sáha ya. ⁸Te jeē cúni rō cúu jeē quée Espíritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun rī ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

⁹Te ni ndihī ni cahān yā táca jnúhun yáha. Te níiní cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahán yā, te tuá ni cájito de ya. ¹⁰Te níiní cáhiin de cájito ndaa de ichi ándiví núu ní ndaa ya cuahán yā, te uū jnáhan ndajéhé yā cáñūhun ya sahma cuijín ní cajecuiñī yā xiin de jíjnáhan de,

te cájito ya nájnūhun tēe. ¹¹Te ni cacahān yā jíin de:

Róhó tēe Galilea, ¿najehe cájito ndaa ró ichi ándiví? Chi máá Yáa Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuáhān yā andiví, áchí yá.

**Jeē ní canacāji de Matías jeē
nucuiñi de nuū Judas**

¹²Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájnūhun iin kilómetro-ni, cūhva jeē ni jéhe ley permiso caca ñayuu quiví ndétátú. ¹³Te ni ndāvicoo de ini ñuu. Te ni ndacoo de cuarto xini véhe nuū cáyūcu núu de. Te tācá de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnāhan grupo cananista, jíin Judas ñani Jacobo. ¹⁴Tāca tēe yáha, níni cándutútú inuú de cājicān tahu de jíin tāca ñani Jesús jíin náná yā María jíin sava ga ñahan.

¹⁵Te iin quiví te ni jecondichi Pedro nuū tācá hermano cācandíje. Te cáhiin nájnūhun ciento ocō ñayuu. Te ni cahān de:

¹⁶Hermano jijnāhan ní, ni squícu nahín jnūhun cāhán tutu ii jeē ni cāhān David nde jenahán ní sáha Espíritu Santo. Te jnūhun un ní cuu siquī Judas jeē ní yosnūu núu tēe ni cajni Jitoho yō Jesús. ¹⁷Te suu tēe un ní jica de jíin yó, te ni chindéé ñáhán jnāhan de jíin yó siquī jniñu ní jeni ya yohó. ¹⁸Te ni cajeen iin ñuhun jíin xūhun ní nihin tēe un síquī jniñu neé ní sáha

de. Te ni ñinga ndeyi de, te ni ndatā sáva chíji de, te ndíhi yiti de ni jītē.

¹⁹Te ni jītē jnūhun yáha núu tāca ñayuu cáyūcu ñuu Jerusalén, te jeē yúcuan cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta niñi. ²⁰Chi súcuan je yósó núu tútu Salmo siquī Judas:

Vehe de na quéndōo iyú,
te ma cóndee ni iin ga ñayuu ini
vehe ún.

Te suni cāhán:

Jniñu ní condiso de na cóndiso
inga tēe.

Achí.

²¹Núu súcuan te jíni ñúhún jēe núcuiñi iin tēe lugar maá de jíin yó. Te tēe nucuiñi jíin yó un, nacāji yó de mēhñu tāca tēe ni cajica jíin yó tāca quiví jeē ní jica máá Jitoho yō Jesús jíin yó. ²²Te tēe nacāji yó un cúu tēe jeē ni íyo de jíin yó nde quiví ní jendute ya ni sáha Juan, te nde quiví ní ndaa ya cuanuhun yā andiví. Te tēe nucuiñi jíin yó na cúu de testigo jíin yó jeē jé ni natecu yā, achí de.

²³Te ni catee nuū de uū jnāhan tēe: Matías jíin José jeē naní de Barsabás te suni nání de Justo. ²⁴Te ni cājicān tahu de:

Tātā Yáa Dios, máá ní chi jíiní ni ndese cáa ánuá tāca ñayuu. Núu súcuan te jeē ndindúú tēe yáha, stēen ni ndé iin de cúu jeē ní nacāji ní. ²⁵Te condiso jniñu de cuu de apóstol. Te naquihin de jniñu ní stóo Judas, chí ni sáha de cuēchi te cuahān de lugar xeēn nuū cánuú quíhín de, áchí de.

²⁶Yūcuán na te ni casáha de iin sorteo te ni jinū Matías, te

ni nucuĩñ de ni nduu de jnáhan ndihúxí iin apóstol.

Jeē ní quee Espíritu Santo

2 Te máá quiví víco Pentecostés ni cahiin tútú ñáyuu cácanďije ñuu Jerusalén. ²Te sanaa-ni te ni quejéé nńhın vĕji nde andiví nájnuhun tachı nńhın queé, te taca ñáyuu jeē cáyucú ini vehe un ní cajini sōho i jeē nńhın ún. ³Te ni cajito i nájnuhun yáñuhun jeē ní cajitē núu te ni cacucōo xinı ná iin ná iin i. ⁴Te ndihi i, ni cunuú Espíritu Santo jíin i, te ni quejéé i cácahān i sńin sńin yuhu, ndese ni steén máá Espíritu nuū ná iin ná iin i cahān i.

⁵Te ñuu Jerusalén, suni cáhiin ñayuu hebreo, yñúhún núu Yaā Dios, jeē ní quijicoo i nde taca nación ní cáhnu ñayivı. ⁶Te jeē ni nńhın súcuan te ni cacutútú cuéhē ñayuu ún. Te ni cunéé fı ni i jíjnáhan i, chi ná iin ná iin i ni cajini sōho i jeē tēe ni canihın Espíritu Santo cácahān de jnūhun yuhu ñúu jicá nuū véji i. ⁷Te ni canaa ni i cájito i te ni cacahān i:

¿A násūu tēe Galilea cácuu taca tēe yáha jeē cácahān de taca yuhu ñúu nuū véjicoo yó? ⁸¿Na vé ni cuu yáha núu súcuan? Chi ná iin ná iin yó cájini sōho yó cácahān de jnūhun yuhu ñúu nuū ní cacacu yó. ⁹Chi véjicoo yó ndé taca ñuu jicá. Sava yó véji nde Partia jíin Media jíin Elam. Te sava ga yō véji yó ndé Mesopotamia jíin Judea jíin Capadocia jíin Ponto jíin Asia. ¹⁰Suni nde Frigia jíin Panfilia jíin Egipto jíin tıjñı ñuu jeē íne nde yatā gā ñuu Cirene ñuhun Africa

vĕjicoo yó. Te sava ga yō nde ñuu Roma véjicoo yó, te cáyucu jínu-ni yó yáha. Te máá yó jeē véjicoo ñuu Roma, sava yó cácuu máá ñáyuu hebreo te sava ga yō cácuu ñayuu sńin ñuu, ni cacandĕje yó ndıquín yō ley ñayuu hebreo. ¹¹Suni nde Creta jíin Arabia véjicoo sava yó. Te cájini sōho yó jēe jíin jnúhun yuhu ñúu ná iin ná iin máá yó cácahān de taca jniñu jéñnu ní sáha Yaā Dios, achı i.

¹²Te ndihi i chi ni canaa iı ni i cájini nahın i. Te ni candajnuhún i jíin jnáhan i:

¿Na vé cúu jeē ní cuu núu súcuan jeē cácahān de yuhu ñúu yō? achı i.

¹³Te sava i ni cacahān catá i:

Tuú chi jeē cánajini de, achı i.

Jeē ní nacani Pedro jnūhun nuū ñáyuu

¹⁴Yūcuán na te ni candocuiñı Pedro jíin ndihúxı iin ga apóstol, te ni cahān jee Pedro jíin ñáyuu ún:

Nńhın jnáhan ñuu yō hebreo, jíin ndihi nńhın jēe cáyucu ní Jerusalén, jnūhun yáha na chúhun ni ni jíjnáhan ní, chi cuni nahın ní cahān na jíin ní. ¹⁵Chi máá ná jíjnáhan ná, nasūu jēe cájini ná nájnuhun cájeni ni ní, chi sáa cahıñ jenéhen cúu, te nasūu hora cánajini ñayuu cúu. ¹⁶Chi sa suhva squıcu jniñu yáha nájnuhun ni cahān Joel, tēe ni nacani jnūhun Yaā Dios nde jenahán, chi súcuan ni cahān de:

¹⁷Achı Yáa Dios: Quivı sándihı na te tajı rı Espíritu rı cunuú yá jíin taca ñáyuu, te sēhe yıı ró jíin sēhe sńhı ró, nacani i jnūhun rı, te taca tēe lulı chi coto ndijin de jeē steén rı nuū de,

te tāca tée jéhnú chi sáha ri jeē scóto jēni de.

¹⁸ Te quivī ún chi tají rí Espíritu rí cunuú yá jíin táca mozo rí, cúu tēe cúu ñahan,

te nacani i jnúhun ri.

¹⁹ Te ichi ándiví sáha ri jniñu jéhnú jeē náā ni ñayuu coto i, te sáha ri jniñu jéhnú ini ñayīvi jēe steén jeē cujéhnú ri, chi coo niñī jíin nūhūn jíin nūhmā nájñūhun vicō.

Yūcuan cúu jeē sáha ri jeē cóo jñūdóho xeēn.

²⁰ Te nduu jnúú níandii te ma cúndijin gā,

te yoō coto cuéhé nájñūhun niñī. Yūcuán na te quee quivī jeē ndíji máá Jítóho rō Jesús.

Quivī ún coo cuehē jniñu jéhnú, te cuni ndihī ñayuu jeē quiví maá Jítóho rō cúu.

²¹ Te tāca ñáyuu jeē cahān ndahú i jíin yá te jnama ya i, áchí Yáā Dios.

Achí Joel ni nacani de jnúhun ya.

²² Jeē yūcuan níhín tēe ñuu yō Israel, cuni nahín gā ni jnúhun yáha jíjnáhan ní. Ni steén Yaā Dios jeē ní tají yá maá Jesús, Yaā ní jehnu ñuu Nazaret, chi máá Yáā Dios ni jēhe ya jeē ni sáha Jesús jniñu jéhnú mēhñu máá ní, jíin jniñu jeē steén jeē cujéhnú ya, te jniñu un ní canaa ni ni ní cajito ní. Te je cájini vāha ní jēe súcuan ni cuu. ²³ Te máá ní ni cajnií ní yá, te ni cajendēca ní yá nuū tēe xeēn ni cajehni de ya jicā cruz ni casáha ní. Te nde jíin tiempo je ni jini Yaā Dios jeē súcuan sáha ní jíjnáhan ní, chi súcuan je ni sándaā yā. ²⁴ Te ni nastécu Yaā Dios Jesús te tuá ní cúu

ya ndīyi, chi jnúhun xeēn jeē jihí ñayuu, tuá na vé cúu ga sáha jíin yá. ²⁵ Chi nde jenahán suhva ni tee David jnúhun ndese ni cahān Jesús jíin Yáā Dios:

Jíní na núū maá ní jeē cúu ní Jítóho ná, chi níí cáni ndéé ní jíin ná,

chi ndéé ní ichi ndáváha ná, cúu jeē chindéé ñáhán ní sāña náváha coo ndeyí ni ná.

²⁶ Jeē yūcuan cúsií ni ná te cáhán na jnúhun sií ni.

Jeē yūcuan ma nácani uhū ni na síquī jnúhun cuu ná.

²⁷ Chi ma cuáha ni jnúhun

quendō ánuá na lugar nuū cáyūcu ánuá ndīyi,

ni ma cuáha ni jnúhun tehyū ná, chi jéjníñu ná núū ní te maní ni jíin ná.

²⁸ Te ni steén ni núū na jēe nátecu ná,

te sáha ní jēe cusíí teyí ni ná condee na jíin ní níí cáni.

Achí Jesús, ni achí David.

²⁹ Tāca níhín jíjnáhan ní, na cástūhun cájí ná nuū ni jnúhun jíi yō David, chi tu ní cáhán de jnúhun yáha síquī maá de. Chi ni jihí de te ni quindūji de, te jíní yō nuū yíndūji de nde vijna. ³⁰ Chi ni cuu de tēe ni nacani jnúhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn maá de quiji Cristo, te condee yā mesa de ndacu ya jniñu nájñūhun ni ndacu de jniñu jeē ní cuu de rey.

³¹ Te nde jíin tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndīyi, ni yiquí cúñu yā ma tehyú. ³² Chi Yaā Dios ni nastécu yā

Jesús, te máá ná cácuu ná testigo jeē ní natecu yā. ³³Te ni ndujéhnú tucu ya ni sáha Yaā Dios jíin poder yā. Te nde nuū maá Yāā Dios, Yaā cúu Tátá yā, ni nihin Jesús Espíritu Santo, chi súcuu ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijna. ³⁴Te David, nasūu síquī maá de ní cáhán de tāca jnúhun yáha, chi tu ní ndáa yiqui cúnu de andiví. Chi síquī Cristo cúu jeē ni cáhán de suhva:

Máá Yāā Dios ni cahān yā jíin
Jítóho rí Cristo:

Cucōo ró ichi ndávaha ri jeē
steén jeē kujéhnú ró.

³⁵Te na sáha ri jeē quende rō
poder tāca jéē cájito uhū rohó,
áchí yá.

Achí David.

³⁶Núu súcuu te ndihí ní jéē cácuu yó ñayuu Israel, na cúni vāha ní jéē vēsú ni cajehni ni yá jicā cruz, te Yaā Dios ni jeni ya maá Jesús jeē cúu ya Jítóho yō te suni cúu ya Cristo, Yaā jnáma yóhó, áchí Pedro jíin i.

³⁷Te jeē súcuu ni cajini sōho i jnūhun yáha, te ni cajnahuhū ni anuá i. Te ni cacajnūhún i Pedro jíin tāca gá apóstol:

¿Te ndese sáha ná jíjnáhan ná núu súcuu? áchí i.

³⁸Te ni cahān Pedro jíin i:

Nacani ni ní jéē stóo ni cuéchi ní jíjnáhan ní, te cuandute ní jéē ní cacandíje ní Jesucristo, návāha cone cáhnu ni Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ni. ³⁹Chi súcuu ni jejnūhun máá Tátá yō Yaā Dios nuū yō jíin núu séhe yó,

te suni súcuu ni jejnūhun ya nuū ñayuu tāca gá nación, tācá i jeē cána ya i candíje i.

⁴⁰Te jíin cuéhē gā jnūhun súcuu ni cahān cají Pedro, te ni stihví ni de i:

Nducú ndéyí ní jeē na cácu ní, chi jnahnū ndetū ñayuu casáha jniñu néé, áchí de.

⁴¹Yūcuán na te tācá i jeē ní cajetáhú jnúhun ni cahān de, ni cajendute i. Te quiví un ní nducuehē gā ñayuu cácandíje, nájnūhun uní mil gā ñayuu. ⁴²Te ni cahíin nihin i síquī jnúhun cástéén apóstol. Te inuú-ni cándajnūhun máni i te cájicān tahú i, te in cáhnu-ni cáyeji i pan, nájnūhun ni steén maá Jítóho yō jeē núcūhun ni yō síquī yā.

**Ndese ni coyūcu ñayuu jeē ní
cacandíje jeē xihna nūhún**

⁴³Te ndihí ñayuu ni cayūhú i ni cajito i, chi cuehē jniñu jéhnú jeē steén jeē kujéhnú ya ni casáha tēe apóstol. ⁴⁴Te inuú ní cahíyo ni ñayuu cácandíje, te ni cacuu inuú i tāca jéē cánevāha i. ⁴⁵Te ni caxicó i na-ni na vé cánevāha i, te ni casaja i xūhún un núu tāca jnáhan i, núu ndese jíini nūhún in in i. ⁴⁶Te ndijnahan quiví ni candutútú i ini templo. Te maní ni cayeji cáhnu i pan tācá vehe jnáhan i nájnūhun ni steén yā, te ni cahíyo sñ ni i. ⁴⁷Te ni cacahān i jeē yóhoyo cújéhnú Yaā Dios. Te ndihí ñayuu ñuu un ní cajejnūhún i ñayuu cácandíje. Te ndijnahan quiví ni jnama Jítóho yō sava ga ñayuu, te ni nduu inuú i jíin ñayuu cácandíje.

Jeē ní nduvāha tēe ríngo

3 Te in quiví te máá cáhuni jehíni ni caa Pedro jíin Juan

cuango de templo, chi hora un cájicān tahú jnāhan de hebreo. ²Te cájendēca ñayuu iin tēe cáríngo nde quivī ní cacu de. Te tēe un ndéé de ndijnahan quivī yehyí templo jeē naní Hermosa, jícān de caridad nuū tāca ñayuu quívicoo ini templo. ³Te tēe un ní jito de nuū Pedro jíin Juan jeē véji de quívicoo de ini templo, te ni jicān de caridad nuū Pedro jíin Juan. ⁴Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe nuū rī jijnáhan ri, achí de.

⁵Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núu de. ⁶Te ni cahān Pedro:

Tú na xūhun plata ni xūhun oro cánevāha ri. Te íyó iin jeē váha ga sáha ri jíin ró: jíin poder maá Jesucristo, Yaā ní jehnu ñuu Nazaret, cáhān rī jíin ró, ndocuiñī te caca ró, áchí de.

⁷Te ni jnií de ndaváha tēe ún, te ni ndonehen de. Te jehē de jíin súcūn jehé de ni nduvāha-ni. ⁸Te iin ni scānda de máá de ni ndocuiñī de, te ni quejéé de jícā de. Te ni quivī de jíin Pedro jíin Juan ini templo, jícā de, cánda de, te nácuatáhú de nuū Yaā Dios. ⁹Te ni cajini tāca ñayuu jeē jícā de te nácuatáhú de nuū yā. ¹⁰Te ni canacuni i de jeē maá de cúu tēe ni condee yehyí templo jeē naní Hermosa, ni jicān de caridad. Te ni canaa ni i ní cajito i, te ni cayūhú i cájito i jeē ní nduvāha tēe ún.

**Jeē ní nacani Pedro jnūhun ini
corredor jeē naní Salomón**

¹¹Te tēe ni nduvāha ún, tu siáá de Pedro jíin Juan. Te ni cacutútú-ni

cuehē ñayuu nuū de ini corredor jeē naní Salomón, te ni canaa ni i cájito i. ¹²Te ni jito Pedro jeē ní cutútú ñayuu ún, te ni cahān de jíin i:

Níhín tēe ñuu yō Israel jijnáhan ní, ¿najehe cánaa ni ní cájito ní jniñu yáha? ¿Najehe cájito ní núu ná te cájeni ni ní jéé maá ná jijnáhan ná íyó poder na jéé sáha ná jéé nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní? ¹³Tuú chi máá Yáā Dios jíi yō Abraham jíin Isaac jíin Jacob jíin tāca gá jíi yō, ni sáha ya jniñu yáha návāha cuni ñayuu jeē cujéhnū Sēhe ya Jesús, Yaā jeē ní cajendēca ní núu tēe cácujehnū. Te ná ni cuni Pilato jeē siaá de ya, te tu ní cájēhe ni jnūhun. ¹⁴Te ni casquéhichī ni yá vēsú cúu ya Yaā ndaā, Yaā ií. Te sa suhva iin tēe jéhnī ndīyī ni cacahān ni jíin Pilato jeē na siáá de. ¹⁵Te ni cacahān ni jéé na cúu Yaā jeē sáha jeē tēcu ndíhi-ni. Te Yaā Dios ni nastécu yā Jesús jeē ní cuu ya ndīyī, te máá ná cácuu testigo jeē ní natecu yā. ¹⁶Te tēe yáha jéé cájito ní te cánacuni ní de, ni candíje de jíin ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájñūhun cájito ndíhi ní.

¹⁷Te na cástūhun ná nuū ni jijnáhan ní, je jíiní na jéé maá ní jijnáhan ní jíin tēe cácujehnū nuū yō, tu ní cájecūhun ni ní, te jeē yúcuan ní cajehni ni yá. ¹⁸Te súcuan ni squícu jnūhun ni cahān Yaā Dios nde jenahán jéé cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jnūhun ya nde jenahán. ¹⁹Te na

nácani ni ni jéē stóo ni cuéchi ní, te nasáma ini ní, te quivícoo ní ndaha Yaā Dios návāha ndahva yā cuéchi ní. Te quee quiví jeē ndúsíi ni ni sáha máá Jítóho yō. ²⁰Te natají yá Jesús ndiji ya, chi cúu ya Cristo, Yaā ní jeni Yaā Dios jeē jnáma ya yohó. ²¹Te jíní nūhún jéē cóo ya andiví ndé nasájeé yá tāca jéē iyó, nájñuhun ni cacahān tēe ndoo ni canacani jñuhun nde jenahán ní sáha Yaā Dios. ²²Chi suhva ni nacani jíi yō Moisés jñuhun nuū tāca jíi yō: Máá Jítóho yō Yaā Dios cani ya Yaā nacani jñuhun nuū rō jijnáhan ró, nájñuhun ni jeni ya ruhū. Te cuu ya ñin jnáhan ñuu yō. Te na chūhun ni rō tāca jñuhun jeē nácani ya ún. ²³Te núu ndé tée tú chuhun ni de jñuhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

²⁴Te tāca tée ni canacani jñuhun nde jenahán, nde tiempo ni quiiji Samuel te níí gá nde vijna, suni ni canacani de jñuhun siquī tācá jñiñu cúu quiví yáha. ²⁵Yucūn maá tée ni canacani jñuhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jíi jíi yō. Chi ni cahān yā jíi Abraham: Yucūn maá ró cane Yaā sáha jeē quéndōo ndetū tāca ñáyuu níí cáhnu ñayiví, áchí yá. ²⁶Te jeē ní nastécu Yaā Dios Sēhe ya, te ni quiiji ya nuū maá yó xíhna gā, návāha quéndōo ndetū yō sáha ya, chi sama ya anuá yō jeē ma sáha ga yō jñiñu neé, áchí Pedro.

Jeē ní cajendēca de Pedro jíi Juan nuū tēe cácujeñhu

4 Te Pedro jíi Juan níi cácahān gā de jíi ñáyuu ún

te ni quecoo tāca sūtū jíi tēe grupo saduceo, jíi tēe cácujeñhu nuū tēe cándito templo. ²Te yōhyo ni caquiñi ni de siquī jeē castéén Pedro jíi Juan nuū ñáyuu, jíi jéē cánacani de jñuhun jeē nátecu ndiyi chi je ni natecu Jesús. ³Te ni cajñi ún de, te ni cachuhun ún de vecāa cone de nde cundijin inga quiví, chi je ni ini. ⁴Te cuehē ñayuu jeē ní cajini sōho jñuhun ni cacahān Pedro jíi Juan ni cacandíje i. Te ni nduu nájñuhun uhūn mil jeē maá nene tēe jeē ní cacandíje.

⁵Te jeē ní cundijin inga quiví ún, te tēe cácujeñhu nuū ñáyuu hebreo jíi tēe jéñhu cándiso jñiñu jíi tēe cástéén jñuhun tutu ley yā, ni candutútú de ini ñuu Jerusalén. ⁶Te suni ni candutútú de jíi Anás jeē cúu sutū cujeñhu ga, jíi Caifás jíi Juan jíi Alejandro jíi tāca gá jeē cácuu jnáhan sutū cujeñhu ga ún. ⁷Te ni candacu jñiñu jeē na quijicoo Pedro jíi Juan condichi de mēhñú, te ni cacajñuhún de:

¿Ndé ñin ni tejnñu rōhó te ndese ni nihin jñiñu ró ní sáha ró jéé ndúvāha tēe yáha? áchí.

⁸Yūcuán na te Pedro chi ni cunuú maá Espiritu Santo jíi de, te jíi poder yā ni cahān de jíi tāca tēe ún:

Tāca níhín tēe cácujeñhu nuū nūū yō Israel jíi tāca níhín tēe jéñhu cándiso jñiñu, ⁹vijna te cástichí ni sáña síquī ñin jñiñu váha ní casáha ná jéé ní nduvāha tēe cúhú yáha. ¹⁰Te na cástūhun ná nuū nihín jéé cácujeñhu ní, návāha suni cuni ndihí jnáhan ñuu yō Israel jeē jíi poder maá Jesucristo, Yaā ní jéñhu ñuu Nazaret, ni nduvāha tēe índichi

nuū ni yáha. Te suu ya cúu Yaā jeē ní cajehni ni jícā cruz, te ni sáha Yaā Dios jeē ní natecu yā. ¹¹Jesús cúu nájnūhun yuū cimientu jeē quítuu vehe. Te máá ní jijnáhan ní cácuu nájnūhun tēe casáha vehe, te ni casquéhichī ni yá nájnūhun jeē cátejiyo ní yūū, chi tu ní cácandíje ní yá. Te ni sáha Yaā Dios jeē cúu ya nájnūhun yuū cánuu gá jeē quítuu vehe. ¹²Te tú cuítu inga jeē cúu jnama yóhó, chi tuá na inga jeē cujéhnu ní jéni Yaā Dios ini ñayīvi yáha jéē cúu jnama yóhó, áchí Pedro.

¹³Yūcuán na te ni cajini un jéē Pedro jíin Juan jéhnu-ni cácahān de. Te je cájini jeē tú tūhva de, chi tēe súcuán-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús. ¹⁴Te cándēhe núū tēe ni nduvāha un, índichi de jíin Pedro jíin Juan, te tu ní cánihīn gā modo ndese ga cahān. ¹⁵Yūcuán na te ni candacu jniñu jeē na quéndacoo sīn de yatā véhe juzgado te ndajnūhun máá jijnáhan. ¹⁶Te ni cacahān:

¿Nde se sáha yó jíin tēe yáha núu súcuán? Chi ni jitē jnūhun yáha núū tāca ñayuu ñuu Jerusalén jeē súcuán ni casáha de iin jniñu jéhnu, te ma cúu cahān yō jeē tu íyó ndáa. ¹⁷Te návāha ma cuíté ga jnūhun yáha, na cúxeēn yō nuū de jeē ma cahán cuítu gā de jnūhun Jesús nuū ní iin ñayuu, áchí.

¹⁸Te ni cacana ún de, te ni cacahān nihin jíin de jeē ma cahán cuítu gā de jnūhun Jesús ni ma steén gā de jnūhun un núū ní iin ñayuu. ¹⁹Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nándacu ní. ²⁰Chi ma cúu stóo ná jniñu jeē nácani ná jnūhun ní cajini sōho ná jíin jniñu ní cajito ná, áchí de.

²¹Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáa de cuango de, chi tú cuítu na modo stóho de chi cáyūhu cájito ñayuu, chi siquī jniñu jéhnu ni cuu ún te ndihi i cácahān i jeē yóhoyo cujéhnu Yaā Dios. ²²Chi tēe jeē ní sáha ya jniñu jéhnu jíin de jeē ní nduvāha de, víhyá gā uū xico cuiyā de.

Jeē ní cajicān tahú ñayuu cácandíje

²³Te ná ni casiáa un Pedro jíin Juan cuango de, te ni najinūcoo de nuū tāca gá jnáhan de, te ni cacachi de ndese ni cacahān sutū cácuje hnu jíin tēe jéhnu cándiso jniñu. ²⁴Te jeē ní cajini sōho de jnūhun yúcuán, te inuú-ni ni cajicān tahú de nuū Yaā Dios:

Tátā Yaā Dios jeē cujéhnu ní núū ndihi, máá ní cúu Yaā Dios ni sáha andiví jíin ñayīvi jíin mar jíin tāca ndihi jeē iyó. ²⁵Te jeē jíin Espiritu Santo te ni sáha ní jéē ni cáhān mozo ní David nde jenahán:

¿Najehē cáquití ndevāha ni ñayuu sīn nación?

¿Te najehē cájeni sáa ni i jeē ndóna i siquī ní?

²⁶Ni cacutútú jéē cácuu rey ñayīvi jijnáhan, te tēe cácuje hnu ni cacutútú de, te inuú-ni ni candonda de siquī máá ní jeē cúu ní Jitoho ná, jíin siquī Cristo, Yaā jeē ní jeni ní.

Achí David.

²⁷Te jendaá chi Herodes jíin Poncio Pilato jíin táca tée ñuu yō Israel jíin tée tāca gá nación, ni cacutútu de ini ñuu yáha ní candonda de siquī Séhe ii ní Jesús, Yaā ní jeni ní. ²⁸Te súcuan ni cuu návāha squícu tācá jniñu jeē jíin poder ni ní cundaā ni ni ndé jenahán jéē súcuan coo. ²⁹Te vijna, Tātā, coto ní ndese cácahān xeēn de nuū na jíjnáhan ná, te cuāha ni fuerza ni núu na jéē cácuu ná mozo ni, návāha jéhnū-ni nacani ná jnúhun máá ní. ³⁰Te jíin poder ní nasávāha ni ñáyuu cácuñu, te sáha ní jniñu jéhnū jeē steén jeē cujéhnū ní. Te tāca jéē yáha sáha ní jíin poder Séhe ii ní Jesús, áchí i jíjnáhan i.

³¹Te nuū ní ndíhi ni cajicān tahu i, te nuū cáyūcu tútú i un ní sáha ya jeē ni jnáa. Te ndíhi i ni cunuú Espíritu Santo jíin i, te ni jēhe ya fuerza te jéhnū-ni ni canacani i jnúhun Yaā Dios.

Jeē ní canevāha cáhnu i ndajniñu

³²Te ñáyuu cuehē jeē ní cacandíje chi inuú cáhīyo ni i jíjnáhan i. Te tú ni iin i ní cáhán jeē ndajniñu jeē névāha máá i cuu máá-ni i, chi tācá ndajniñu ni canevāha cáhnu i. ³³Te nihin cánacani apóstol jnúhun jeē ní cajito de jeē ní natecu Jitoho yō Jesús. Te yōhoyo ni chindéé ñáhán yá ñáyuu cacandíje. ³⁴Chi tú cuiti ni iin i ní ndóho jeē cumaní nuū i, chi tāca ñáyuu cánevāha cuehē ñuhun chí vehe, ni cacicó i sava te ni caquindeca i xūhún un. ³⁵Te ni cajēhe i xūhún un núu tée apóstol, te ni casaja tée apóstol nuū ñáyuu

cacandíje núu ndese jíni ñúhún iin iin i. ³⁶Te íyó iin tēe nání José jeē cúu yucūn Leví, ni cacu de Chipre, ñuhun jeē íne sñin nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhán jnúhun ndeyí ni. ³⁷Te ni xícó de iin ñuhun de, te ndáhá de xūhún un ní jēhe de nuū tēe apóstol.

**Siquī cuēchi jeē ní casáha
Ananías jíin Safira**

5 Te suni inga tēe nání Ananías jíin ñasihí de Safira, ni cacicó de iin ñuhun de. ²Te ni chuvāha de sava xūhún un cuu máá de jíin ña, chi súcuan ni candajñuhún de jíin ña, te ndáhá de inga sava nájnūhun jeē ndíhi cúu, te ni jēhe de nuū tēe cácuu apóstol. ³Te ni cahān Pedro:

Ananías, ¿naun ni jēhe ro jnúhun jeē quívi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní cacicó ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajniñu máá ró, chi ni sáha ró nájnūhun jeē ndíhi xūhun ní jēhe ró. ⁴¿Te á násūu cuenta maá ró cúu ñuhun un ndé ná tu xico ró? Te ná ni xico ró ¿te á násūu cuenta maá ró cúu xūhun jéē cuajniñu ró ndé nuū cuní maá ró? ¿Te naun ni jeni ni rō jeē stahú ró súcuan? Te nasūu máni máá tēe cúu jeē jícu ró stáhú ró, chi suni Yaā Dios, áchí Pedro.

⁵Te ná ni jini sōho Ananías tāca jnúhun yáha, te ni cotúú-ni de ni jihí de. Te tāca ñáyuu ní canihin jnúhun ún, yōhoyo ni cayūhú i.

⁶Te ni candocuiñi tēe suchí, te ni cachusúcun de ndíyi un cuáchindūji de.

⁷Te ni cunúu nájnūhun uní hora. Te ni jinū nāsihí ndíyí un ní quívi ña ini vehe ún, te tú na vé jiní cuíti ña. ⁸Te Pedro ni cajnúhún de ña:

Cachi nuū rí, ¿á ñin súcuan-ni ni caxico ró ñuhun ró chí tuú? áchí de.

Te ni cachi ña:

Suu súcuan-ni ni caxico ná, áchí ña.

⁹Te ni cahān Pedro jíin ña:

¿Naun ni casquíjnāhan jnūhun ró jēé cóto ndee rō Espiritu Santo maá Jítoho yō? Chi ni nducú ró stahú ró yā. Cuni nahín jēé cáhma nanecoo tēe cuachindūji yí ró, te suni súcuan quichindūji de rōhó, áchí de.

¹⁰Te ni cotúu-ni ña nuū jehé Pedro te ni jihí-ni ña. Te ni ndívicoo tēe suchí un te ni cajito de jēé jé ni jihí ña, te ni caquenehen de ña, te ni jechindūji de ña xiin yí ña. ¹¹Te yōhyo ni cayūhú ndívii ñayuu cáchandíje jíin táca gá ñayuu jēé ní cajini jnūhun jēé súcuan ni cuu.

Cuehē jniñu jéhnū ni casáha apóstol

¹²Te cuehē jniñu jéhnū jēé steén jēé cujéhnū Yaā Dios ni casáha tēe apóstol nuū ñayuu. Te tāca ñayuu cáchandíje, ñuú-ni cándutútú i ini corredor jēé naní Salomón. ¹³Te tu ní cáchundeyí ni inga ñayuu quijnāhan jíin i. Te cájejnūhún i ñayuu cáchandíje. ¹⁴Te ni nducuehē gā i, chi cúu tēe cúu ñahan ni cacandíje i maá Jítoho yō. ¹⁵Te cáquindeca ñayuu jnāhan i jēé cácuhū, te cájequin i ini calle cáca i nuū camilla jíin núu yúu, chi cáconi i wésú ste cuándahū Pedro na yáha siquí i te nduvāha i. ¹⁶Te suni cuehē ñayuu tācá ñuu cáhíyo

yajni yūcuan ní quiijicoo i ñuu Jerusalén ni caquindeca i jnāhan i jēé cácuhū jíin jēé cándoho tachí, te ndíhi i ni canduvāha i.

Jēé ní cajito xeēn i tēe cácuu apóstol

¹⁷Yūcuán na te sutū cujéhnū ga jíin táca gá jnāhan jēé cáchandíje sahān saduceo, ni cacucuésun ni jēé siquí tēe cácuu apóstol. ¹⁸Te ni cajni de tēe cácuu apóstol ni cachuhun de vecāa. ¹⁹Te ñin ndajéhé maá Jítoho yō ni nune ya yehyí vécaā ún jecuāa, te ni quenehen ya de jíjnāhan de. Te ni cahān yā jíin de:

²⁰Cuáhān te cuiñi ró ini templo, te yūcuán nacani cájí ró jnūhun nuū ñayuu siquí ndese nihín tahu i cotecu i níí cáni, áchí ndajéhé yā.

²¹Te ni cajini sōho de jnūhun yáha. Te nuū ní cundijin te nehen ni quívicoo de ini templo, te cástéén de jnūhun ya nuū ñayuu.

Te níni cástéén de te sutū cujéhnū ga jíin táca jnāhan de ni canastútú de tēe junta cujéhnū ga, jēé cúu ndíhi tēe jéhnū cándiso jniñu nuū ñayuu nación Israel. Te ni catají de policia cuaquenehen tēe apóstol ini vecāa. ²²Te nuū ni jínucoo te tuá gā tēe apóstol. Te ni canandió cóo te ni cacachi:

²³Jendaá cúu jēé ní cajito ná ndési vāha vecāa, te cáhiin tēe cándito yéhyí un. Te nuū ní canune ná, te tú cuíti gā tēe un cáhiin ini vecāa ún, áchí de.

²⁴Te sutū cujéhnū ga jíin tēe cujéhnū nuū tēe cándito templo jíin sūtū cácujehnū, nuū ní cajini sōho de jnūhun yáha, te ni cajeni ni de ndese ga cúu un núu súcuan. ²⁵Te ni quee-ni ñin tēe te ni cachi:

Tēe jeē ní cachuhun ní vecāa, cáhiin de ini templo, te cástéén de jñūhun nuū ñáyuu, áchí de.

²⁶Yūcuán na te tēe cácujeñhu nuū tēe cándito templo, jíin tēe cácuu policia de, ni jengoo de, te yúcún ní nacueca de tāca tēe apóstol vendicoo de jíin, chi cáyūhú de jeē sanaa te cuāha ñayuu yuū xinī de núu sáha xeēn de jíin tāca tēe apóstol. ²⁷Te nuū ní najinūcoo de jíin tēe apóstol, te ni cajecuiñī de nuū tēe cása ha junta. Te sutū cujéñhu ga ni cahān:

²⁸Ni cacahān nīhin ri jíin ró jeē ma steén cuiti gā rō jñūhun tēe nání Jesús. ¿Te naun ni casáha ró jeē ní ndecāva jñūhun un ñí ñuu Jerusalén yāhá? Te cácuu rō stau yáhu ró rúhū jijnáhan ri siquī jeē ni jíihī tēe ún, áchí.

²⁹Te Pedro jíin tāca gá apóstol ni cacahān de:

Cánuu jēe squícu ná jniñu ní ndacu Yaā Dios nuū ná te nasūu jniñu nándacu tēe. ³⁰Máá Yāa Dios jíi yō ni nastécu yā Jesús, Yaā ní cajehni maá ní jeē ní cata caa ní yá jicā cruz. ³¹Te ni sáha Yaā Dios jeē ní ndujéñhu tucu Jesús néne ya ichi ndávaha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios návaha yóhó, jēe cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū tāca cuéchi yó. ³²Te máá ná ni cajito ná tāca jniñu yáha, te suni máá Espíritu Santo steén cají yá jeē súcuan cúu, chi jéhe Yaā Dios Espíritu Santo yā condee ini anuá tāca ñáyuu jeē cájendetū nuū yā, achí de.

³³Te ná ni cajini sōho un jnúhun yáha, te yōhyo ni caquiti ní, te

cahni de cácuu nuú. ³⁴Te mēhñú un jíjnáhan néne iin tēe grupo fariseo nání de Gamaliel, te cúu de maestro jeē steén ley yā, te tāca ñáyuu cájeñhún i de. Te ni ndocuiñī de, te ni ndacu de jniñu jeē na cújiyo núu tēe apóstol. ³⁵Te ni cahān de:

Róhó jnáhan ñuu yō Israel, cani vāha ni rō núu na vé cácuu rō sáha ró jíin tāca tēe yáha. ³⁶Chi nucūhun ni rō jeē iin cuiyā ni ndonda Teudas siquī gobierno, te ni cahān de jeē tēe téyí cúu de, te ni cacutútú nájnūhun cuūn ciento tēe jíin de. Yūcuán na te ni cajehni ñayuu Teudas, te tāca jēe ní caquijnáhan jíin de ni cajitē núu cuangoo sáa-ni, te ni jecuiñī-ni jniñu ún. ³⁷Yūcuán na te quivī ni íyo censo te Judas, iin tēe Galilea, ni ndonda de siquī gobierno, te ni cacutútú cuéhē tēe jíin de. Te suni ni cajehni ñayuu Judas, te tāca tēe jeē ní caquijnáhan jíin de ni cajitē núu cuangoo. ³⁸Te vijna na cuāha ri consejo rohó. Ma stáhān gā rō tēe yáha. Siáá de na quingoo de. Chi núu ñayuu-ni ni squejéé jniñu yáha, te jecuiñī ií. ³⁹Te núu Yaā Dios ni squejéé, te ma cúu casi rō, chi sanaa te siquī Yaā Dios cándonda ró, áchí de.

⁴⁰Te ni cachusóhó jēe ni cáhān Gamaliel. Te ni canacana tēe cácuu apóstol, te ni cacani de jíin cuarta ñíi te ni cacahān xeēn jíin de jeē ma cahān gā de jñūhun Jesús, te ni casiáá de cuangoo de. ⁴¹Te máá apóstol ni quendacoo de nuū junta cuangoo de, cácusíi ni de jeē ni jéhe ya jñūhun ndoho de jeē cuāha ñayuu jñūhun canu de siquī jeē cácandíje de ya. ⁴²Te ndiquivī

castéén de jñuhun vāha Jesucristo, te cánacani de jñuhun ún ini templo jíin táca-ni vehe.

Jeē ní cajeni de uxā tēe cuajniñu mēhñu ñáyuu cácanđije

6 Te ni cucuehē ñayuu cácanđije. Te tiempo un te tēe hebreo jeē cácahān yuhu griego, ni quejéé de cácahñu de nuū jnāhan hebreo de, áchí de jeē ñahan viuda jeē cácahān yuhu griego tu cániñin vāha ña staā jeē cása de tāca quívī cuu ña. ²Yūcuán na te máá ndihúxí uū apóstol ni canastútú de tāca ñáyuu cácanđije, te ni cacahān de:

Tú vāha jeē jécuiñī jniñu jeē cánacani ri jñuhun Yaā Dios siquī jeē cása rī staā. ³Núu súcuan te róhó, hermano, nacāji ró úxā jnāhan máá yó, te na cóndiso jniñu de saja de staā. Te nacāji ró tēe jeē cájejnúhún ñáyuu de, tēe ndíchí jeē ní cunuú Espíritu Santo jíin de. ⁴Te ruhū jijnāhan ri, máni cacān tahu rī jíin jēé nācani ri jñuhun ya, achí de.

⁵Te ndíhi ñayuu ni canujnahan ni i jñuhun ni cacahān de. Te ni canacāji i Esteban, tēe cándije vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cándije sahān ñayuu hebreo nde ná tu candíje de jñuhun Cristo. ⁶Te ni cajeni i tāca tēe yāha núu tēe cácuu apóstol, te tēe apóstol un ní casoó de ndaha de xini tāca tēe un ní cajicān tahu de nuū Yaā Dios siquī jniñu condiso de.

⁷Te jñuhun Yaā Dios ni jitē gā cuahān, te ni nducuehē teyí ñayuu

cácanđije i jñuhun ya ini ñuu Jerusalén. Te suni cuehē sutū ni cacandíje de jñuhun ya.

Jeē ní cajnií de Esteban

⁸Te ni chindéé ñáhán yá Esteban ni jēhe ya poder nuū de, te ni sáha de tācá jniñu jéhnú nuū ñáyuu, jniñu jeē steén jeē cujéhnú Yaā Dios.

⁹Te ñáyuu hebreo jeē ní cacuyāhu i te ni canduu libre i, íyó vehe i sinagoga i. Te tēe un cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejéé de cástāhān jnāhan de jíin Esteban. ¹⁰Te tu ní cácuñdeyí jíin de, chi ndíchí ní cahān de ni sáha máá Espíritu Santo. ¹¹Yūcuán na te ni cascāhān sava tēe jeē na cáhān jñuhun stáhú síquī Esteban. Te ni cacahān jeē ní cajini sōho cáhān ndevāha Esteban siquī

Moisés jíin síquī Yaā Dios. ¹²Te jeē súcuan ni cacahān te ni caquītī ni tāca ñáyuu jíin tēe jéhnú cándiso jniñu jíin tēe cástéén jñuhun tutu ley yā. Te ndíhi de ni candonda siquī Esteban, te ni cajnií de cuangoó jíin de nde nuū junta cujéhnú ga. ¹³Te ni cajeni de tēe cahān jñuhun yáa síquī Esteban, te suhva ni cacahān:

Tēe yāha tu ndé jécuiñī de jeē cahān ndevāha de siquī templo i yāha jíin síquī ley yā. ¹⁴Chi ni cajini sōho ná cáhān de jeē Jesús, tēe ni jéhnú ñuu Nazaret, canu de templo yāha te nasama de jeē tajnúní ley yā jeē ni jēhe Moisés nuū yō, áchí.

¹⁵Yūcuán na te ndíhi tēe cáyūcu núu junta un ní candacoto vāha nuū Esteban, te ni cajini jeē jito nuū de ná jito nuū iin ndajéhé Yaā Dios.

Jnūhun ni nacani Esteban

7 Te máá sūtū cujéhnu ga ni cajnūhún Esteban:

¿A ndáa jeē súcuan ni sáha ró nájnūhun cácahān de yāhá? áchí.

²Te ni cahān Esteban:

Ndihí níhín jéē cácuu ní jnáhan ñuu yō, jíin ndihí níhín jéē cácujuhnu ní núū ñúū yō, cuni nahín ní jnūhun cahān ná: Máá Yāā Dios jeē yóhyo cújéhnu ya, ni steén yā maá yá nuū jíí yō Abraham nde na néne ga de región Mesopotamia, nde ná tu quihín de condee de ñuu Harán. ³Te ni cahān yā jíin de: Stóo ñuu rō jíin táca jnáhan ró te quihín rō nuū cuáha ri condee rō, chí máá rí steén ichi nuū quihín rō, achí yá. ⁴Yūcuán na te ni quenda de región Caldea, te ni jinū de ni condee de ñuu Harán. Te yūcuan ní jihí tatá de. Yūcuán na te ni sáha Yāā Dios jeē ní quee de ñuu yáha núū cáyūcu yó vijna. ⁵Te tu ní jéhe ya ni iin tíhlí ñuhun yáha cuu tahū de. Te vēsú súcuan te ni jejnūhun ya jeē cuáha ya ñuhun un núū de nde jíin núū táca séhe de, vēsú ná tu coo séhe de sáá. ⁶Te súcuan ni cahān Yāā Dios jíin de: Sēhe ró coyūcu jíca i inga ñuu, te cuūn ciento cuiyā sājniñu sáá-ni i te stóho ñayuu yūcuan i. ⁷Te siquī jeē súcuan sáha i jíin séhe ró, te máá rí chí stóho ri ñayuu ñuu ún. Te sáá te quendacoo séhe ró yūcuan, te nucoyūcú i yāhá chiñúhún i ruhū, achí yá. ⁸Te ni cahān yā jíin Abraham jeē na cúu de circuncidar, jeē cúu iin jnuni jeē ni sáha ya contrato jíin de. Te ná ni cacu séhe de Isaac te ni sáha de circuncidar i nuū uná quivī. Te

suni súcuan ni sáha Isaac jíin séhe de Jacob, te Jacob jíin séhe yíí de jeē cácuu ndihúxí uū yucūn ñayuu Israel.

⁹Te táca séhe Jacob ni cacucuésún ni de jíin ñani maá de José, te ni caxicó de i nuū tée jeē ní cajendēca i nde nación Egipto. Te Yāā Dios chí ni ndito ya José. ¹⁰Te ni jnama ya i nuū táca jnūndóho ní jito i, te ni cundíchí i ni sáha ya. Te Faraón, tēe cúu rey nación Egipto, ni cusīi ni de jíin i ni sáha ya, te ni tejniñu de José jeē cúu de gobernador te ndacu de jniñu nación Egipto jíin núū ñayuu cáyūcú vehe Faraón.

¹¹Te ni quiji quivī jeē ni íyo iin jnamā xeēn, te ni ndoho ñayuu ní cáhnu nación Egipto jíin ndé ñuu Canaán. Te táca jíí yō ún, tuá ni cánihín de jeē cáji de. ¹²Te ni nihín Jacob jnūhun jeē iyó trigo nde nación Egipto, te ni tají de séhe de ni jengoo de ni cajeen de trigo vuelta iin. ¹³Te jeē cuángoo de vuelta uū te ni nastúu José jeē maá de cúu ñani de jíjnáhan de. Yūcuán na te ni jini rey Faraón ndé iin jnáhan cúu José. ¹⁴Te ni cahān José jíin táca ñani de jeē na cóndeca de tátá de Jacob jíin ndihí jnáhan vehe de. Te ni íyo uní xico xahūn i. ¹⁵Te súcuan ni cuu jeē ní jinū Jacob ni condee de nación Egipto nde ni jihí de. Te suni yūcuan ní coyūcu séhe de jeē cácuu jíí yō un ndé ni cajihí maá de. ¹⁶Te ná ni quee quivī jeē ndénehen ya táca yūcūn de jeē cáyūcu tátú de nación Egipto, te ni cacondiso de yiqui ndihúxí uū ndīyí jíí un jéē ndíjí ñuu Siquem, te ni cachindūji de ini yaū ndīyí ndéé

jicá cáva jeē ní jeen jíi yō Abraham nuū tāca séhe Hamor ñuu Siquem.

¹⁷Te nde ná cáyūcu gá de nación Egipto, te cuacuyajni quivī jeē squícu jñūhun ni cahān Yaā Dios jíin Abraham jeē quéndacoo séhe de nucoyūcú i ñuu ni jéjñūhun ya nuū i, te ñayuu un ní tahū cuehē i ini nación Egipto. ¹⁸Yūcuán na te ni nucuññī inga rey ñuu Egipto jeē tu ní jíin de jeē váha ni sáha ndīyi José. ¹⁹Te rey un ní stahú de tāca jíi yō te ni sáha ndevāha de jíin i, chi ni sáha fuerza de i jeē ma cóto ga i séhe yiquín i te na cúu. ²⁰Te tiempo un ní cacu Moisés, te ni cusī ni Yaā Dios jíin i. Te unī yoō ni condito sáhi náná i tátá i. ²¹Te tuá ni cúu condito sáhí de i, te ni cachune de i nuū nanihīn séhe síhí Faraón i, te ni naquihīn séhe ña i ni scuēhnu ña i nájnūhun séhe máá ña. ²²Te ni cutūhva Moisés tāca jñūhun ndíchí ñuu Egipto, te ni cujéhnu de jíin jñūhun cáhán de jíin jniñu sáha de.

²³Te nuū uú xico cuiyā de te ni jecondēhé de jnáhan de jeē cácuu ñayuu Israel. ²⁴Te ni jito de nuū ñin tēe nación Egipto jeē sáha ndevāha jíin ñin tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuu ni ndutahū jeē ni sáha ndevāha jíin jnáhan de ún. ²⁵Te máá Moisés jéni ni de jeē jécūhun ni tāca jnáhan de jeē Yāā Dios ni tají yá de jeē jnáma de jnáhan de ún ini nación Egipto nuú, te tu ní cájecūhun cuiti ni jnáhan de ún. ²⁶Te inga quivī suni ni jito de nuū uú tēe Israel jeē cájejnáhan, te cúní de jeē na jécuiññī. Te jeē yúcuu ní cahān de jíin: ¿Najehē casáha ndevāha ró jíin

jnáhan ró? Chi nájnūhun ñin ñani-ni cácuu ró, áchí de. ²⁷Te máá tēe cáni tahū jnáhan un ní chundahá de Moisés te ni cahān de: ¿Ndé ñin ni jeni róhó jéē cujéhnu ró núu rī te sándaā rō jniñu ri jijnáhan ri?

²⁸¿Chí suni cúní rō cahni rō ruhū nájnūhun ni jehni rō tēe Egipto icu chí naún? áchí de jíin Moisés. ²⁹Te nuū ní jini sōho Moisés jñūhun yáha, te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yūcuu ní scácu ñasihí de uū séhe yíi de.

³⁰Te ni jinu uū xico cuiyā jeē néne de yūcuán. Yūcuán na te ñin ndajéhé Yaā Dios ni quenda ya nuū de nde nuū ñūhun téhé nuū íin yucu súcūn Sinaí. Te ni quenda ya nuū de xinī ñin yucū cuíi cáhnu cándahá yáñuhūn, te tu ní cáyú yucū ún. ³¹Yūcuán na te Moisés ni naa ni de jíto de ún, te ni jehēn de nde nuū, návāha coto váha de. Te ni jini sōho de jeē cahán maá Jítoho yō jíin de: ³²Máá rí cúu Yaā Dios tāca jíi rō jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yúcuu tuá ni cúndeyí ni de coto de nuū. ³³Te máá Jítoho yō ni cahān yā jíin de: Quenehen ndijēn rō chi nuū íin ró, ñūhun íi cúu. ³⁴Je ni jini rī ñayuu maá rí jeē yóhoyo cándoho i nación Egipto, te suni jíin sōho ri jeē cájnana uhū i, te ni cuun ri vēji ri jeē jnáma ri i jíjnáhan i. Núu súcuu te vijna chi tají rí rohó ndicó ró quihīn rō nde nación Egipto, achí yá jíin de.

³⁵Te nde ná tu quenda Moisés Egipto, te tāca jnáhan de ni

casquéhichī i de jeē ní cacahān i jíin de: ¿Ndé iin ni jeni róhó jéé cujéhnū ró núū rī te sándaā rō jniñu rī? ni cacahān i jíin de. Te vēsú súcuan te máá ndajéhé Yaā Dios ni quenda nuū Moisés un jéé cándahá cáyú yucū cuíí ún. Te súcuan ni cuu jeē ní natají yá de cuanhun de nde Egipto jeē ndácu de jniñu nuū i te jnama de i. ³⁶Te máá Moisés ni sáha de jeē ní quendacoo jnáhan ñuu de ini nación yúcuan, te ni cayāha de Mar Rojo, te ni cajica cuu de ñuhun téhé úū xico cuiyā. Te níí tiempo un ní sáha de cuehé jniñu jéhnū jeē steén jeē cujéhnū Yaā Dios. ³⁷Te máá Moisés cúu jeē suhva ni cahān de jñuhun yáha jíin jnáhan ñuu yō Israel: Máá Yāā Dios cani ya Yaā nacani jñuhun nuū rō jijnáhan ró nájñuhun ni jeni ya ruhū. Te cuu ya iin jnáhan ñuu yō. Te na chūhun ni rō jñuhun cahān Yaā ún, áchí. ³⁸Te suni nde ná ni cajica cuu jíí yō nde nuū ñúhun téhé, te ni cahān ndajéhé yā jíin Moisés xinī yúcu súcún Sinaí, te ni nihīn de jñuhun jeē cahān ndese nihīn tahú yō cotecu yō, te ni nacani de jñuhun un núū tāca jíí yō, te ni quendōo jñuhun un núū yō.

³⁹Te tāca jíí yō ún tu ní cáculi de cuandetū de nuū Moisés, chi sa suhva ni cacuni de squéhichī ni de Moisés, te ni cacuni de nandicó de nungoo de Egipto nuú. ⁴⁰Te ni cacahān de jíin Aarón: Sáha ní tijnī yaā na cósnūu núū yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéé jeē cuahán de xinī yucu Sinaí, achí. ⁴¹Yūcuán na te ni cajéhe de oro ni cuvāha

iin becerro oro, te nuū becerro ídolo un ní casocō de quití, te ni cacusiī ni de jíin ídolo ni casáha de ún. ⁴²Te Yaā Dios ni cujiyo ya cuahān yā, te ni stóo ya de na chíñuhún de nuū tāca jéé jíto yó iin andiví, nájñuhun yósó núū tútu tēe ni canacani jñuhun Yaā Dios nde jenahán:

Ni cahān yā: Róhó ñáyuu Israel, éá cájeni ni rō jeē nuū ruhū ni casocō rō quití
ná ni cajica cuu ró úū xico cuiyā
nde nuū ñúhun téhé?

⁴³Tuú, chi sa suhva ni cacondiso ró nicho jeē íne ídolo jeē naní Moloc

jíin figura quīmi jeē naní Renfán,

ídolo jeē ní casáha máá ró ni cachiñuhún ró.

Jeē yúcuan cúu jeē siáha ri rohó quíhīn jicá ró nde yatā núū Babilonia, achí yá.

⁴⁴Te ni ndacu ya jniñu nuū Moisés jeē na sáha de vehe ñiñ nuū chíñuhún de ya, nájñuhun cáca jeē ní steén yā nuū de. Te tāca jíí yō, nde nuū ñúhun téhé ní canevehā de vehe iī un núū ní cachuvāha de tabla yuū jeē yosó jñuhun ley yā. ⁴⁵Te ni castóo de vehe un núū ndihi sēhe de jeē cúu jíí yō. Te ni quīvi Josué jíin jíí yō ini nación yáha, te ni sáha ya jeē ní cacundeyí de jíin tāca ñáyuu jeē ní cacoyūcu yáha ní cajinu i cuango i. Te ni quīvicoo de tāca ñuu i jíin vehe iī ún, te ni quendōo nde quīvī ní cuu David rey. ⁴⁶Te ni cusiī ni Yaā Dios jíin rey David. Te ni jicān de nuū yā jeē sáha de iin vehe iī yā nuú, chi máá yá cúu Yaā Dios jíí de Jacob. ⁴⁷Te ni

cuu jeē nde sēhe yíí de Salomón ni sáha vehe ií yā. ⁴⁸Te vēsú súcuan ni cuu te Yaā cujéhnú téyí, tu ndéé yá maá vehe jeē casáha ñayuu, nájnūhun ni cahān tēe ni nacani jnūhun ya nde jengahán:

⁴⁹Ni cahān yā:

Andiví cúu nájnūhun mesa nuū ndácu ri jniñu
te ñayiví cúu nájnūhun iin nuū yítuu jehē rī.
Núu súcuan ¿te ndese cuu sáha ró vehe jeē cóndee rī,
te ndese cuu sáha ró nuū ndétātu rí?

⁵⁰¿A násūu maá rí ní sáha ndíhi jeē iyó?

áchí maá Jítóho yō Yaā Dios.

⁵¹Te cáhán gā Esteban:

Yōhyo cácuñihni ni ní, te tu cácuñi ní chusóhó ní, te cácuu ní nájnūhun ñayuu táca nación jeē tu cájini i jnūhun ya ni tu cácandíje i ya. Chi níní cájesi ni núu Espiritu Santo, te nájnūhun ni casáha jíí yō jengahán, suni súcuan casáha ní vijna. ⁵²¿A ní iyo tēe nácani jnūhun ya nde jengahán jeē tu ní sáha ndevāha jíí yō jíin de? Chi jíí yō ni cajehni de tēe ni canacani jnūhun jeē quíji maá Yáa ndaā. Te je ni quíji Yaā ún, te maá ní ni canastúu ni yá nuū tēe ni cajehni de ya. ⁵³Te vēsú nde jíin táca ndajéhé yā ni jēhe ya ley yā nuū yō, te maá ní chi tu cásquícu ní, áchí Esteban.

Jeē ní cajehni de Esteban

⁵⁴Tāca jnūhun yáha ní cajini sōho, te yōhyo ni caquitī ni, te cánacayihí yuhu cájito nuū Esteban. ⁵⁵Te maá Esteban chi ni cunuú Espiritu Santo jíin de. Te ni jito de ichi ándiví, te

ni jini de jeē ndíndēe núu néne Yaā Dios, te índichi Jesús ichi ndáváha ya. ⁵⁶Te ni cahān de:

Vijna te jíto ri jeē núne andiví, te jíto ri nuū maá Yáa ní nduu tēe, índichi yā nuū cujéhnú ya lado váha Yaā Dios, áchí de.

⁵⁷Yūcuán na te ni cajesi un sóho, te ni cacana cóhó, te inuú-ni ni candonda siquī Esteban. ⁵⁸Te ni caquenehen Esteban cuango jíin de nde yatā ñuū. Te tēe ni cacahān yaá un jíin ndíhi jnáhan de ni cachucú de ticāchí de ndíto iin tēe suchí nání Saulo, te ni cacani de yuū xinī Esteban. ⁵⁹Te níní jéé cácani táca tēe un yúu xiní de te ni jicān tahu de nuū yā:

Tátā Jesús jeē cúu ní Jítóho ná, naquihin ní ánuá na vijna, áchí de.

⁶⁰Te ni jecuiñí yití de te ni cahān jee de:

Tátā Yaā Dios, ma quénehen ní cuéchi siquī i jeē casáha i jíin ná, áchí de.

Súcuan ni cahān de te ni jihí-ni de.

Jeē ní jito xeēn Saulo ñayuu cácandíje

8 Te Saulo, ni nujnahan ni de jeē ni jíhí Esteban.

Te quiví un ní caquejéé de cájito xeēn ndasí de ñayuu cácandíje Jesús ini ñuu Jerusalén, te jeē yúcuan cúu jeē ní cajitē núu ñayuu cácandíje cuango i níí Judea jíin níí Samaria. Te tēe apóstol chi tu ní cájite núu de. ²Te sava tēe yínúhún núu Yaā Dios, ni cachindūji de Esteban. Te yōhyo ni candahyū de jeē ni jíhí Esteban. ³Te Saulo chi jíto xeēn de ñayuu cácandíje, te

quívi de ndijnahan vehe te jnái de tēe, ñahan, chúhun de i vecāa.

**Jeē ní canacani i jnūhun Yaā
Dios ndañúū Samaria**

⁴Te tācá ñuu nuū cuángoo tāca ñáyuu ní cajitē núu un ní canacani i jnūhun ndese jnáma Yaā Dios ñayuu. ⁵Te ni jinū Felipe ñin ñuu ndañúū Samaria, te nuū ñáyuu yúcuan ní nacani de jnūhun Cristo, Yaā ní jeni Yaā Dios jeē jnáma ya yohó. ⁶Te tāca ñáyuu ní cacutútú un ní cajini nahín váha i tāca jnúhun ni nacani Felipe, te ni cajito i tācá jniñu jéhu ni sáha de. ⁷Chi cuehē ñayuu cándoho tachí ni canduvāha i, te cācana cōhó táchí un ní caquendacoo. Te cuehē ñayuu ni íjin jíin ñáyuu ríngo ni canduvāha. ⁸Te jeē yúcuan ní cacusiñ teyí ni ñayuu ñuu ún.

⁹Te ini ñuu un néne ñin tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cājito i jeē sáha Simón, te ni stahú de i ni cahān de jeē ñin tēe cújéhu teyí cúu máa de. ¹⁰Te nde tēe cācujéhu jíin ndívii cuitiñ ñayuu, cājetáhú ndasí i jnūhun cāhán de, te ni cajeni ni maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

¹¹Te cājetáhú váha i jnūhun cāhán de, chi cuehē tiempo ní sáha de jniñu stáhú ní canaa ni i ni cajito i. ¹²Te nuū ni jinū Felipe, ni nacani de jnūhun váha ndese ndácu Yaā Dios jniñu, jíin jnúhun Jesucristo, te ni cacandíje i te ni cajendute i, cúu tēe cúu ñahan. ¹³Te suni máa Simón ni candíje de te ni jendute de, te ni

jica cuu de jíin Felipe. Te ni naa ni de jíto de tācá jniñu jéhu jeē sáha Felipe jeē steén jeē cujéhu Yaā Dios.

¹⁴Te cáyūcu tēe apóstol ñuu Jerusalén, te ni canihín de jnūhun jeē ñáyuu Samaria ni cacandíje i jnūhun Yaā Dios. Te ni catajé de Pedro jíin Juan cuangoo de yūcuán. ¹⁵Te ni jinūcoo de, te ni cajicān tahu de jehē ñáyuu un návāha na quívi Espíritu Santo ini anuá i jíjnáhan i. ¹⁶Chi ná tu quívi ya ini anuá ni ñin i, chi máa-ni jeē ní cajendute i jeē ní cacandíje i Jitoho yō Jesús. ¹⁷Yūcuán na te Pedro jíin Juan ni casoó de ndaha de xiní i jíjnáhan i, te ni quívi Espíritu Santo ini anuá i.

¹⁸Te ni jito Simón jeē súcuan casoó apóstol ndaha de xiní ñáyuu ún te súcuan quívi Espíritu Santo ini anuá i, te cúní de cuāha de xūhun núu tēe apóstol návāha nihín de poder un núu. ¹⁹Chi ni cahān de:

Cúní na jēe cuāha ní poder yáha núu na, návāha núu ndé ñáyuu soó ná ndaha ná xiní i te quívi Espíritu Santo ini anuá i, áchí de.

²⁰Yūcuán na te ni cahān Pedro jíin de:

Na náa xūhun ró je jnahnū ndetū rō siquí jeē jení ni rō jeē jíin xūhun te cuu cuaan ró táhū jeē véji nuū Yaā Dios. ²¹Ma nihín tahu rō jeē sáha ró jniñu yáha, chi tu íyó ndāa anuá rō nuū Yaā Dios. ²²Núu súcuan te jíni ñúhún jēe stóo rō jnúhun jeē jení néé ni rō súcuan te cahān ndahú ró jíin Yāa Dios, te máa yá sanaa te cone cáhnu ni yā siquí jeē jení néé ni rō súcuan.

²³Chi jíiní rí jeē cucuésún ni rō siquí

jeē sāha ri jniñu yáha. Te tāca jeē neé jéni ni rō ni cunuú un jíin ró, achí Pedro jíin de.

²⁴Yūcuán na te ni cahān Simón jíin de:

Cacān tahu ni jéhē na jíjnāhan ní núu maá Jítóho yō návāha tú jnahnū ndetū na nájnūhun ni cahān ní, achí de.

²⁵Te Pedro jíin Juan ni cacahān cají de ndese cácanđije de jnūhun Yaā Dios. Te jeē cuānungoo de ichi nūū Jerusalén, te tiji ni ndaúū Samaria ni canacani de jnūhun jeē jnáma ya ñayuu.

Felipe jíin tēe nación Etiopía

²⁶Yūcuán na te ni cahān ndajéhé maá Jítóho yō jíin Felipe:

Quihin ichi te quihīn rō ichi sur, ichi jeē quēnda Jerusalén cuahān nde ñuu Gaza, achí yá.

Te ichi chūcuan chi máá ñuhun téhé cúu. ²⁷Te ni quihin Felipe ichi cuahān de. Te nde nación Etiopía ni quiji ñin tēe eunuco jeē ndíso jniñu de cúu de tesoroerō nuū ñāhan cúu reina ndácu jniñu nación Etiopía, nání ña Candace. Tēe un ní quichiñúhún de Yaā Dios ñuu Jerusalén. ²⁸Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán. ²⁹Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

³⁰Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnūhún de tēe ún:

¿A jécūhun ni ni jnúhun jeē cáhu ní chí tuú? achí de.

³¹Te ni cahān maá tēe un jíin Felipe:

¿Te ndese jecūhun ni ná? Chi tú na tēe castūhun núu ná ndese cúu ún, achí de.

Te ni cahān de jíin Felipe jeē na cáa de conēne ndúú de jíin de ini carreta.

³²Te jnūhun cáhu de tutu ii un cáhán suhva:

Nájnūhun lanchi jeē cuahán tī nuū cúu tī, súcuan ni casáha ñayuu jíin yá.

Te nájnūhun ñin londe quiti sáte jeē tu dáhyú tī, súcuan ni sáha ya,

chi tú na vé ni cáhán cuiti yā ná ni cajicān i cuēchi síquī yā.

³³Te hora jeē ní cajēhe i jnūhun canu yā, tu ní casáha ndaā i síquī yā jíin jnúhun ndaā, te ni cajehni i ya ini ñayivi yáha. Te coo cuehē ñayuu candije nuū yā jeē ma cánda ni ñin ñayuu cahu i ñayuu ún.

Achí.

³⁴Yūcuán na te ni cahān tēe Etiopía un:

Cava vāha ni ní cachi ni núu ná, ¿ndé síquī cahán tēe ni nacani jnūhun yáha? ¿A síquī maá de chí síquī ínga tēe? achí de jíin Felipe.

³⁵Yūcuán na te ni nacani Felipe jnūhun vāha Jesús nuū tēe ún, chi ni quejé de ni castūhún de jnūhun jeē ní cahu tēe ún, jíin táca gá jnūhun jeē yosó núu tútu yā.

³⁶Te níni cuāngoo de ichi ún te ni jinūcoo de nuū ñūhun ndute, te ni cahān tēe Etiopía:

Yāha ñūhun ndute ¿te á tú cuu cuandute ná? achí de.

³⁷Te ni cahān Felipe:

Cuu te núu cándíje nīhin ni ndé jíin ini jíin ánuá ni táca jéē ni sáha Jítoho yō Jesús jehē yō, achí de.

Te ni cahān tēe Etiopía:

Cándíje ná jéē Jesucristo cúu máá Séhe Yaā Dios, achí de.

³⁸Te ni sáha de jeē na jécuiñī carreta de, te ni nuu ndíndúu de cuangoo de ichi véyí núu ñūhun ndute ún, te ni scuándute Felipe tēe Etiopía. ³⁹Te nuū ní quendacoo de nuū ndúte, te Espíritu máá Jítoho yō ni sáha ya jeē ní ndoñhún-ni Felipe. Te tēe Etiopía vēsú tuá ni jíto de nuū Felipe, te cúsiñi ni de cuahān de. ⁴⁰Te ni nane Felipe ñuu Azoto. Te nácani de jñūhun ndese jnáma ya ñayuu, cuahān de táca ñuu nde ni jinū de Cesarea.

Jeē ní nasāma ini Saulo ni sáha Jesucristo

(Hch. 22.6-16; 26.12-18)

9 Te Saulo chi máni cáhán de jeē cáhni de táca ñayuu cáncandíje i máá Jítoho yō, te jeē yúcuan ní jehēn de nuū sutú cujéhnu ga. ²Te ni jicān de carta jeē cahán jeē quihín de táca vehe ñi sinagoga ñuu Damasco te cuhni de tēe ñahan jeē cáncandíje i Jesús, quiji de jíin i ñuu Jerusalén nuú. ³Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēē ñi luz nuū de. ⁴Te ni cotúu-ni de nuū ñūhun, te ni jini sōho de ñi jñūhun cáhán jíin de:

Saulo, Saulo, ¿najeheé jíto xeēn rō ruhū? achí.

⁵Te ni cahān máá de:

¿Na nihín cúu jeē cahán, Tátā?

Te ni cahān yā jíin de:

Máá rí cúu Jesús, te jeē jíto xeēn rō ñayuu cáncandíje i ruhū cúu jeē jíto xeēn rō ruhū. Te jeē sáha rō súcuan cúu nájnūhun stiquī jeē tu jéndíje ti te jéñú yatá tí xinī pulla, te súcuan stóho ti máá tí, achí yá.

⁶Te máá de chi quísi i de jeē yūhú de, te ni cahān de:

Tátā, ¿na vé cuní ni jéē sáha ná núu súcuan? achí de.

Te ni cahān máá Jítoho yō jíin de: Ndocuiñī, quívi rō ini ñuu, te yūcuan íyó ñi tēe jeē cachi nuū rō na vé cúu jeē cánuú sáha rō, achí yá.

⁷Te tēe cuangoo jíin Saulo, ni canaa ndasí ni de cájini sōho de ndusu jeē cahán, te tu ní cájito cuiti de nuū jeē cahán un. ⁸Yūcuán na te ni ndocuñī Saulo. Te ni nducú de coto de, te tuá cúu coto de, te ni cajñi tēe ún ndaha de ni jinūcoo jíin de nde ini ñuu Damasco. ⁹Te yūcuan ní condee de unī quivī. Te tu ní cúu cuiti coto de, ni tú na vé ni yéji de, ni tú na vé ni jíhi de.

¹⁰Te ñuu Damasco néne ñi tēe cáncandíje, nání de Ananías. Te máá Jítoho yō ni steén ndijin ya máá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní sáña, Tátā, achí de.

¹¹Te ni cahān máá Jítoho yō jíin de:

Quihin ichi te quihin rō calle jeē naní Calle Derecha, te vehe Judas cajñūhun rō ñi tēe nání Saulo ñuu Tarso, chi jicán tahu de. ¹²Te nájnūhun ni jito ndijin de jeē máá rō, Ananías, ni jinū rō, te ni soó rō ndaha rō xíní de, te ni nanune tinūú de, achí yá.

¹³Yūcuán na te ni cahān Ananías:

Tátā, cuehē ñayuu cácahān jeē tée yúcuán yóhō jíto xeēn de ñayuu cácaandíje i níhín ñuu Jerusalén.

¹⁴Te vijna ni quee de yāhá, chi sutū cácujeñhu ni catejníñu de vēji de jñi de tāca ñayuu cácahān ndahú i jíin ní, áchí de.

¹⁵Te ni cahān maá Jítoho yō jíin de:

Cuáhán, chi máá rí ni nacāji tēe un jēē quihīn de nacani de jñuhun rí nuū tāca ñayuu nación Israel jíin núu ñayuu tāca gá nación nde jíin núu tāca rey. ¹⁶Chi stēen rí nuū de jeē cánuú ndoho de cuehē jñūdóho jeē siquí rí, achí yá.

¹⁷Yūcuán na te cuahān Ananías.

Te ni quiví de ini vehe nuū néne Saulo, te ni soó de ndaha de xiní Saulo, te ni cahān de:

Hermano Saulo, maá Jítoho yō Jesús, Yaā ní quenda ndijin nuū ní ichi jeē vēji ní, ni tají yá sñāna vēji ná núu ni návāha na nánune tinūu ní, te návāha na cúnuú Espíritu Santo yā jíin ní, áchí de.

¹⁸Te ni nanune-ni tinūu Saulo, chi ni nungoo-ni nájnūhun soō chācá ní condihyū tinūú de ún. Te ni ndocuññ de ni jendute de.

¹⁹Yūcuán na te ni nacaji de staā, te ni nanihīn ni de. Te ni condee de jecu quiví jíin tēe cácaandíje jeē cáyūcú ini ñuu Damasco.

Jeē ní nacani Saulo jñuhun ini ñuu Damasco

²⁰Te ni quejéé-ni de nacani de jñuhun Jesús ini tācá vehe i sinagoga, áchí de jeē Jesús cúu Sēhe Yaā Dios. ²¹Te tāca ñayuu ni cajini sōho jñuhun cáhán de ni canaa ni i, te ni cacahān i:

¿A násūu tēe yāha cúu jeē yóhō jíto xeēn de tāca ñayuu Jerusalén jeē cájicān tahú nuū Jesús? Te siquí yúcuán ní quee de yāha jēē cúhni de ñayuu cácaandíje, te quihīn de jíin i nuū sutū cácujeñhu núu, áchí i.

²²Te víhyá gā ni nacani Saulo jñuhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú ñuu Damasco, tu ní cánihīn de modo cahān de jeē tu íyō ndáa jeē cahán Saulo.

Jeē ni cácu Saulo nuū jnáhan de hebreo

²³Te ni yāha cuehē quiví. Te jnáhan de hebreo ni casquíjnáhan jñuhun de jeē cáhni de Saulo. ²⁴Te ni nihīn Saulo jñuhun jeē cándito de nduú ñuú tāca yéhyí pared jeē ní condūu ndihyú ñuu ún. ²⁵Yūcuán na te iñ jecuāa te tēe cácaandíje ni caquihīn de Saulo, te ini iñ jica cáhnu ni cascúun de Saulo jicā pared ún, te súcuán ni cácu de.

Jeē ní najinū Saulo ñuu Jerusalén

²⁶Te nuū ní najinū de ñuu Jerusalén, te cúní de najnáhan de jíin tēe cácaandíje. Te ni cayūhu tēe un ní cajito de Saulo, chi tu ní cácaandíje de jeē ní nduu Saulo tēe cándíje nuū Jesús. ²⁷Te Bernabé cuahān de jíin Saulo nuū cáyūcu tēe apóstol, te ni nacani de jñuhun nuū tēe ún ndese ni jini Saulo nuū maá Jítoho yō ichi nuū cuahán de, jíin jēē ni cáhān yā jíin de, jíin jēē jéñhu-ni ni nacani de jñuhun Jesús ini ñuu Damasco. ²⁸Te ni condee Saulo ñuu Jerusalén ni jica de jíin tāca tēe apóstol. ²⁹Te jéñhu-ni ni

nacani de jnūhun máá Jítoho yō. Te jnáhan űuu de hebreo jeē cácahān yuhu griego, ni castáhān jnáhan jíin de, te máá tēe un cácuni de cahni de Saulo. ³⁰Te ni cajini tācá hermano cácaandíje, te ni cajendēca de Saulo nde űuu Cesarea. Te yūcuan ní canatají de Saulo cuanuhun de nde űuu de Tarso.

³¹Te űayuu cácaandíje Jesús jeē cáyūcú Judea jíin Galilea jíin Samaria, tuá ni cájito xeēn űayuu i. Te ni ije ga i jíin jnúhun ya, te cándiso iyo i nuū máá Jítoho yō. Te Espíritu Santo ni chindéé űáhán yá i te ni nducuehē gā i.

Jeē ní nduvāha Eneas

³²Te tāca lado jécondēhe Pedro űayuu cácaandíje, te suni ni jecondēhé de űayuu cácaandíje cáyūcú űuu Lida. ³³Te yūcuan ní jini de nuū ĩin tēe nání Eneas jeē ní cuu unā cuiyā cáa de chi ni ĩjin de.

³⁴Te ni cahān Pedro jíin de:

Eneas, Jesucristo cúu Yaá nasāvāha ya rohó. Ndocuĩĩ te natuu rō yuu ró, áchí de.

Te ni ndocuĩĩ-ni tēe ún. ³⁵Te tāca űáyuu cáyūcú űuu Lida jíin ndúhvā Sarón ni cajito i jeē ní nacaca Eneas, te ni casquéndōo i tāca jnúhun jeē tu íyó ndáa te ni cacandíje i máá Jítoho yō.

Jeē ní natecu Dorcas

³⁶Te nde űuu Jope ni iyo ĩin űahan cándíje, nání űa Tabita, te nuū yúhu griego nání űa Dorcas. Te űahan yáha máni jniñu váha ni sáha űa, te ni sáha űa caridad ni chindéé űáhán űa űayuu cúmani nuū. ³⁷Te tiempo yūcuan ní quejéé

cuéhyi jíin űa, te ni jihí űa. Te ni cascúchi i ndíyi ún, te ni cajequin i ndíyi un ndé ini cuarto xiní véhe.

³⁸Te yajni íne űuu Lida jíin űuu Jope, te tēe cácaandíje űuu Jope ni cajini jnūhun de jeē néne Pedro űuu Lida, te ni catají de uū tēe cuacana de Pedro, te ni cacahān de:

Ma cucuéé ní na quíhín yachí yō űuu Jope, achí de.

³⁹Yūcuán na te ni quihin Pedro ichi cuahān de jíin tēe ún. Te nuū ni jínū de, te ni cacoo tēe un jíin de nde xiní véhe nuū catú ndíyi ún. Te tācá űahan viuda ni candicó ndúū űa de cándahyū űa, te cástéén űa tācá sahma jíin tícāchi jēe ni sáha Dorcas te ni saja űa nde na técu űa. ⁴⁰Yūcuán na te ni ndacu Pedro jniñu jeē na quéndacoo ndíhi űayuu ún quingoo i nde yatā véhe. Te ni jecuiñĩ yit̄ de ni jicān tahu de, te ni nandió cóto de nuū catú ndíyi ún, te ni cahān de:

Tabita, ndocuĩĩ ní, áchí de.

Te máá űa ni ndacoto-ni űa te ni jito űa nuū Pedro, te ni nucōo-ni űa. ⁴¹Te ni jniñ de ndaha űa, te ni ndonehen de űa. Yūcuán na te ni nacana de xiní űáyuu cácaandíje nde jíin űahan viuda ni ndīvicoo i, te ni steén de űa nuū i jeē ní natecu űa. ⁴²Te ni jitē jnūhun jniñu yáha nñ űuu Jope cuahān, te cuehē űayuu ni cacandíje i jnūhun máá Jítoho yō. ⁴³Te cuehē quivĩ ni ndōo Pedro ini űuu Jope, néne de vehe ĩin tēe sáha curtir ñi, nání de Simón.

Pedro jíin Cornelio

10 Te ini űuu Cesarea ni iyo ĩin tēe nání Cornelio, ni cuu de capitán grupo soldado jeē

naní Italiano. ²Te cúu de tēe ndíso iyo nuū Yaā Dios nde jíin ndíhi ñayuu vehe de, te yōhyo caridad ni tēe cúu de, chí jéhe de xūhun núū ñáyuu hebreo cándoho ndáhú, vēsú nasūu tēe hebreo cúu de. Te níní jícán tahu de nuū Yaā Dios. ³Te ñin quivī ni steén ndíjin yā nuū tēe yáha nájnūhun cahunī jehíni, te ni jito de jeē ñin ndajéhé maá Yáā Dios ni quivī ya nuū néne de. Te ni cahān yā jíin de:

Cornelio, achí yá.

⁴Te maá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tátā? achí de.

Te ni cahān yā jíin de:

Je chíhi Yaā Dios cuenta jeē jícán tahu rō jíin jēe sáha ró caridad.

⁵Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de.

⁶Chi néne núu de vehe toçayo de Simón, tēe sáha curtir ñiñi, te ndéé vehe ún yajni yumar. Te maá de castūhun núū rō na vé cúu inga jeē cánuu sáhá ró, achí ndajéhé yā.

⁷Te ndajéhé yā jeē ni cáhān jíin Cornelio, cuahān-ni ya. Te ni cana de uū mozo de jíin ñin soldado jeē yíñúhún núū Yaā Dios, chí cúcáhnú ni de jeē squícu vāha tēe ún. ⁸Te ni nacani ndíhi de jnūhun nuū tāca tēe ún, te ni tají de cuangoo nde ñuu Jope.

⁹Te inga quivī un cájica de ichi cuangoo de, te cuacuyajni de ñuu Jope. Te je yajni cahuxí uū cúu, te suu hora un ní caa Pedro siquī véhe chí cándaā, te yūcuan cácan tahu de. ¹⁰Te ni quee sōco chíji de, te ni cuni de caji de staā. Te sáá casáha

ña ndeyu te ni steén ndíjin yā nuū de. ¹¹Te ni jito de jeē núne andiví. Te ni jito de nájnūhun ñin sahma manta jité cáhnú te núhní jnáhan ndicúún punta, te ni cuun vēji nuū de. ¹²Te chíji un cáñūhun ndinuū quití, tācá quití cúún ndaha jíin táca cóo jíin táca quití cándava. ¹³Te ni jini sōho de ñin jnūhun ni cahān:

Pedro, ndocuiñi te cahni rō tācá quití jñā, te caji rō tí, achí.

¹⁴Te ni cahān Pedro:

Ma cáji na, Tátā, chí tu yéji cuiti na táca quití jeē cahán ley ni jéé tú vāha caji na tí, chí nájnūhun jeē tu cáhīyo ndoo tí nuū ní, achí de.

¹⁵Te ni cahān tucu jnūhun un jíin de:

Achí rí jeē iyó vāha caji rō tācá quití jñā, chí ni sándoo ri, te ma cahán maá ró jeē tu cáhīyo ndoo tí, achí. Te súcuan ni steén caji yá nuū de jeē cúu quihín de nuū ñáyuu vēsú násūu jnáhan ñuu de hebreo cúu.

¹⁶Te unī jínu ni cahān súcuan jíin de. Te sahma un ní ndaa cuanuhun andiví. ¹⁷Te níní nácani ndasí ni Pedro na vé cuní cahān jeē ní jito ndíjin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. ¹⁸Te cácahān jee de cácajnūhún de núu yūcuan ndéé Simón jeē suni nání de Pedro. ¹⁹Te níní nácani ga ni Pedro siquī jeē ní jito ndíjin de ún, te Espíritu Santo ni cahān yā jíin de:

Ni quecoo unī tēe cánanducú róhó. ²⁰Ndocuiñi te nanuu ró, te ma cáni ni rō jeē tú vāha quihín rō jíin de, vēsú nasūu jnáhan ñuu rō

hebreo cácuu de, chi máá rí ni tají rí de vējicoo de, áchí yá.

²¹Yūcuán na te ni nanuu Pedro nuū tēe ni tají Cornelio, te ni cahān de:

Máá ná cúu tēe cánanducú ní.

¿Te na síquī vējicoo ní núū na núu súcuan? áchí de.

²²Te ni cacahān mozo un:

Cornelio, tēe cúu capitán, ni tají de sãñá. Te tēe ndaā, tēe ndíso iyo nuū Yaā Dios cúu de, te tāca ñáyuu hebreo suni cácahān i jeē tēe vāha cúu de. Te ni cahān iin ndajéhé yā jíin de jeē na cána de níhín jeē ní vehe de te chusóhó de jnūhun cahān ni jíin de.

²³Yūcuán na te ni cahān Pedro jíin mozo un jeē na cúcōo de ini vehe ún, te ni candōo de yūcuán. Te nuū ní cundijin, te ni quihin Pedro ichi cuahān de jíin mozo un. Te suni cuangoo jecu hermano cácaandíje ñuu Jope jíin de.

²⁴Te nde inga quivī ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de tāca jnāhan de jíin táca amigo de jeē quijnāhan vāha ga de jíin. ²⁵Te nuū ni jíin Pedro jijnāhan de, te ni quenda Cornelio ni cahān de jíin Pedro, te ni jecuiñī yití de jeē chiñúhún de Pedro nuú. ²⁶Te Pedro ni ndonehen de Cornelio, te ni cahān de:

Ndocuiñī ní, chi sãñá suni iin tēe-ni cúu ná, áchí de.

²⁷Te cándajnūhún de ni quivícoo de ini vehe. Te ni jito Pedro jeē cáyūcu cuéhé ñáyuu ini vehe de.

²⁸Te ni cahān Pedro jíin ñáyuu ún:

Je cájini vāha ni jijnāhan ní jeē ley jeē cánevāha sãña ñáyuu hebreo,

cáhán jeē tú vāha jeē quijnāhan ná jíin ní quivícoo ná vehe ní síquī jeē cúu ní ñáyuu síin nación. Te Yaā Dios chi ni steén yā nuū na jéé ma cujéé ni na núū ní iin ñáyuu. ²⁹Jeē yúcuán cúu jeē vēji-ni ná, chi ni cana ní sãña, te tu ní sájéé ni ná. Te na cájnūhun ná nihín, ¿na síquī ni cana ní sãña? áchí Pedro.

³⁰Yūcuán na te ni cahān Cornelio:

Vijna íyó cúūn quivī nájñūhun máá hora yáha jeē cúu cahūni jehíni, te ndite ni ná chi súcuan chíñúhún ná nuū yā, te jícán tahu na ini vehe ná. Te ni quiji iin ndajéhé yā nuū ná, te ndíndéé sahma ñúhun ya. ³¹Te ni cahān yā jíin ná: Cornelio, je ni jini sōho Yaā Dios jeē jicán tahu rō, te chíhi ya cuenta jeē sáha ró caridad. ³²Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ñii, te yajni yumar ndeé vehe de. Te quee tēe ún te castúhún de nuū rō jñūhun cánuú, áchí yá jíin ná.

³³Súcuan ni cuu te ni tají-ni ná mozo na cuajēcoo de cana de níhín, te na cútahū ná, chi vāha ni sáha ní jeé véji ní. Te vijna ni candutútú ná yāha návāha tāca ná cuni sōho ná ndihi jñūhun Jitoho yō Yaā Dios jeē ni jéhe ya cahān ní, áchí de.

Jeē ní nacani Pedro jñūhun ya vehe Cornelio

³⁴Yūcuán na te ni cahān Pedro:

Vijna te ni jini vāha ná jeé Yaā Dios inuú-ni sáha ya jíin táca ñáyuu, cúu ñáyuu hebreo jíin ñáyuu tāca gá nación. ³⁵Chi cúsiñi ni yā jíin

ñáyuu tācá-ni nación núu cándiso iyo i nuū ya te cásáha i jniñu ndaā. ³⁶Chi ni cahān yā jín ñáyuu Israel jeē ndávicoo tāca ñáyuu nuū jnúhun manī yā jín i sáha Jesucristo. Te máá yá cúu Jitoho tāca yóhó. ³⁷Máá ní je cájini ní ndese ni cuu. Chi ná ni jínu ni nacani Juan jnúhun jín jéē ni scuándute de ñayuu, te ni quejéé Jesús nácani ya jnúhun nde Galilea, te ni jitē jnúhun un ní cáhnu Judea. ³⁸Te cájini ni jéē Yaā Dios ni jēhe ya Espíritu Santo jín poder nuū Jesús, Yaā ní jehnu ñuu Nazaret. Te cájini ni jéē ní jica cuu ya ni sáha ya jniñu váha, te ni nasávāha ya tāca ñáyuu jeē cándoho i sáha jexeén, chi Yaā Dios ni chindéé ñáhán yá Jesús. ³⁹Chi máá ná canacani cájí ná jnúhun tācá jniñu ní cajito ná ní sáha ya ní cáhnu Judea jín ini ñuu Jerusalén. Yūcuán na te ni cajehni i ya, chi ni cata caa i ya jicā cruz. ⁴⁰Te Yaā Dios ni nastécu yā maá Jesús nuū uní quivī, te ni ndiji ya nuū na ní cajito ná núu yā ni sáha Yaā Dios. ⁴¹Te tu ní quíji ya nuū tācá inga ñayuu, chi nuū maá-ni tāca ná jeē jé ni nacāji Yaā Dios sāña jéē nácani ná jnúhun tācá jniñu jeē ní cajito ná. Chi ni cayejí na stāā ni cajihí ná ndute jín yá ná ni nane ya jeē ní natecu yā. ⁴²Te ni ndacu ya jniñu nuū na jínáhan ná jéē na nácani ná jnúhun ya nuū tāca ñáyuu te cahān cají ná jeē maá Yāā Dios ni jeni ya Jesús jeē sándaā yā jniñu ñayuu cátecu jín ñáyuu ní cajihí. ⁴³Chi jnúhun Jesús cúu jeē ní cacahān tāca téē ni canacani jnúhun Yaā Dios nde jenahán. Chi ni cacahān de jeē tāca ñáyuu jeē candíje i

Jesús, cone cáhnu ni yā nuū cuéchi i, áchí Pedro.

Jeē ni quívi Espíritu Santo ini anuá ñayuu jeē násūú hebreo cácuu

⁴⁴Te níni cáhán gā Pedro tāca jnúhun yáha te ni quívi-ni Espíritu Santo ini anuá tāca ñáyuu cájini nahín jnúhun ya jeē cahān de. ⁴⁵Te tēe hebreo jeē ni jínūcoo jín Pedro jeē suni cácandíje de Jesús, nahán ní canaa ni de ni cajito de jeē suni ni quívi Espíritu Santo ini anuá ñayuu jeē násūú hebreo cácuu.

⁴⁶Chi ni cajini sōho de cácahān ñayuu un sín yuhu, te cácahān i jeē yōhyo cújéhnu Yaā Dios.

⁴⁷Yūcuán na te ni cahān Pedro:

¿Ndé ñin casi jeē ma cuándute ñayuu yáha? Chi ni quívi Espíritu Santo ini anuá maá i, nájnūhun ni quívi ya ini anuá maá yó, áchí de.

⁴⁸Te ni cahān de jín i jeē na cuándute i siquī jeē ní cacandíje i Jesucristo. Yūcuán na te ni cacahān ndahú i jín Pedro jeē na quéndōo de jecu quivī jín i.

Jeē ní nacuāha Pedro cuenta nuū ñáyuu cácandíje ini ñuu Jerusalén

11 Te tēe apóstol jín táca hermano cáyūcú Judea, ni canihín de jnúhun jeē súní ñayuu sín nación ni cacandíje i jnúhun Yaā Dios.

²Te cuanuhun Pedro ñuu Jerusalén. Te sava tēe hebreo jeē cácandíje de ya ni cacahān de nuū Pedro:

³¿Najehē ni condee ní vehe ñayuu jeē násūu ñayuu nación yō cúu? Te ni yeji ní jín i, áchí.

⁴Yūcuán na te ni nacani cájí Pedro jnúhun nuū téē ún ndíhi ndese ni cuu siquī téē sín nación:

⁵Néne ná ñuu Jope. Te níní jícán tahu na, te ni steén ndijin yā nuū ná, te ni jito ná nájñuhun iin sahma manta jité cáhnu jeē nuhní jnáhan ndicúun punta, te nde ichi ándiví ní cuun ni quiji nuū ná. ⁶Te ni jito vāha ná, te ni jini na jéē chíji un cáñuhun quití cúun ndaha jíin quití xéén jíin cóo jíin quití cándava. ⁷Te ni jini sōho ná iin jñuhun ni cahān jíin ná: Pedro, ndocuiñi te cahni rō tācá quití jiñā, te caji rō tī, áchí jíini ná. ⁸Te ni cahān ná: Ma caji na, Tātā, chi tu yéji cuiti na táca quití jeē cahán ley ni jéē tu cáhīyo ndoo tī nuū ní, áchí ná. ⁹Yūcuán na te jñuhun jeē véji nde andiví ní cahān tucu jíin ná: Ni sándoo máá rí tī, te ma cahán gā rō jeē tu cáhīyo ndoo tī, áchí jíini ná. ¹⁰Te unī jínu ni cahān súcuan. Yūcuán na te ni ndaa sahma un cuánuhun andiví. ¹¹Te hora un ní jinūcoo unī tēe vehe nuū ni cóndee ná un, cánanducú de sãñá, te iin jnáhan ñuu de Cesarea ni tají de vējicoo de. ¹²Te máá Espíritu ni cahān yā jíin ná jeē ma cáni ni na jéē tú vāha quihīn na jíin de. Te suni iñū hermano yáha ní jengoo jíin ná, te ni quivicoo ná ini vehe tēe nání Cornelio. ¹³Te tēe un ní nacani de jñuhun nuū na jíjnáhan ná jéē ní jito de iin ndajéhe Yaā Dios, índichi yā ini vehe de, te ni cahān yā jíin de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de. ¹⁴Te tēe ún cachi de nuū rō ndese jnama Yaā Dios rohó jíin ndíhi ñayuu cáyūcú vehe ró, áchí yá. Achí Cornelio jíin ná. ¹⁵Te nuū ní quejéé ná cahán na, te ni quivi-ni Espíritu Santo ini anuá i jíjnáhan

i, nájñuhun ni quivi ya ini anuá maá yó xihna gā. ¹⁶Yūcuán na te ni nucūhun ni na jñuhun ni cahān maá Jítoho yō: Jendaá jeē maá ndute-ni ni scuándute Juan ñayuu. Te rōhó jíjnáhan ró chí nájñuhun cuandute ró jíin Espíritu Santo, cúu jeē cóndee yā ini anuá rō, áchí yá. ¹⁷Te suni ni jēhe Yaā Dios Espíritu yā nuū maá i nájñuhun ni jēhe ya nuū maá yó jeē cácanđije yó Jítoho yō Jesucristo. Núu súcuan ¿te ndé iin cúu ná jéē cási ná jniñu jeē sáha Yaā Dios? áchí Pedro.

¹⁸Súcuan ni cajini sōho de jñuhun yáha, te tuá ni cácahān de nuū Pedro, chi sa suhva ni cacahān de jeē yóhoyo cújéhnú Yaā Dios. Te ni cacahān de:

Suni ni jēhe Yaā Dios jñuhun jeē na nácani ni ñayuu táca gá nación jeē stóo i cuēchi i návāha cotecu i níí cáni núu súcuan, áchí de.

Ñayuu cácanđije ini ñuu Antioquía

¹⁹Te quiví ní cajehni de Esteban ni quejéé de cájito xeēn de ñayuu cácanđije, te jeē yúcuan ní cajitē núu ñayuu un táca ñuu cuangoo i, te ni jinūcoo i Fenicia jíin Chipre jíin ñuu Antioquía. Te ni canacani i jñuhun vāha ya nuū máni jnáhan hebreo i jeē cáyūcu yúcuan, te tu ní canacani i jñuhun ya nuū ínga ñayuu. ²⁰Te jecu tēe cácanđije jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñayuu táca nación jeē tu cájini i jñuhun ya ni canacani de jñuhun máá Jítoho yō Jesús jeē jnáma ya i. ²¹Te máá Jítoho yō ni chindéé ñáhán yá de, te cuehē ñayuu ni castóo i jniñu jeē tu íyó ndáa te ni cacandije i máá Jítoho yō.

²²Te ñayuu cácanđíje ini ñuu Jerusalén ni cajini jñuhun i, te ni catají i Bernabé cuahān de nde ñuu Antioquía. ²³Te nuū ni jíñū Bernabé yūcuán, te ni jini de jeē yóhyo vāha ni sáha Yaā Dios jíñ i, te ni cusih ndasí ni de. Te ni stihví ni de tāca ñáyuu un jéē jíñ ini jíñ ánuá i na cóndihvī ni i squícu vāha i nuū maá Jítóho yō, te ma náyūhú i. ²⁴Chi tēē vāha cúu Bernabé, te ni cunuú Espíritu Santo jíñ de, te cándíje nihin de. Te ni cacandíje cuehē ñayuu nuū maá Jítóho yō ni sáha de.

²⁵Yūcuán na te cuahān de nde ñuu Tarso cuananducú de Saulo. Te ni nanihin jnáhan de jíñ Saulo, te ndéca de tēē un ní ndee de ñuu Antioquía. ²⁶Te ní in cuiyā ni candutútu de jíñ ñayuu cácanđíje yūcuán, te ni castéén de jñuhun ya nuū cuehē ñayuu. Te ñuu Antioquía cúu nuū xíhna ñúhún gá ni caconaní ñayuu cristiano siquī jeē ní cacandíje i Cristo.

²⁷Te suni tiempo un ní quendacoo tēē cánacani jñuhun Yaā Dios ñuu Jerusalén cuangoo de nde ñuu Antioquía. ²⁸Te in jnáhan de jeē naní Agabo ni ndocuiñi nuū hermano cácanđíje. Te ni steén Espíritu Santo nuū de, te ni castūhún de jeē cóo in jnamā xeēn ní cáhnu. Te ni cuu jnamā ún in parte tiempo jeē ní ndacu Claudio jniñu jeē ní cuu de rey. ²⁹Yūcuán na te ni candajnūhun tēē cácanđíje ñuu Antioquía jeē cuáha in in de nasaa canda de cuāha de te tají de quihin cotecu hermano cáyūcú Judea. ³⁰Te súcuan ni casáha de. Te ni catají de Bernabé jíñ Saulo ni

cajendēca de nuū tēē jéhnu cándiso jniñu nuū ñayuu cácanđíje cáyūcú Judea.

Jeē ní jehni Herodes Jacobo, te ni chune de Pedro vecāa

12 Te suu tiempo un ní quejéé rey Herodes jíto xeēn de sava ñayuu cácanđíje. ²Te ni ndacu de jniñu jeē jíñ espada na cáhni i Jacobo ñani Juan. ³Te ni jini de jeē ní cacusiñ ni tēē hebreo jeē ni sáha de súcuan, te jeē yúcuan suni ni jniñ de Pedro. Te máá quivī un ní cuu vico jeē yéji ñayuu pan jeē tu yíhi levadura. ⁴Te nuū ní jniñ de Pedro, te ni chune de vecāa, te ni jeni de cuñ grupo soldado jeē cóndito Pedro, cuñ cuñ soldado cúu jeē in in grupo. Chi cúní Herodes jeē na yáha vico un jéē cúu vico pascua te quenehen de Pedro vecāa un stéén de nuū ñayuu cuehē. ⁵Te súcuan íne Pedro vecāa, te cándito soldado un de. Te ñayuu cácanđíje chi nihin ni cajicān tahú i jehé Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

⁶Te jéni ni Herodes jeē na cúndijin inga quivī te quenehen de Pedro vecāa, te stéén de nuū ñayuu un núú. Te núhni Pedro jíñ úu cadena, cátu de quíxi de mēhñu úu soldado jecuáa ún, te suni cáhiin ga soldado cándito yéhyí vecāa ún. ⁷Te suu jecuáa ún te sanaa-ni te ni jinū in ndajéhé maá Jítóho yō, te ni ndindēé ini vecāa. Te ni squfhi ya Pedro, te ni natahū ni de. Te ni cahān yā:

Yachī ndocuiñi rō, achí yá.

Te cadena nuhní ndaha de un ní canandajī-ni. ⁸Te ni cahān ndajéhé yā jiín de:

Nacuhni nihin chíji ró, te nuquīhi ró ndjēn rō, achí yá.

Te súcuan ni sáha de. Te ni cahān tucu ndajéhé yā jiín de:

Condii ticāchi ró, te condiquīn rō ruhū na quíhín yō, achí yá.

⁹Te ni quenda de ndíquín de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jiín de, chí jéni ni de jeē iin jeē ni stéén yā jító ndijin de cúu. ¹⁰Te ni yāha ya jíin de uū nuū cándito soldado. Te ni jinū yā jíin de yéhyí cáa nuū quénda de caca de calle, te yéhyí un ní nune iī-ni máá. Te ni quenda ya jíin de, te ni yāha de iin calle cuahān de. Yūcuán na te ni cujiyo-ni ndajéhé yā nuū de cuahān yā. ¹¹Te ni nducájí ni Pedro te ni cahān maá ní cahān iin de:

Vijna te ni jini ndaā rī jeē ní tají máá Jítóho rī ndajéhé yā ni quiji, te ni jnama ya ruhū nuū Herodes jíin núu tāca ñáyuu hebreo jeē cácuni i sáha xeēn i jíin rí nuú, achí de.

¹²Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuan cáhiin tútú cuéhē ñayuu cájicān tahu i jehē Pedro. ¹³Te cáhán Pedro ni jinū de yéhyí fuera, te iin sūchi síhí nání Rode cuahān i jeē cúni i núu ndé iin cúu jeē cahán. ¹⁴Te ni nacuni i tachí Pedro, te jeē ní cusīi ni i te tu ní núne i yéhyí un, chí ni nandió cóo i te jínu i ni ndīvi i ini cuarto. Te ni castūhún i jeē ní quee Pedro índichi de yéhyí fuera. ¹⁵Te ni cacahān jíin i:

Jeē cahán neé ró, achí.

Te máá i nihin cáhán i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu súcuan, achí.

¹⁶Te víhyá gā cahán Pedro.

Yūcuán na te ni canune i yéhyí, te ni canacuni i nuū de, te nahán ní canaa ni i cájito i. ¹⁷Te máá de ni sáha de ndaha de jeē ma cúvaā gā i, te ni castūhún de ndese ni quenehen máá Jítóho yō de vecāa. Te ni cahān de:

Castūhun núu Jacobo jíin núu tāca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

¹⁸Te nuū ní cundijin, te ni cacuvaā teyí soldado jeē tuá Pedro.

¹⁹Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jíhī Herodes

²⁰Te yōhyo ni quitī ni rey Herodes nuū ñáyuu ñuu Tiro jíin ñuu Sidón. Te ñayuu un ní candajnūhún i jeē inuú-ni quívicoo ndīhi i nuū rey un. Te ni casáha i amigo i jíin Blasto, tēe cújéhnu jéjnīnu nuū rey un. Te ni cacahān ndahú i jíin de jeē na cáhán ndahú de jíin rey un jéē na ndéē ni de jíin i. Chí nde ñuu maá rey un cájeen i jeē cáyeji i. ²¹Te ni jeni Herodes iin quivī. Te ni nucūhun de sahna yíñúhún de, te ni cucōo de mesa nuū ndácu de

jniñu, te ni cahān de iin jñuhun jehū ni cajini sōho i. ²²Te ñayuu un ní caquejéé i cácahān jee i jñuhun yíñuhún jíin de:

Nasūu tée-ni cúu ní, chi iin yaā cúu ní, áchí i jíjnāhan i.

²³Te máá hora un ní sáha-ni iin ndajéhé maá Jítóho yō jeē ní jniñi iin cuehyī xeēn rey Herodes, te ni cayeji tīndācú de, te ni jihí de, chi ni sandúxí-ni de máá de te tu ní cáhān de jeē Yaā Dios cúu jeē cujéhnū.

²⁴Te ni jītē gā jñuhun máá Jítóho yō, te cuehē ndasí ñayuu ni cacandíje i tēcā-ni lugar.

²⁵Te ni jīnu jniñu jeē ní quindeca Bernabé jíin Saulo jeē cótecu ñayuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

**Jeē ní caquejéé Bernabé jíin Saulo
caca cuu de nacani de jñuhun ya**

13 Te mēhñu grupo ñayuu cácanđíje ini ñuu Antioquía ni cahīyo tēe cástéén jíin tēe cánacani jñuhun Yaā Dios, te cánaní de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galílea. ²Te iin quivī jeē cáhīyo ndite ni tēe yáha cáchiñuhún de nuū maá Jítóho yō, te ni cahān maá Espíritu Santo jíin de:

Cúní rī jeē sasíin ró Bernabé jíin Saulo na quíngoo de jniñu jeē ní jeni ri de, áchí yá.

³Yūcuán na te ni cajicān tahú ndite ni de, te ni casoó de ndaha de xiní Bernabé jíin Saulo, te sūcuan ni

catají de ndíndúú tēe ún cuanacani de jñuhun nuū tāca ñáyuu.

**Jeē ní canacani Bernabé jíin
Saulo jñuhun ya nde Chipre**

⁴Te ni sáha Espíritu Santo jeē íchi ñúu Seleucia cuangoo de. Te yūcuan ní quivícoo de iin barco cuangoo de nde Chipre, ñuhun jeē íne sñin nuū ndúte. ⁵Te ni jinūcoo de ñuu Salamina nuū cájecuññi barco, te ni canacani de jñuhun Yaā Dios ini tēcā vehe iī sinagoga jnāhan hebreo de. Te suni cuahān Juan chindéé ñāhán jíin de. ⁶Te ni cajica nuu de nñí-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū íin tēe hebreo nání Barjesús. Te tēe tásí cúu de, te cáhān stahú de jeē íin tēe nácani jñuhun Yaā Dios cúu de. ⁷Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jñuhun Yaā Dios. ⁸Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún. ⁹Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un. ¹⁰Te ni cahān de:

Tēe sáha jniñu néé stahú ñāhán cúu ró, chi sēhe jexeén cúu ró te jési rō nuū tēcā jniñu ndaā. Te tu jécuiññi rō jeē sáca núu ró síquī jñuhun ndaā maá Jítóho yō návāha ma candíje ñayuu nuū yā. ¹¹Te máá Jítóho yō stóho ya rohó vijna, te cucuáá ró jeē ma cóto ga rō niāndii jecu quivī, achí Pablo.

Te ni cunee-ni nuū tēe tásí un, te quéndāha quéhíyú de cuahān de

ndúcú de ndé vé jnǎi ndaha de stéén ichi nuū de quinhun de. ¹²Yūcuán na te ni jini gobernador jeē súcuan ni cuu, te ni candíje de jnūhun máá Jítóho yō, te náā ni de jíní sōho de jnūhun ya.

**Jeē ní coyūcu Pablo jíin Bernabé
Antioquía ndañū Pisidia**

¹³Yūcuán na te ni quendacoo Pablo jíin Bernabé jíin Juan űnu Pafos, te ni quǐvicoo de barco te cuango de űnu Perge ndañū Panfilia. Te yūcuan ní cusǎin Juan, te cuanhun de űnu Jerusalén. ¹⁴Te ni quendacoo Pablo jíin Bernabé űnu Perge cuango de, te ni jinūcoo de űnu Antioquía ndañū Pisidia. Te quǐvǐ ndétātu ní quǐvicoo de ini vehe iǐ sinagoga, te ni cacucōo de. ¹⁵Te ni cahu tutu ley yā jíin tutu ní catee tēe ni canacani jnūhun ya nde jenahán. Yūcuán na te tēe cácujeǱhnu ini vehe iǐ sinagoga, vii-ni ni catajǐ de tēe cahán jíin Pablo jíin Bernabé:

Amigo, núu íyó jnūhun cahán ni jeē stihví ni ni ñáyuu yáha, te cahán ní na cúni nahín i núu súcuan, achí de.

¹⁶Yūcuán na te ni ndocuiñǐ Pablo te ni sáha de seña jíin ndaha de jeē nahín-ni coo ñáyuu ún, te ni cahán de:

Níhín jnáhan űnu yō Israel jíin níhín tēe jeē suni cáchiñúhún ní Yāā Dios, cuni nahín ní jijnáhan ní. ¹⁷Máá Yāā Dios yohó ñáyuu Israel, ni nacǎji ya jíí yō jijnáhan de. Te níí jeē cáyucu tátú de űnu Egipto, te ni sáha ya jeē ní nducuehē de. Yūcuán na te jíin poder maá yá ni quenehen ya de nación Egipto.

¹⁸Te uū xico cuiyā ni cajica de nuū ñūhun téhé, te ni jendeyí ni yā jíin de jeē ní castívi de. ¹⁹Te ni snáā yā uxā nación Canaán, te ni jēhe ya űnhun un núū tāca jíí yō cúu tahū de. ²⁰Yūcuán na te ni jeni ya tāca tēe ni candacu jniñu nuū de nájnūhun cuūn ciento uū xico uxǐ cuiyā, nde quǐvǐ ní cotecu Samuel, tēe ni nacani jnūhun ya. ²¹Yūcuán na te máá ñáyuu un ní cajicān i iǐn rey, te ni jeni Yāā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. ²²Te ni quenehen ya jniñu Saúl, te ni jeni ya David ni cuu de rey nuū i. Te ni cahán cajǐ yá jnūhun de: Cúsiǐ ni rǐ jíin David sēhe Isaí, chi sáha de tāca jeē cuní rǐ, achí yá.

²³Te cáhán gā Pablo:

Te sēhe yucūn David ni cacu Jesús, Yāā ní jeni Yāā Dios jeē jnáma ya yohó ñáyuu Israel, chi súcuan ni jejnūhun ya. ²⁴Te nde ná tu quejeé Jesús nacani ya jnūhun nuū ñáyuu, te ni nacani Juan jnūhun nuū tāca jnáhan űnu yō Israel jeē na nácani ni i jeē stóo i cuēchi i, te cuandute i. ²⁵Te nuū cuácuyajni jeē cúu Juan, te ni cahán de: Cándetu ró jeē quǐji Cristo, te jéni ni rō jeē ruhū cúu, te nasūu rǐ cúu. Chi quǐji ya, te cújeǱhnu ndasí yá jeē ni ndijēn yā tu cújeǱhnu rǐ tava rǐ, achí de.

²⁶Amigo jijnáhan ní, tāca níhín jeē cácuu yó sēhe yucūn Abraham jíin tāca níhín jeē suni cándiso iyo ní núu Yāā Dios, chi cúni Yāā Dios jeē na cúni yō jnūhun yáha jeē cáhán ndese jnáma ya yohó.

²⁷Chi tāca ñáyuu űnu Jerusalén

jiín táca tée cácujéhnu nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahan quivī ndétātu ní cajini sōho i jnūhun ni cacahu jeē ní catee tēe ni canacani jnūhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahán i jeē na cúu yā. Te súcuan ni casquícū i siquī táca jnūhun jeē ní cacahán tēe ni canacani jnūhun ya nde jenahán. ²⁸Vēsú tu ní cánihin i ni iin cuēchi siquī yā jeē cúu yā, te ni cacahán nihin i jíin Pilato jeē na cúu yā. ²⁹Te ná ni jinu ni squícū siquī yā táca jnūhun cáhán nuū tútu ii, te ni casnúu de ya jicā cruz, te ni cachindūji de ya iin yaū ní jete jicā cáva. ³⁰Te ni sáha Yaā Dios jeē ní natecu yā. ³¹Te ñayuu Galilea jeē ní jéngoo jíin yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñayuu un cácuu jeē cánacani cáji jnūhun ya nuū táca gá jnáhan yó hebreo vijna.

³²Te maá ná jijnáhan ná cánacani ná jnūhun vāha yáha núu ni jíjnáhan ní jēē súcuan ni jejnūhun ya nuū táca jíi yō. ³³Te jnūhun yáha ní squícū Yaā Dios nuū maá yó jeē cácuu yó séhe yucūn de, chi ni nastécu yā Jesús. Chi suhva cáhán salmo uū jeē cahán yā jíin Séhe ya Jesús: Máá ró cúu Séhe ri, te vijna ni sajéhnu ri rohó jēē cúu ri Tatá rō, achí yá. ³⁴Te ni nastécu yā Séhe ya Jesús návāha ma tehyú cuítī yā, chi suhva cáhán tutu ii jeē ni cáhán Yaā Dios nde jenahán: Te nihin maá ró táca jēē váha ni jejnūhun ri nuū David, achí. ³⁵Te

suní súcuan cáhán inga salmo jeē ní tee David jnūhun jeē cahán Jesús jíin Yáa Dios: Ma cuáha ni jnūhun tehyú ná, chi jéjniñu ná núu ní te maní ni jíin ná, achí. ³⁶Te David chi jíni yō jeē ní jejniñu de nuū ñáyuu ní cotecu de jíin, nájnūhun ni cuni Yaā Dios. Te ni jihí de, te ni quindūji de nájnūhun ni quindūji táca jíi yō, te ni tehyú de. ³⁷Te Jesús, Yaā ní nastécu Yaā Dios, chi tu ní téhyú cuítī yā. ³⁸Jeē yúcuan jíni ñuhún jecūhun ni ní, amigo, jeē Jesús cúu Yaā cóne cáhnu ni nuū táca cuéchi yó. ³⁹Chi ni canducú ní ndahva ni cuéchi ní jēē squícū ní ley jeē ni jéhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndahva ndihí cuéchi ñayuu jeē cácandíje i táca jēē ni sáha ya jehē i. ⁴⁰Núu súcuan te coto ní jíjnáhan ní jēē ma ndóho ní táca castigo jeē ní cacahán tēe ni canacani jnūhun Yaā Dios nde jenahán, chi suhva ni cahán Yaā Dios:

⁴¹Tāca rohó ñáyuu jeē casácatā, na cóto ró na castigo xeēn quiji siquī rō, te naa ni rō coto ró, te cuu rō. Chi tiempo maá ró te sáha ri jniñu xeēn jeē ma cándíje cuítī rō jeē súcuan sáha ri vēsú nacani ñayuu jnūhun un núu rō, achí yá.

Achí Pablo.

⁴²Te ni quendacoo Pablo jíin táca jnáhan de vehe ii sinagoga jnáhan hebreo de. Te ñayuu sfin nación ni cacahán ndahú i jíin de jeē inga quivī ndétátú nacani tucu de jnūhun yáha núu i. ⁴³Te ni

jitē ñayuu un cuángoo i. Te cuehē ñayuu hebreo jíin ñayuu sñin nación jeē ní cacandíje sahan hebreo te cáchiñúhún i nuū Yaā Dios, cuangoo i jíin Pablo jíin Bernabé. Te ni cacahān nihin de jíin i jeē na cuñi nihin i jíin jnúhun jeē maní Yaā Dios jíin i.

⁴⁴Te quivī ndétátú inga semana te je yajni ndíhi ñayuu ñuu un ní candutútú i jeē cúni nahín i jnúhun Yaā Dios. ⁴⁵Te nuū ní cajini tēe hebreo jeē ní candutútú cuéhē ñayuu, te ni cacucuésun ni de, te ni cacahān de jeē násūu jnúhun vāha cúu jeē steén Pablo, te ni cacahān neé de nuū Pablo. ⁴⁶Yūcuán na te jéhnun-ni ni cacahān Pablo jíin Bernabé, áchí de:

Cánuú jéē xíhna gā nuū maá ní jeē cácuu ní jnáhan ñuu yō hebreo nacani ná jnúhun Yaā Dios, te tu ní cájetáhú ní. Núu súcuan te cuēchi maá ní cúu jeē ma nihín tahú ni cotecu ni ní cáni. Te vijna te quinacani ná jnúhun ya nuū ñayuu tēcá nación jeē tu cájini i jnúhun ya. ⁴⁷Chi suhva ni ndacu maá Jítóho yō jniñu nuū na jíjnáhan ná:

Ni jeni ri rohó jéē cúu ró nájnúhun luz jeē steén ini anuá ñayuu tēcá nación, chi ní ñayīvi steén rō jnúhun ri nuū ñayuu jeē jnáma ri i, áchí yá.

Achí de.

⁴⁸Te ñayuu sñin nación, nuū ní cajini sōho i jnúhun yáha te ni cacusiñ teyí ni i. Te ni cacahān i jeē yōhyo vāha jnúhun cúu jnúhun maá Jítóho yō, te tēcá ñayuu jeē ní nacāji Yaā Dios i jeē cótecu i ní cáni, ni cacandíje i. ⁴⁹Te ni

jitē jnúhun maá Jítóho yō cuahān ní región yūcuán. ⁵⁰Te ñuu Antioquía cáyucú ñahan cácuu nuū te cáchiñúhún ña Yaā Dios. Te tēe hebreo ni cascáhán de ña, te suni ni cascáhán de tēe cácujeñnu ñuu ún, te ni cajito xeēn i Pablo jíin Bernabé te nde ni cascúnu i de cuangoo de. ⁵¹Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. ⁵²Te vēsú súcuan te ñayuu cacandíje un ní cunuú Espíritu Santo jíin i, te cácusīñ teyí ni i.

Jeē ní coyūcu Pablo jíin Bernabé ñuu Iconio

14 Te ñuu Iconio ni quivīcoo Pablo jíin Bernabé ini vehe i sinagoga jnáhan de hebreo. Te jíin jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñin nación ni cacandíje i. ²Te jnáhan de hebreo jeē tu ní cacandíje, ni cascáhán de ñayuu sñin nación, te ni cajeni ni i jeē násūu ñayuu vāha cácuu ñayuu cacandíje. ³Te ni caquendōo Pablo jíin Bernabé yūcuan cuéhē gā quivī. Te jéhnun-ni ni canacani de jnúhun Jítóho yō, chi cácucañnu ni de ya jeē vāha quihín jniñu un sáha ya. Te maá yá chi ni steén yā jeē iyó ndāá jnúhun jeē yóhyo vāha ni yā jíin i jeē canacani de, chi ni jēhe ya jeē sáha de jniñu jéhnun jeē steén jeē cujeñnu ya. ⁴Te ñayuu ñuu un ní cacusiñ ni i jíjnáhan i, sava i jíin tēe hebreo jeē tu cacandíje de Jesús, te sava ga i jíin tēe apóstol. ⁵Te ñayuu hebreo jíin ñayuu sñin nación jíin tēe cácuu tohō ni casquijnáhan jnúhun jeē

sáha xeēn jíin Pablo jíin Bernabé, jíin jéē cuáha yuū xinī de núú. ⁶Te ni cajini de jeē súcuan cáconi sáha, te ni cajinu de cuango de nde ñuu Litra jíin ñuu Derbe ndañúu Licaonia jíin táca ñuu yajni yūcuán. ⁷Te yūcuan ní canacani de jñuhun jeē jnáma ya yohó.

**Jeē ní cajēhe i yuū xinī
Pablo ini ñuu Litra**

⁸Te ñuu Litra néne iin tēe jeē tu cúu caca, te tu jíca cuiti de chi nde quivī ní cacu de cácójó de. ⁹Tēe un ní jini sōho de jñuhun jeē cahán Pablo, te ni jito vāha Pablo nuū de, te ni jini de jeē candíje vāha tēe un jéē ndúvāha de. ¹⁰Te ni cahán jee Pablo jíin de:

Ndocuiñī, condichi rō, achí de.

Te ni scánda tēe un máá de ni nucōndichi-ni de, te ni quejéé de caca de. ¹¹Te ni cajini ñayuu ún jniñu jéhu jeē ni sáha Pablo, te ni cacahán jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájnūhun cájica tēe, áchí i.

¹²Te ni cacahán i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jñuhun. ¹³Te yajni yuñúu un néne veñūhun yaā Júpiter. Te máá sūtū jejnīñu ini veñūhun un ní quihin de stiquī jijnáhan ti te ni scutú de ti ita te vēji de nde nuū quívī i yuñúu, te máá de jíin ñáyuu ñuu un cáconi de cahni de stiquī un sócō de nuū Bernabé jíin Pablo nuú. ¹⁴Te Bernabé jíin Pablo, tēe cácuu apóstol, ni cajito de jeē súcuan cáconi ñayuu un sáha i, te ni candatá de sahna de jeē steén

de jeē castívi ndasí i jeē casáha i súcuan. Te ni quenendava de ni quivícoo de mēhñu ñáyuu cuehē ún, te ni cacana jee de:

¹⁵Tátā jijnáhan ní, ma sáha cuiti ni súcuan, chi sáñá suni tēe-ni cácuu ná nájnūhun máá ní jijnáhan ní. Te vējicoo ná nacani ná jñuhun vāha Yaā Dios nuū ní, chi cahán na jíin ní jeē ma sáha ga ni táca jniñu yáha jéē tu ndé jéjnīñu cuiti, chi sa suhva na chíñúhún ní maá Yáā Dios, Yaā técu, Yaā ni sáha andívī jíin ñáyivī jíin ndute mar jíin táca gá jeē iyó hí cáhnu. ¹⁶Te nde jenahán ní jēhe ya jñuhun jeē na sáha táca ñáyuu modo cáconi maá i. ¹⁷Te vēsú súcuan te níní stéén yā ndese Yaā cúu ya, chi máni sáha ya jniñu vāha jíin yó, chi scúun ya saū, te sáha ya jeē cúu vāha itu yō, te jēhe ya jeē jíni ñúhún yó návāha caji yō te coo siñ ni yō, achí ndindúú de.

¹⁸Te vēsú súcuan ni cacahán de, te yōhyo uhū ni cajesí de nuū ñáyuu un návāha tú socō i stiquī un núú de jeē chíñúhún i ndindúú de.

¹⁹Yūcuán na te ni quecoo jecu tēe hebreo ñuu Antioquía jíin ñuu Iconio, te ni cascáhán de ñayuu cuehē ún, te ni cajēhe i yuū xinī Pablo. Te ni caquenehen i de yatā ñúú ún, chi ni cajeni ni i jeē jé ni jihí de. ²⁰Te tēe cácondíje ni cacondúú de Pablo, te ni ndondá Pablo, te ni ndívi de ini ñuu. Te ñga quivī ni quihin de ichi cuahán de jíin Bernabé nde ñuu Derbe.

²¹Te ini ñuu un ní canacani de jñuhun jeē jnáma ya ñayuu, te ni cacandíje cuehē ñayuu ni casáha de. Te ni canandicó de cuanhun de ñuu Litra jíin ñuu Iconio jíin

ñuu Antioquía. ²²Te ni cahije ga ni ñayuu cácanđije yūcuan ní casáha de. Te ni castíhvi ni de i jeē na cuíñi nihin i jíin jnúhun ya, chi ni cacahān de jeē niní quiji cuehē jnūndóho siquī yō te yūcuán na te jinū yō ñuu nuū ndácu Yaā Dios jniñu. ²³Te tēcá ñuu ni cajeni de tēe jéhnū cándiso jniñu condito de ñayuu cácanđije. Te ni cahiyō ndite ni Pablo jíin Bernabé nuū yā, te ni cajicān tahu de, te ni cacahān de jíin máá Jítóho yō jeē na cóto ya ñayuu ún chi cácanđije i máá yá.

Jeē cuánuhun tucu Pablo jíin Bernabé ñuu Antioquía ndañúu Siria

²⁴Te ni cayāha de cuango de región Pisidia, te ni najinūcoo de región Panfilia. ²⁵Te ni canacani de jnúhun ya ini ñuu Perge región Panfilia, te sáa te cuango de ñuu Atalia. ²⁶Te yūcuan ní quíivicoo de barco, te ni najinūcoo de ñuu Antioquía. Te ñuu yūcuan cúu nuū ní cajicān tahu ñayuu nuū Yaā Dios jehē de jeē na chindéé ñáhán yá de jeē quíngoo de nacani de jnúhun. Te ni jinu jniñu, te ni najinūcoo de ñuu ún. ²⁷Te nuū ní najinūcoo de yūcuán, te ni casáha de junta jíin ñáyuu cácanđije, te ni canacani de jnúhun tēcá ndese cuehē jeē váha ni sáha Yaā Dios jíin de, chi ni jéhe ya jnúhun jeē suni candíje ñayuu tēcá nación jeē tu ní cájini i jnúhun ya. ²⁸Te ni caquendōo de yūcuan cuehē quivī jíin ñáyuu cácanđije.

Siquī junta ñuu Jerusalén

15 Yūcuán na te jecu tēe Judea ni quijicoo de ñuu Antioquía, te ni castéén de nuū

tēcá hermano jeē núu tu sáha i circuncidar, nájnūhun cáhán ley jeē ni jéhe ya nuū Moisés, te tú na modo cācu i. ²Te Pablo jíin Bernabé ni catejñáhan de jíin tēe ún, te tu ní cūndaā. Te jeē yūcuan ní candajnūhún de jeē quíngoo Pablo jíin Bernabé jíin jecu gā tēe cácanđije un ndé ñuu Jerusalén, te yūcuán ndajnūhún de siquī jnúhun yáha jíin tēe cácuu apóstol jíin tēe jéhnū cándiso jniñu nuū ñáyuu cácanđije yūcuán.

³Te ñayuu cácanđije un ní canachuhun íchí i de. Te ni cayāha de ichi Fenicia jíin Samaria, te cánacani de jnúhun jeē suni ñayuu tēcá gá nación jeē tu ní cájini i jnúhun ya, ni castóo i jniñu jeē tu íyó ndáa te ni cacandíje i Yaā Dios. Te yōhyo ni cacusiñi ni tēcá hermano jeē ní canihin de jnúhun jeē súcuan ni cacandíje ñayuu ún.

⁴Te ni najinūcoo de ñuu Jerusalén, te ñayuu cácanđije yūcuan jíin tēe apóstol jíin tēe jéhnū cándiso jniñu nuū ñáyuu un, ní cacusiñi ni de jeē ní najinūcoo jnáhan de ún. Te Pablo jíin Bernabé ni canacani de tēcá jnúhun ndese cuehē jeē váha ni sáha ya siquī jniñu jeē ní canacani de jnúhun ya. ⁵Te sava tēe grupo fariseo jeē cácanđije ni candocuiñi te ni cacahān:

Ñayuu sáin nación jeē cácanđije i Jesús, jíni ñúhún jēe sáha i circuncidar nájnūhun cásáha máá yó, te cánuú ndacu yó jniñu nuū i jeē na squícu i ley jeē ni jéhe ya nuū Moisés, áchí.

⁶Te tēcá tēe apóstol jíin tēcá tēe jéhnū cándiso jniñu nuū ñáyuu cácanđije, ni candutútú de junta

návāha ndajnúhún de te sándaā de siquī jnúhun yáha. ⁷Te tācá de ni cacahān de ndese cájeni ni de. Yūcuán na te ni ndocuīñī Pedro, te ni cahān de:

Hermano jijnáhan ní, je cájini vāha ni jéē je íyó tiempo jeē ní nacāji Yaā Dios sāña jéē quihín na núū ñáyuu sīn nación te nacani ná jnúhun nuū i jeē jnáma ya i, návāha candíje i Jesucristo. ⁸Te Yaā Dios chi jíní yā ndese cáa ánuá ndíhi ñáyuu, te ni steén yā jeē jetáhú yá i, chi suni ni jēhe ya Espíritu Santo nuū i jijnáhan i, nájnūhun ni jēhe ya nuū maá yó. ⁹Te inuú-ni sáha ya jíin yó jíin máa i, chi siquī jeē suni ni cacandíje i jnúhun jeē jnáma ya i, te jeē yúcuán ní sándoo ya anuá i nuū tāca cuéchi i. ¹⁰Te vijna žnaun cácuani ní ndacu ní jniñu jeē na squícu i ley un? Chi tu nújnahan ni Yaā Dios jeē súcuán. Chi cácuani ní tee ní jniñu yíí yáha síquī ñáyuu cácuandíje ún, te ni tāca jíí yō tu ní cácuandeyí de squícu de, te ni máa yó. ¹¹Chi sa suhva cácuandíje yó jéē jnáma ya yohó súcuán-ni siquī jeē yóhyo vāha ni maá Jítóho yō Jesús jíin yó, te suni súcuán-ni jnáma ya maá i, nasūu síquī jeē squícu i ley un, áchí de.

¹²Yūcuán na te tēe cuehē un ní cacuu nayúú de, te ni cajini nahín de jnúhun cácahān Bernabé jíin Pablo. Chi ni cacastūhún de jeē ni jēhe ya poder jeē ní casáha de tācá jniñu jéhu jeē steén jeē cujéhu ya, ni cajito ñáyuu tācá nación jeē tu cájini i jnúhun ya. ¹³Te nuū ni jíinu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cáhán na. ¹⁴Ni nacani Simón

Pedro jnúhun ndese ni quejéé nuú jniñu jeē jnáma Yaā Dios ñáyuu tācá nación jeē tu cájini i jnúhun ya, chi suni mēhñu máa i nacāji ya ñáyuu jeē ndúu i ñáyuu maá yá.

¹⁵Te quíjnáhan jnúhun ni cahān de yáha jíin jnúhun ni catee tēe ni canacani jnúhun Yaā Dios nde jenahán jeē yosó nuū tútu ii:

¹⁶Achí Yáa Dios:

Nájnūhun ni cotúú vehe David cúu jeē tuá ndácu sēhe yucūn de jniñu,

nájnūhun ni ndacu máa de jniñu nde jenahán.

Te ñin quivī te ndee rī

te jeē nasáha ri vehe de cúu

jeē sáha ri jeē nandacu Sēhe yucūn de jniñu.

¹⁷Súcuán sáha ri návāha tāca gá ñáyuu na nánducú i ruhū nde jíin ñáyuu tācá nación jeē tu cájini jnúhun ri, tācá i jeē cána ri i candíje i ruhū.

¹⁸Súcuán cáhán maá Jítóho yō, te nde jenahán ní steén yā jnúhun yáha núū ñáyuu.

Achí tutu ii.

¹⁹Jeē yúcuán jéni ni na jéē ñáyuu tāca gá nación jeē ní castóo i jniñu jeē tu íyó ndáa te ni cacandíje i máa Yáa Dios, ma stáhān yō i jeē ndácu yó jniñu jeē squícu i ley Moisés. ²⁰Chi sa suhva na tēe yó carta quihín nuū i jeē ma cáji i ndeyu jeē ni sócō nuū ídolo, te ma cáca jnéni i, te ma cáji i cūñu quiti jeē jihí jeē tu jéti niñī tī, te ni ma cáji i niñī. ²¹Jnúhun yáha-ni tee yó quíhín nuū i nájnūhun je cástéén nde jenahán. Chi nde jenahán je íyó tēe cástéén jnúhun ley jeē ni jēhe ya nuū Moisés, te ndijnahan quivī

ndétātu cácahu de ley un ini vehe iī sinagoga tācá ñuu, áchí Jacobo.

²²Yūcuán na te tēe apóstol, jíin tēe jéhnū cándiso jníñu, jíin ndivii ñayuu cácañdije, ni cacundaā ni de jeē nácāji de tēe quingoo jíin Pablo jíin Bernabé nde ñuu Antioquía. Te tēe ni canacāji de un cácuu Silas jíin Judas, te inga síhví de cúu Barsabás. Te cándiso jníñu de nuū tācá hermano cácañdije. ²³Te ni cajendēca de carta jeē cahán suhva:

Máá ná cácuu tēe apóstol, jíin táca tēe jéhnū cándiso jníñu nuū ñáyuu cácañdije, jíin táca gá hermano yō. Te cátee ná carta yáha cuájeē nuū ni jíjnáhan ní, hermano, jeē cácuu ní ñáyuu síin nación jeē cáyūcu ní ñuu Antioquía jíin Siria jíin Cilicia. Cuandeyí ni ni jíjnáhan ní. ²⁴Ni cajini jnūhun ná jēē ní quendacoo sava jnáhan ná yáha ní jengoo nuū ní, te jíin jnúhun jeē ní cacahān de te ni casáha jeē ní canacani ndasí ni ní, te ni cacuxí ni ní, chi cándacu de jniñu jeē sáha ní circuncidar jíin jēē squícu ní jniñu cáhán ley jenahán jēē ni jéhe ya nuū Moisés. Te nasūu sáña ní cátají tēe un jēē jeé de nuū ní. ²⁵Jeē yúcuán ní cajeni ni ná, te inuú-ni ni cacundaā ni ná, te ni nacāji ná tēe cuajēcoo nuū ni jíin úu hermano yō jeē maní yō jíin, cúu Bernabé jíin Pablo. ²⁶Te ndíndúú de je ni catana de máá de nuū jnúndóho vēsú na cúu de jeē síquí jnūhun Jitoho yō Jesucristo. ²⁷Núu súcuán te cátají ná Judas jíin Silas jeē nuū ní, te suni nájnūhun cáhán carta yáha suni súcuán castūhún de nuū ni jíjnáhan ní. ²⁸Chi máá Espíritu Santo ni steén yā iin modo jeē ní

cacundaā ni na jēē ma tēe ná táca jniñu yíí ley Moisés síquí ní, chi máá-ni jniñu yáha jēē cánuú gá: ²⁹Ma cáji ni táca jēē ní casocō nuū ídolo, ni ma cáji ni níñi ni quiti jeē jihí jeē tu jéti niñi tī, te ma cáca jnéni ní. Te vāha squícu ní núu tuá sáha ní táca jēē yáha. Súcuán na cóo te sándeýí ni ní, áchí carta.

³⁰Yūcuán na te tēe quingoo un cuángoo de nde ñuu Antioquía. Te ni cacana de xiní ñáyuu cácañdije ni candutútú de junta, te ni cajēhe de carta un núu i. ³¹Te ni cacahu i, te ni candusií ni i jeē ni níñin i jnūhun ndeyí ni nuū carta ún. ³²Te suni tēe cánacani jnūhun Yaā Dios cácuu Judas jíin Silas, te jíin cuéhē jnūhun ni cacahān de te ni candundeyí ni tācá hermano un, te ni cahije ga ni i jíin jnúhun ya. ³³Te ni coyūcú de yūcuán jecu quiví. Yūcuán na te hermano yúcuán ní canacuatáhú i nuū de jeē quinhun de nuū tēe jeē ní catají de. ³⁴Te Silas ni nujnahan ni de ni quendōo de yūcuán. ³⁵Te suni ni caquendōo Pablo jíin Bernabé ñuu Antioquía, te máá de jíin sava ga tēe ni castéén de te ni canacani de jnūhun vāha máá Jítoho yō.

Jeē quihín Pablo inga jínu nacani de jnūhun ya

³⁶Te ni cuu ga quiví, te ni cahān Pablo jíin Bernabé:

Vijna te na quícondēhe yó tācá hermano yō ndíjnahan ñuu nuū ní nacani yó jnúhun máá Jítoho yō, na cóndēhe yó ndese cáhiyo i, áchí de.

³⁷Te Juan jeē suni nání de Marcos, cúní Bernabé jeē quihín tēe un jíin de. ³⁸Te tu ní cúní Pablo

jeē quihín tēe un jíin de, chi nde Panfilia ni cusíin Marcos nuū Pablo jíin Bernabé, chi tuá ni chindéé ñáhán de ndíndúú tēe un síquī jnínu ya nde saá. ³⁹Te nahán ní candajnúhun Pablo jíin Bernabé, te tu ní cácondaā ni de síquī Marcos, te ni cacusíin de. Te Bernabé ni jeca de Marcos, te ni quívicoo de barco cuangoo de nde Chipre, ñuhun jeē íne síin nuū ndúte. ⁴⁰Te Pablo ni nacāji de Silas quihín jíin de. Te tēcá hermano cácanđije ni cajicān tahu de nuū maá Jítoho yō jeē síquī jeē váha ni yā te na chindéé ñáhán yá Pablo. Te cuahān Silas jíin Pablo. ⁴¹Te ni cajica cuu de nńí Siria jíin Cilicia. Te tēcá grupo ñayuu cácanđije ni cahije ga ni i jíin jnúhun ya ni casáha de.

Jeē cuahán Timoteo jíin Pablo jíin Silas

16 Yūcuán na te saá te ni jinū Pablo jíin Silas ñuu Derbe jíin ñuu Listra. Te yūcuán néne ñin tēe suchí cándije, nání i Timoteo. Sēhe yíí ñin ñahan hebrea cúu i, te ñahan cándije cúu ña. Te tátá i chi tēe griego cúu de. ²Te tēcá hermano ñuu Listra jíin ñuu Iconio cájejnúhún de Timoteo. ³Te cúní Pablo condeca de Timoteo quihín de jíin i. Te ni cahān Pablo jeē quihín i cuu i circuncidar, chi tu cúní Pablo jeē cahān ñayuu hebreo jeē tu ní squícu Timoteo costumbre un, chi ndíhi ñayuu cájini i jeē tēe griego cúu tátá i. ⁴Te tēcá ñuu nuū cuángoo de te ni cacastúhún de nuū ñayuu cácanđije jeē na squícu i máá jnínu jeē ní casándaā tēe apóstol jíin táca tēe jéhnú cáyūcú

ñuu Jerusalén jeē cándiso jnínu nuū ñayuu cácanđije. ⁵Te ñayuu cácanđije ni cahije ga ni i. Te ndíjnahan quiví ni cacandije cuehē gā ñayuu.

Jeē ní jito ndijin Pablo ñin tēe ñuu Macedonia

⁶Te tu ní jéhe Espíritu Santo yā jnúhun jeē nácani de jnúhun ya nńí Asia. Jeē yūcuán ní cayāha de ichi Frigia jíin Galacia cuangoo de. ⁷Te ni jinūcoo de nuū quijnáhan Misia jíin Bitinia. Te cácani de quingoo de Bitinia, te máá Espíritu Jesús tu ní jéhe ya jnúhun quingoo de. ⁸Te ni cayāha de ñin lado Misia cuangoo de ñuu Troas jeē íne yajni yumar. ⁹Te ñin jecuáa te nájnúhun ñin jēni ni jito ndijin Pablo, te ni jito de jeē índichi ñin tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhán ní sāña jíjnáhan ná, áchí. ¹⁰Te súcuán ni jito ndijin de. Yūcuán na te sāña, Lucas, ni quijnáhan ná jíin de. Te ni casátúhva ná jíin de jíjnáhan de jeē quingoo ná Macedonia, chi ni cajini cají ná jeē maá Yáa Dios tájí yá sāña jíjnáhan ná jeē castúhun ná nuū ñayuu yūcuán jnúhun jnama ya i.

Jeē ní coyūcu Pablo jíin Silas ñuu Filipos

¹¹Te jíin barco ni quendacoo ná ñuu Troas, te cuangoo ndaā-ni ná ndé Samotracia, ñuhun jeē íne síin nuū ndúte. Te inga quiví ni jinūcoo ná ñuu Neápolis. ¹²Te yūcuán ní quendacoo ná, te ni jinūcoo ná ñuu Filipos jeē cúu ñuu cujéhnú

ga íne Macedonia, chi máá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quivī. ¹³Te iin quivī ndétātu ní quendacoo ná ñuu ún, te ni jengoo ná iin yuyúte, chi yūcuan cúu iin lugar nuū cájicān tahuñayuu. Te ni cacucōo ná, te ni canacani ná jnúhun ya nuū tãcá ñahan ní canataca yūcuán. ¹⁴Te iin ña nání Lidia jeē véji ña ñuu Tiatira, xíco ña sahma ndihí jéé yáhu ga ndeé. Te máá ña níní chíñuhún ña Yaā Dios. Te ni jini sōho ña jnúhun cánacani ná, te máá Jítóho yō Jesús ni sáha ya jeē ní candíje ña jnúhun jnáma ya ña jeē ní cáhān Pablo. ¹⁵Te ni jendute ña nde jíin ñáyuu cáyucú vehe ña, te ni cahān ndahú ña jíin ná:

Núu cácuáhnu ni ni jéé candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sãña jíjnáhan ná.

¹⁶Te iin quivī te cuangoo tucu ná suu lugar nuū jéngoo ñayuu cájicān tahuñ. Te ni canajnáhan ná jíin iin sūchi síhí jéé ñuhun tachí ini i, te máá un sáha jeē cahán i tãcá ndese coo te cúndaā jeē cahán i. Te sūchí un ní cajeen patrón i, návaha nihin de cuehē xūhun síquī jeē cástühún i nuū iin iin ñayuu ndese coo ichi núu. ¹⁷Te sūchí un ndíquín i sãña jíjnáhan ná cána jee i:

Tēe yáha cájéjñíñu de nuū Yaā Dios, Yaā cujéhnu téyí, te cácastühún de ndese cácu ní núu cuéchi ní jíjnáhan ní, áchí i.

¹⁸Te cuehē quivī ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder máá Jesucristo ndácu ri jniñu nuū rō jeē na quénda ró ini i quihin rō, achí de.

Te hora un ní quenda-ni cuahān.

¹⁹Yūcuán na te ni cajini patrón i jeē ma níhín gā i xūhún cuu de, te jeē yūcuan ní cajniñ de Pablo jíin Silas cuangoo jíin de nde vehe juzgado nuū cáyūcu tóhō. ²⁰Te ni cajeni ún de nuū juez, tēe cásandaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i. ²¹Te cájequin de inga costumbre jeē ma cúu cuatáhú cuiti yō, ni ma cúu sáha yó, chi tu jéhe ley nación yō jnúhun, chi ñayuu nación Roma cácuu yó, áchí.

²²Te suni ni candonda ñayuu síquī Pablo jíin Silas. Te tēe cácuu juez ni candacu de jniñu jeē na quénda sahma ndíndúu de te cani yujnu síquī de. ²³Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndíndúu tēe ún. ²⁴Te jeē súcuan ni tahuñ jniñu nuū tēe ndíto vecāa te ni squíví de Pablo jíin Silas nde ichi íni gā, te ni squíví jehē de t̄isin yujnu ndéé yaū te ni cajihni de.

²⁵Te nuū ní cuu sava ñuu, te cájicān tahuñ Pablo jíin Silas, te cájita de yaa ii nuū máá Yáā Dios. Te ñayuu cáhiin jíin de vecāa un ní cajini nahín i. ²⁶Te sanaa-ni te ni jnāa nihin téyí, te nde nuū cimientto vecāa un ní canda. Te ni canune-ni yéhyí vecāa ún, te ni canandají-ni cadena jeē cánuhní tãca ñáyuu ún. ²⁷Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni

de máá de núu, chi ni jeni ni de jeē ndivii cuiti ñayuu cáhiin vecāa un cuángoo i. ²⁸Te ni cana jee Pablo:

Ma cáhni ni máá ní, chi cáhiin ndihí ná, áchí de.

²⁹Yūcuán na te máá tée ndíto vecāa ni cana de jeē na quíndeca i ñuhūn, te yachí ni quívi de ini vecāa. Te ni jecuiñi yití de nuū Pablo jíin Silas, te quísi i de jeē yūhú de. ³⁰Te ni quenehen de Pablo jíin Silas, te ni cajñuhún de:

Tátā, ¿na vé cánuú sáha ná te jnama ya sãñá? áchí de.

³¹Te ni cacahān de jíin tée ún:

Candíje ní táca jéē ni sáha Jitoho yō Jesucristo jehē ní te cācu ní, te suni súcuan cācu ndihí ñayuu cáyūcú vehe ní, áchí de.

³²Te ni canacani de jñuhun máá Jitoho yō nuū tée un jíin núu táca ñáyuu cáyūcú vehe de. ³³Te suu máá jecuāá yúcuan ní nacate tēe ndíto vecāa un núu ní catují Pablo jíin Silas jeē ní cacani yujnu siquí de. Yūcuán na te ni jendute de jíin ndihí ñayuu cáyūcú vehe de. ³⁴Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusíi ni ndihí de vehe de jeē ní cacandíje de Yaā Dios.

³⁵Te nuū ní cundijin, te tēe cácuu juez ni catají de policía cuangoo jíin jñuhun jeē na siáá tēe ndíto vecāa un Pablo jíin Silas quingoo de. ³⁶Te tēe ndíto vecāa un ní castühún de jñuhun yáha núu Pablo:

Tēe cácuu juez ni catají de jñuhun vējí jeē na siáá na níhín quíngoo ní. Núu súcuan te quendacoo ní quíhín ní, te cuandeyí ni ní, áchí de.

³⁷Te ni cahān Pablo jíin policía:

Cuehē ñayuu ni cajito i jeē ní cacani de sãñá, te ni tu ní casándaā de xihna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná sēhe nación Roma, te iyó ley jeē ma cúu sáha súcuan jíin ñáyuu cácuu sēhe nación Roma. Te vijna íá quenehen sãhí de sãña cácuu de naún? Ma cúu cuiti. Na quícoo máá de quenehen de sãña jíin náhan ná, áchí Pablo.

³⁸Te ni canandió cóo policía ni castühún de jñuhun yáha núu tēe cácuu juez, te ni cayūhú de jeē ní cajini sōho de jñuhun jeē sēhe nación Roma cácuu Pablo jíin Silas.

³⁹Te ni quecoo tēe cácuu juez ún, te yōhyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. ⁴⁰Yūcuán na te ni quendacoo de vecāa, te ni jengoo tucu de vehe Lidia, te ni cacahān de jñuhun ndeyí ni jíin táca hermano. Te ni caquihin de ichi cuangoo de.

Jeē ní cacuvaā ñayuu Tesalónica

17 Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó iin vehe ií sinagoga jñahan de hebreo. ²Te ni coyicú de yúcuan úní semana, te táca quívi ndétātu jéhén Pablo vehe ií sinagoga, nájnūhun sáha sáha de, te ni nacani de jñuhun ya nuū tēe un. ³Te jíin jñuhun cáhán tutu ií ni steén de jeē súcuan ni jini núhún ndoho Cristo jeē cúu yā te natecu yā. Te ni cahān de:

Jñuhun nácani ná núu ni cúu jñuhun Jesús, te máá yá cúu Cristo,

Yaā ní jeni Yaā Dios jeē jnáma ya yohó, áchí de.

⁴Te ni cacandíje sava jnáhan de hebreo jíin cuéhē ñayuu griego jeē cáchiñúhún i Yaā Dios, jíin cuéhē ñahan cácuu nuū, te ni nduu inuú ni i jíin Pablo jíin Silas. ⁵Yūcuán na te yōhyo ni cacucuéśún ni jnáhan de hebreo jeē tu cacandíje, te ni castútú tée cunéé jéé cájica cúxí-ni, te ni quejéé cácana ndee cuangoo. Te súcuan ni casaca núu de xiní ñáyuu ñuu ún. Te ni jengoo de vehe Jasón cánanducú de Pablo jíin Silas jeē jñí de tēe un quíndēca de nuū ñáyuu cuehē. ⁶Te tu ní cánanihín de, te ni cañuhun de Jasón jíin sava ga hermano cuangoo de jíin núu tohó ñuu ún. Te jeē siquí Pablo jíin Silas ni cacana jee de:

Tēe jeē castívi xíní ñáyuu ní ñáyíví, je ni quecoo de nde yāhá. ⁷Te máá Jasón ni jēhe núu vehe cáyūcu tēe ún. Te tēe ún tu cájetáhú de ley maá rey yohó ñáyuu Roma, chí sa suhva cácahān de jeē cájetáhú de nuū inga rey jeē naní Jesús, achí de jíinánhan de.

⁸Te ñayuu jíin tēe cácuu tohó ni cajini sōho i jñuhun yáha, te ni cacuvaā i siquí. ⁹Te Jasón jíin táca gá hermano ni castóo de xūhún de, chí ni cacahān tohó un jíin de jeē nde núu tají de Pablo jíin Silas quíngoo de inga ñuu, yūcuán na te nacuāha tohó un xūhun de. Te súcuan te ni casiáá de Jasón jíin táca gá hermano cuangoo de.

Jeē ní coyūcu Pablo jíin Silas ñuu Berea

¹⁰Yūcuán na te tācá hermano un, yachí-ni ni cascáca de Pablo

jíin Silas jecuāā un, cuángoo de nde ñuu Berea. Te nuū ni jínūcoo de yūcuán, te ni quívicoo de vehe íi sinagoga jnáhan ñuu de hebreo. ¹¹Te jnáhan ñuu de hebreo cáyūcu yúcuán, vāha ga ni maá de vēśú jnáhan ñuu de hebreo cáyūcú ñuu Tesalónica, chí vāha ni cacusií ni de jíin jñuhun ni cacahān Pablo jíin Silas. Te ndíjnahan quívi cánanducú yúcuán de nuū tútu íi núu súcuan cáhān chí tuú. ¹²Jeē yúcuán ní cacandíje cuehē jnáhan ñuu de hebreo te suni nde jíin cuéhē ñayuu griego, cúu tēe cúu ñahan cácuu nuū. ¹³Te jnáhan ñuu de hebreo cáyūcú ñuu Tesalónica ni cajini jñuhun de jeē suni nde ñuu Berea nácani Pablo jñuhun Yaā Dios, te ni caquihin de ichi cuangoo de Berea, te suni yūcuán ní castónđa de ñayuu siquí Pablo. ¹⁴Yūcuán na te tācá hermano ni catají-ni de Pablo cuahān de nde yumar. Te ni ndōo Silas jíin Timoteo ñuu Berea. ¹⁵Te jecu hermano ni cajendēca de Pablo nde ñuu Atenas. Te ni cahān Pablo jíin de jeē cahān de jíin Silas jíin Timoteo jeē na quíngoo yachí de nuū Pablo. Te vendicoo de ñuu Berea.

Jeē ni íne Pablo ñuu Atenas

¹⁶Te níní ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñáyuu ñuu ún yōhyo cáchiñúhún i ídolo, te ni nacani cúfhyá ni de. ¹⁷Te ini vehe íi sinagoga ni cahān de jñuhun ya jíin jnáhan ñuu de hebreo jíin táca gá tēe cáchiñúhún Yáā Dios. Te suni táca quívi ni nacani de jñuhun ya nuū táca ñáyuu cáhiin nuū yáhu.

18 Te sava tēe cáscuáha jnūhun jeē castéén grupo epicúreo, jíin inga sava tēe cáscuáha jnūhun jeē castéén grupo estoico, ni caquejéé cácahān jíin Pablo. Te sava ni cacahān:

¿Na jnūhun cáhān tēe t̄lólhlé yāha? áchí.

Te sava ga de ni cacahān:

Tēe nácani jnūhun tāca yāā jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndáyí. 19 Te ni cajeca de Pablo cuango de, te ni jinūcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnūhun jeé jéé steén ní. 20 Chi cáhān ni jnūhun jeē ná tu cuni cuiti na jíjnáhan ná, te jeē yúcuan cácuni ná jecūhun ni na síquī tāca jnūhun yáha, áchí jíin de.

21 Chi tāca ñáyuu ñuu Atenas jíin tāca ñáyuu inga ñuu jeē cáyūcu núu i yūcuán, tuá na inga jniñu cácusī gā ni i jíin chi máá-ni jeē cuni nahín i jnūhun jeé chí jéé cahán i jnūhun jeé.

22 Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jíjnáhan ní, jíto ná jéé yóhyo cáchiñúhún ní yaā maá ní. 23 Chi ni jica nuu ná, te ni jecondēhe ná nuū jeē cáchiñúhún ní, te ni jito ná iin altar jeē yosó jnūhun yáha: Yāha cúu altar yaā jeē ná tu cuni yō jnūhun ya, achí. Te máá Yāā un jéé cáchiñúhún ní, vēsú ná tu cuni ni jnūhun ya, suu jnūhun Yaā un cúu jeē nácani ná núu ní vijna.

24 Chi Yaā un cúu Yaā jeē ni sáha ñayīvi jíin tāca ndihí jeē iyó, te máá yá cúu Jitoho andiví jíin ñayīví, te tu ndéé yá ini veñūhun cása ha ñayuu. 25 Te ni tu cúmani ni iin nuū yā jeē cuáha ñayuu nuū yā, chi máá yá sáha jeē técu ñayuu, jíin jéé stáa i tachí i, jíin jéé nihín i ndihí jeé jíni ñúhún i.

26 Te ni sáha ya jeē chíji iin-ni yucūn ni tahū tāca ñáyuu jeē ní nduu tācá nación, návāha coyūcú i ní cáhnu ñayīví, te ni tana yā cuiyā cotecu ñayuu jíin lugar coyūcú i jíjnáhan i. 27 Te súcuan ni sáha ya chí cúní yā jeē nanducú yó yā, chí núu nanducú yó yā te cuni yō jeē iyó yá, chí yajni-ni cúu ya jíin iin iin yó. 28 Chi máá yá sáha jeē iyó yó jíin jéé cátecu yō jíin jéé cácanda yō. Chi suni súcuan ni cacahān sava tēe ñuu ni jéé cātava yaa: Suni nde yucūn maá yá cácuu yó, áchí. 29 Te núu yucūn Yaā Dios cácuu yó, te ma cáni ni yō jeē ídolo oro chí plata chí yūu cúu ya, chí cájeni ni ñayuu jeē súcuan cáa ya, te súcuan cásvāha i ídolo. 30 Te ni jendeyí ni yā síquī jeē tu ní cájecūhun ni i ní ndé saá, te vijna chí ndácu ya jniñu jeē ñáyuu ní cáhnu ñayīví na nácani ni i jeē stóo i cuēchi i. 31 Chi Yaā Dios, je ni jeni ya quiví jeē ndaā sándaā yā síquī ñayuu ñayīví, te ni jeni ya Jesús jeē maá yá sándaā. Te je ni steén cají Yaā Dios nuū tāca ñáyuu jeē maá yá ni jeni Jesús, chí ni nastécu yā Jesús, achí Pablo. 32 Te jeē ní cajini sōho i jnūhun jeē nátecu ndiyí te sava i ni cacahān catá i, te sava ga i ni cacahān i: Vāha te núu cuu cuni sōho na jnūhun cáhān ni ndé inga jínu, áchí i.

³³Te ni quenda Pablo mēhñu ñáyuu un cuáhān de. ³⁴Te cuahān jecu ñayuu jíin Pablo, te ni cacandíje. Te iin de cúu Dionisio, tēe ndútútú jíin tēe cácujeñhu cásáha junta nuū naní Areópago, jíin iin ñahan naní Dámaris, jíin jecu gā i.

Jeē ni íne Pablo ñuu Corinto

18 Yūcuán na te ni quenda Pablo ñuu Atenas, te cuahān de nde ñuu Corinto. ²Te yūcuan ní jito de nuū iin jnáhan ñuu de hebreo, naní Aquila, te tēe región Ponto cúu de. Te sáá jecu-ni tiempo ni quee de jíin ñasihí de Priscila jeē ní quenda de Italia, chi rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyūcú de ñuu Corinto. ³Te suni jniñu sáha tēe un sáha Pablo, chi cáquicu de ñii cuu vehe. Te ni quendōo Pablo jíin tēe ún, te ni casájniñu de. ⁴Te tāca quívī ndétātu ní jehēn Pablo vehe i sinagoga ni nacani de jñuhun ya, te ni nducú ndéyí de jeē na cándíje ñayuu jñuhun Jesús, cúu jnáhan ñuu de hebreo jíin ñáyuu tācá nación jeē tu ní cájini i jñuhun ya.

⁵Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chi máni jñuhun ya nácani cájī de nuū ñáyuu cácuu jnáhan de hebreo, jeē maá Jesús cúu ya Cristo, Yaā jeē cáñuhun ni i quiji ya. ⁶Te ni caquejéé i ni cacahān i siquī jñuhun ún, te ni cacahān xeēn i nuū Pablo.

Te máa de ni caja de sahma de jeē cúu seña jeē stóo de i jíin cuéchi i, te ni cahān de jíin i:

Cuéchi máa ní cúu jeē jnahnū ndetū ni núu súcuan, te nasūu cuéchi máa ná cúu. Nde vijna te quihīn na núu ñáyuu tācá nación jeē tu cájini i jñuhun ya, te nacani ná jñuhun ya nuū i, áchí de.

⁷Te ni quenda de ini vehe i sinagoga, te ni jinū de vehe iin tēe naní Justo ni condee de. Te chíñuhún tēe un Yāā Dios, te vehe tēe un néne yajni xiin véhe i sinagoga. ⁸Te Crispo, tēe cújehnu ini vehe i sinagoga, ni candíje de máa Jítoho yō nde jíin ndihī ñayuu vehe de. Te cuehē ñayuu ñuu Corinto ni cajini nahín i jñuhun nácani Pablo, te ni cacandíje i, te ni cajendute i. ⁹Te iin jecuáā ni sáha máa Jítoho yō jeē ní jito ndijin Pablo yā ni cahān yā jíin de:

Ma yūhu ró ni ma cási rō yuhu ró, chi níní nacani ró jñuhun ri.

¹⁰Chi ndíto ri rohó, te ma cúu sáha xeēn ni iin ñayuu jíin ró. Nacani ró jñuhun ri, chi coo cuehē ñayuu candíje jñuhun ri ñuu yáha, áchí yá.

¹¹Te ni condee Pablo yūcuán iin cuiyā yosáva ni steén de jñuhun Yaā Dios nuū ñáyuu ún.

¹²Te ná cúu Galión gobernador Acaya, te ñayuu hebreo jeē cúu jnáhan ñuu Pablo, iin cáhnu-ni ni candonda i siquī Pablo. Te ni cajeca i de cuangoo i jíin de nde vehe juzgado. ¹³Te ni cacahān i jíin Galión:

Tēe yáha yōhyo scáhán de tāca ñáyuu jeē inga modo chíñuhún i Yaā Dios, suu iin modo jeē cúu contra siquī ley, achí i.

¹⁴Te quejéé Pablo cahān de núú, te ni cahān-ni Galión jíin ñáyuu hebreo un:

Ñayuu hebreo jijnáhan ró, núu iin cuēchi xeēn cúu, te cánuú cuni nahín rí jnúhun cácahān rō núú.

¹⁵Te tuú, chi máni siquī jnúhun-ni jíin síquī ley maá ró jíin síquī tée cástéén cúu. Te na sándaā maá ró síquī jníñu yáha, chi tu sándaā rí síquī maá iin jeē súcuan-ni, áchí de.

¹⁶Te ni cahān de nuū i jeē na quíngoo i fuera. ¹⁷Yūcuán na te ñayuu griego ni cajni i Sóstenes, tée cújéhnú ini vehe i sinagoga, te máá fuera yehyí vehe juzgado ni cacani i de, te Galión chi tu ní sáha cuiti de cuenta.

Jeē ní najinū Pablo ñuu Antioquía, te cuahān de vuelta uni jeē nacani de jnúhun ya

¹⁸Te cuehē gā quivī ni condee Pablo ñuu Corinto. Yūcuán na te ni nacuatáhú de nuū tācá hermano yúcuán, te Aquila jíin ñasihí de Priscila cuangoo de jíin Pablo, te ni jinūcoo de ñuu Cencrea. Te yūcuán ní saté lii Pablo xiní de, te súcuan stéén de jeē squícu de nuū Yaā Dios jeē ni jéjnúhun de. Te ni quívicoo de barco jíin Aquila jíin Priscila quihīn de región Siria. ¹⁹Te ni jinūcoo de ñuu Efeso, te yūcuán ní caquendōo Aquila jíin Priscila. Te ni jehēn-ni Pablo vehe i sinagoga, te ni cahān de jnúhun ya jíin jnáhan ñuu de hebreo jeē cándutútú yúcuán. ²⁰Te ni cacahān ndahú i jíin de jeē na cónēne de jecu gā quivī jíin i, te tu ní jéhe de jnúhun. ²¹Chi ni nacuatáhú de nuū i, te ni cahān de:

Cánuú jéē nuhūn ná ñuu Jerusalén cone ná vico. Te núu cúní Yaā Dios te ndee tucu ná núú ní, áchí de.

Te ni quenda de ñuu Efeso, te ni quivī de barco cuahān de. ²²Te ni jinū de ñuu Cesarea, te ni jehēn de ñuu Jerusalén. Te nuū ní ndihi ni cahān de jíin grupo ñayuu cácañdije yūcuán, te cuanuhun de ñuu Antioquía. ²³Te ni coyūcú de yūcuán jecu quivī, te sáá te ni quenda tucu de cuahān de ni jica cuu de hí Galacia jíin Frigia. Te ñayuu cácañdije ni cahije ga ni i jíin jnúhun ya ni sáha de.

Jeē ní nacani Apolos jnúhun Jesús ñuu Efeso

²⁴Te ñuu Efeso ni quee iin téē hebreo nání Apolos, te téē ñuu Alejandría cúu de. Te vāha nácani de jnúhun ya, chi vāha jíin de jnúhun jeē cahán tutu i. ²⁵Te je ni cutūhva vāha téē un jíin jnúhun máá Jítoho yō Jesús, vēsú jiní de máni máá jnúhun ya jeē ni stéén Juan ná ni scuándute de ñayuu, te ndíhví ni de stéén cají de jnúhun ya nuū ñáyuu. ²⁶Te jéhnú-ni ni nacani de jnúhun ya ini vehe i sinagoga. Te ni cajini sōho Aquila jíin Priscila jnúhun nácani de, te ni cajeca de Apolos cuangoo síin de, te ni cacastūhun yúcún ndindútú de jnúhun ya jeē ná tu cuni Apolos. ²⁷Te cúní Apolos quihīn de nde región Acaya. Te je cácañdije sava ñayuu yúcuán ní sáha Yaā Dios siquī jeē váha ni yā. Te tācá hermano ñuu Efeso ni cachindéé ñáhán i de, chi ni catee i carta quihīn de jíin núú ñáyuu cácañdije cáyūcú Acaya

jeē na cuatáhú i Apolos. Te nuū ni jínū de yūcuán, te vāha ni chindéé nāhán de tāca ñáyuu cácanđije un jín jnúhun ya. ²⁸Te nuū tāca ñáyuu ñuu un ndé jíin jnáhan ñuu de hebreo jeē cáyūcu yúcuán, ní steén cají de ndese cástívi tāca jnáhan hebreo de siquī jnúhun ya. Te tu ní cánihin jnáhan de un jnúhun cahān siquī jeē ni steén de, chí jíin jéē cahán tutu i ni steén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19 Te níní néne Apolos ñuu Corinto, te ni yāha Pablo ichi síquī ñuu Efeso, te ni nanuu de ni jinū de máá ñuu ún. Te yúcuán ní nijnáhan de jíin tijni tēe cácanđije. ²Te ni cajñūhún de tēe ún:

¿A ní canihīn ní Espíritu Santo ná ni cacandije ní, chí ná tuú? áchí de.

Te ni cacahān de jíin Pablo:

Tuú, chí ni ná tu nihīn na jnúhun jeē iyó Espíritu Santo, achí de.

³Yūcuán na te ni cahān Pablo:

¿Na siquī ni cajendute ní núu súcuán? áchí de.

Te ni cacahān de:

Ni cajendute ná síquī jnúhun ni steén Juan, achí de.

⁴Te ni cahān Pablo:

Jeē ní scuándute Juan ñayuu cúu jeē ni steén de jeē na nácani ni i jeē stóo i cuēchi i, te ni cahān de jeē na cándije i máá Yáa quiji jeē cúu Cristo Jesús, áchí Pablo.

⁵Te nuū ní cajini sōho tēe un jnúhun yáha, te ni cajendute de jeē ní cacandije de máá Jítóho yō Jesús.

⁶Te ni soó Pablo ndindúú ndaha

de xiní tāca tēe ún, te ni quīvi ni Espíritu Santo ini anuá de jíjnáhan de, te ni cacahān de sīn sīn yuhu te ni canacani de jnúhun ya. ⁷Te ni iyo nájnūhun uxī uū jnahán tēe.

⁸Te unī yoō ni jehēn jehēn Pablo vehe i sinagoga. Te jéhu ni nacani de jnúhun ya, te ni nducú ndéyí de jeē na cándije ñayuu jnúhun ndese ndácu Yaā Dios jniñu. ⁹Yūcuán na te sava i ni cacunihni ni i te tu ní cácanđije i, chí sa ni cacahān neé i siquī jnúhun vāha Yaā Dios jíin ñáyuu cánataca.

Jeē yúcuán ní cujiyo-ni Pablo nuū ñáyuu ún, te ñayuu cácanđije cuangoo i jíin de. Te ndijnahan quivī ni steén de nuū ñáyuu ún ini escuela iin tēe nání Tiranno. ¹⁰Te súcuán ni sáha de uū cuiyā, te tāca ñáyuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnúhun máá Jítóho yō Jesús. ¹¹Te ni jēhe Yaā Dios poder nuū Pablo jeē sáha de cuehē jniñu jéhu téyí. ¹²Te nde pañū jíin sahma jeē ní jñi de ni cajengoo jíin núu ñáyuu cácuñū, te ni canduvāha-ni i cuehyī cándoho i, te ni quendacoo tachī ini i cuangoo.

¹³Te jecu tēe hebreo cájica cuu de jeē quēnehen de tachī ini ñayuu, te ni cajeni siquī ni de jeē suni jíin poder maá Jítóho yō Jesús quēnehen de tachī, te suhva ni cacahān de jíin tāca táchi:

Jíin poder Jesús jeē nácani Pablo jnúhun ya, cáhán nihin ri jíin ró jeē na quénda ró quíhīn rō, achí de.

¹⁴Te súcuán ni casáha uxā sēhe yíi iin tēe hebreo nání Esceva, cúu de iin sutū cujéhu. ¹⁵Te ná ni casáha de, te ni cahān-ni tachī ún:

Je jíin rī Jesús, te suni jíin rī Pablo. Te róho jíjnáhan ró índé tēe

cácuu ró jéē cuatáhú rí rohó? áchí jín de.

¹⁶Te tēe ndóho tachī un ní ndonda de, te ni cundeyí de siquī ndihúxá tēe ún. Te ni sáha xeēn ndasí de jín ndé ni catujī te ni cacuvichí líi ni quendacoo vehe un ní cajinu cuangoo. ¹⁷Te jnūhun yáha ní cajini táca ñáyuu cáyūcú ini ñuu Efeso, cúu ñayuu hebreo cúu ñayuu táca gá nación, te yōhyo ni cayūhú i, te ni cacahān i jeē yōhyo cújéhnū máá Jítóho yō Jesús.

¹⁸Te cuehē ñayuu jeē ní cacandíje ni quijicoo i nuū Pablo ni nacani ndaā i jnūhun tēcá jniñu neé ní casáha i. ¹⁹Te cuehē i jeē ní casáha jniñu tási ní jinūcoo i cándiso i tutu i, te ni cajehmu i tutu un jito nuū táca ñáyuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu. ²⁰Te ni jitē jnūhun máá Jítóho yō cuahān, te ndihi ñayuu ni cajini i jeē cújéhnū ndasí jnūhun ya.

²¹Te nuū ní ndihi tēcá jniñu yáha, te jéni téyí ni Pablo jeē quihīn de Macedonia jín Acaya, te sáa te najinū de ñuu Jerusalén. Te ni cahān de jeē na najinū de ñuu Jerusalén, yūcuān na te jini ñūhún quihīn de nde ñuu Roma. ²²Te uū tēe jeē cáchindéé ñáhán jín Pablo cúu Timoteo jín Erasto, te ni scāndu de ndindúú tēe yāhá cuángoo de nde Macedonia, te ni quendōo máá de Asia jecu gā quivī.

Jeē ní cacuvaā ñayuu ñuu Efeso

²³Te suu quivī ún yōhyo ni candonda ñayuu siquī jnūhun ya.

²⁴Chí ni iyo iñ tēe sájniñu siquī plata, nání de Demetrio. Te máá

de jín ndihi tēe casájniñu jín de, cánihin de cuehē xūhún, chí jín plata casáha de vehe lulí jéē modo veñūhun ídolo i jeē cúu yaā Diana.

²⁵Te Demetrio ni nastútú de tēe casájniñu jín de jín táca gá tēe jeē suni jniñu yūcuan casáha, te ni cahān de:

Tátā, cájini ni jéē siquī jniñu casáha yó yáha vāha cánihin yō xūhún. ²⁶Te cájito ní te cájini sōho ní jéē iñ tēe nání Pablo chí cáhán de jeē násūu yāā cácuu jeē casáha ñayuu. Te je ni scandíje de cuehē ñayuu, nasūu máá iñ-ni ñuu Efeso yāhá chí ní cáhnu Asia. ²⁷Te quíyūhú ni na jéē cahān ñayuu jeē tu ndé jéjniñu jeē casáha yó. Te sanaa te suni súcuan cahān i coto i máá veñūhun yaā sihí Diana jeē cújéhnū, te suni sájéé ni i nuū yaā Diana, te ma cúu ga cújéhnū ya vēsú ndivii ñayuu Asia jín ñayuu ni cáhnu ñayivī cáchiñūhún i ya vijna, áchí de.

²⁸Súcuan ni cajini sōho de jnūhun yáha te yōhyo ni caquitī ni de, te ni cacana jee de:

Cújéhnū téyí Diana, yaā cúu patrona ñuu yō Efeso, achí de.

²⁹Te ñayuu ñuu Efeso ni cacuvaā i, te iñ cáhnu-ni ni candonda i ni cajniñi i Gayo jín Aristarco cuangoo i jín de nde vehe nuū cándutútú ñáyuu casáha i junta. Te ndindúú tēe un cácuu tēe Macedonia, te cájica de jín Pablo. ³⁰Te cúní Pablo quivī de nuū ñáyuu cuehē un cáhán de jín i, te ñayuu cacandíje tu ní cájēhe i jnūhun quihīn de. ³¹Te suni sava tohō jeē cácuu amigo de cáyūcu Asia, ni catajī jnūhun cuahān nuū de, cácahān ndahú

jíin de jeē ma quihín de nuū ní cacutútú ñáyuu ún. ³²Te ñayuu ní cacutútú un, sava i ni cacana jee i iin jnūhun te sava ga i inga jnūhun, te súcuan ni cacuvaā teyí i, te cuehē i ni tu cájini cuiti i na siquī cúu jeē ní cacutútú i. ³³Te sava tēe hebreo ni cajeni de iin jnáhan de jeē naní Alejandro nuū ñáyuu cuehē ún, te ni cacastūhún de nuū tēe ún na siquī cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayúú ñáyuu, chi cúní de cahān de jíin i jeē násūu cuéchi tāca ñáyuu hebreo cúu. ³⁴Te ni canacuni ñayuu un jéē tēe hebreo cúu de, te jeē yúcuan ní cacana jee téyí gá i nájnūhun uū hora:

Cújehnu téyí Diana, yaā cúu patrona ñuu yō Efeso, achí i.

³⁵Yūcuán na te ni cacunahín ñáyuu ni sáha tēe cúu secretario ñuu ún, te ni cahān de:

Níhín ñáyuu ñuu yō Efeso, ndihí ñayuu chi je cájini i jeē cándito vāha yó veñūhun yaā Diana jíin imagen Diana jeē ní ñinga nde andiví. ³⁶Te ni iin chi ma cúu cahān jeē tú ndaā jnūhun yáha. Núu súcuan te vāha ga na cási ní yuhu ní, te ma sáha yachí ní iin jeē tu ní nácani vāha ni ni síquī. ³⁷Chi tēe yáha ní caquindeca ní de yāhá vēsú tu ní cásáha de ni iin cuēchi siquī Diana yō, ni tu ní cacahān ndevāha de ni iin jnūhun siquī. ³⁸Te Demetrio jíin táca gá tēe jeē iin-ni jniñu cásáha jíin de, núu cáconi de cahān de cuēchi siquī iin tēe, te na quíngoo de nde vehe juzgado nuū cáyūcu juez, tēe cásándaā jniñu, te yūcuán cundaā

siquī de jíinánhan de. ³⁹Te núu íyó jnūhun jeē ma cúu cundaā yūcuán, te jíini ñūhún cundaā nuū iin junta nájnūhun tájnúní ley. ⁴⁰Chi yúhú ná jeē sanaa te cahān tāca tóhō Roma jeē siquī gobierno de ni candonda yó, chi ma nihín yō jnūhun castūhun yó na siquī cúu jeē ní cacutútú yó ni cacuvaā yō vijna, achí de.

⁴¹Te nuū ní ndihí ni cahān secretario jnūhun yáha, te ni cajitē ñayuu un cuángoo.

Jeē ni jéhēn Pablo Macedonia jíin Grecia

20 Te ná ni yāha jéē ní cacuvaā ñayuu, te ni cana Pablo ñayuu cácandíje, te ni jeni ichí de i. Te ni cañunundee jnáhan de jíin Pablo jeē ní nacuatáhú de, te cuahān de Macedonia. ²Te ni jica cuu de tācá ñuu yúcuan. Te jíin cuéhē jnūhun ni stihví ni de tācá hermano cácandíje. Te ni jinū de Grecia. ³Te ni condee de yúcuan úní yoō. Te je yajni quihín de jíin barco nde Siria nuú, te máá quívī ún te ni nihín de jnūhun jeē jnáhan ñuu de hebreo ni casquíjnáhan jnūhun jeē ndonda siquī de ichi nuū quihín de, te jeē yúcuan ní nacani ni de te cuahān tucu de ichi Macedonia. ⁴Te ni cahīyo sava tēe cájica jíin Pablo, te cánaní de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo. ⁵Te ni cacandu tēe yáha, te cándētu de Pablo jíin sáña, Lucas, nde ñuu Troas. ⁶Te nuū ni yáha vico jeē cáyeji i pan jeē tu yíhi levadura,

te jíin barco ni quendacoo ná ñuu Filipos, te nde nuū uhún quivī te ni canajnáhan ná jíin de nde ñuu Troas. Te ñuu yúcuan ní coyūcu ná uxā quivī.

Jeē ni íne Pablo ñuu Troas

⁷Te máá quívī domingo ni candutútú ñáyuu cácanđije jeē cáji i pan, nájnūhun ni steén maá Jítóho yō jeē núcūhun ni yō siquī yā. Te ni steén Pablo jnūhun nuū ñáyuu ún. Te siquī jeē inga quivī un jíni ñúhún quenda de quihín de, te nahán ní nacani de jnūhun nde ni cuñuú. ⁸Te vehe yósó jnáhan cúu vehe ún. Te nde cuarto xinī nuū ní candutútú ná un ní íyo cuehē lámpara ni cundijin. ⁹Te iin sūchi yíí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jíí i māhná, te ni quixī-ni i. Te nde piso unī un ní nīnga i nde nuū ñúhún. Te je ni jihī i ni candonehen de i. ¹⁰Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jíjnáhan ní, chi ni natecu i, áchí de.

¹¹Te ni ndaa Pablo, te ni yeji de pan jíin i jíjnáhan i jeē cánucūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de. ¹²Te Eutico chi íyó váha i cuanuhun i jíin de jíjnáhan de, te ndivii ñayuu ún yōhyo cácusii ni i.

Jeē ní quenda Pablo ñuu Troas cuahān de ñuu Mileto

¹³Te ni quivicoo ná ini barco cuangoo ná. Te Pablo chi cúní

de caca jéhé de, te ni cundaā jeē najnáhan ná jíin de nde ñuu Asón. ¹⁴Te nuū ní canajnáhan ná jíin de ñuu Asón, te ni quivī de barco te cuangoo ná jíin de nde ñuu Mitilene. ¹⁵Te yúcuan ní quendacoo tucu ná jíin barco te inga quivī ni jinūcoo ná xiin Quío, ñuhun jeē íne sáin nuū ndúte. Te quivī uní ni jinūcoo ná Samos jeē súni nuū ndúte íne, te ni caquendōo ná Trogilio. Te quivī cuún ni jinūcoo ná ñuu Mileto. ¹⁶Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihín de, návāha ma cucuéé de Asia te naa tiempo nuú, chi núú de jinū yachi de ñuu Jerusalén cone de máá quívī Pentecostés núu na cúu.

Jeē ní jeni ichí Pablo tē jéhnu cándiso jníñu nuū ñáyuu cácanđije ñuu Efeso

¹⁷Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quíjicoo tē jéhnu cándiso jníñu nuū ñáyuu cácanđije yūcuán. ¹⁸Te nuū ní quecoo tē ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. ¹⁹Chi níí tiempo jeē ni íne ná jíin ní te nde vijna, jéjníñu vāha na síquī jnúhun máá Jítóho yō, te tu ní sándúxí ná maá ná. Te íyó jínu ni ndahyū na jéhē ñáyuu. Te ni ndoho ná jnúndóho ni casáha jnáhan ñuu ná hebreo, chi ni casquíjnáhan jnūhun i siquī ná. ²⁰Te cájini ni jée tu ní táñúhún ná ni iin, vēsú ndese ga cácahān ñayuu siquī ná, chi ni nacani ná ndihi jnūhun ya jeē quéndōo vāha

ní sáha. Te ni steén na jnúhun ya nuū ni jínáhan ní, cúu nuū chitú cúu tāca vehe ní. ²¹Te inuú-ni jnúhun ni nacani ná núu ndihi ní, cúu jnáhan űuu ná hebreo cúu űayuu tāca gá nación, chi ni cahān na jēe na nácani ni ni jēe stóo ni cuéchi ní te na cándije ní máá Jítóho yō Jesucristo. ²²Te vijna chi űúhun ichí ná quihín ná űuu Jerusalén, chi stǵhví ni Espiritu Santo sǵna quihín ná. Te tu jíní ná ndese ga coo jíní ná yūcuán. ²³Te íyó ĩn jeē jiní na, cúu jeē chune i sǵná vecāa te quiji jnúndóho siquī ná, chi Espiritu Santo súcuan cáhán jíní ná ndijnahan űuu nuū jíca ná. ²⁴Te ni tu sáha ná cuenta vēsú na cáhni i sǵná, chi jeē cuní na cúu jeē na sínu vāha ná jniū jeē ní tee máá Jítóho yō Jesús siquī ná, te súcuan cusī ni ná. Te jniū un cúu jeē nácani ná jnúhun vāha ya nuū tāca űayuu ndese vāha ni Yaā Dios jíní yó.

²⁵Te je ni jica cuu ná, ní nacani ná jnúhun ya nuū ní ndese ndácu Yaā Dios jniū. Te vijna chi jíní na jēe ni ĩn ní ma najnáhan ga yō nuū űáyivi yáha. ²⁶Jeē yúcuán cástūhun cájí ná nuū ni jínáhan ní vijna jeē násūu cuéchi ná cúu núu ndé ĩn ní stǵvi. ²⁷Chi ni nacani ná núu ní ndihi jnúhun Yaā Dios jeē ni sándaā yā ndese coo, te tu ní quéndōo ni ĩn jnúhun. ²⁸Núu súcuan te coto vāha ní máá ní jíní ndihi űayuu cácandije, chi Espiritu Santo ni jeni ya nihín jēe cóndito ní űayuu maá Jítóho yō, chi ni nacuaan ya i jíní ní ĩn yā. ²⁹Chi jeē quihín na te jíní na jēe quijicoo tēe cástáhú quívicoo mēhūu ní, te nducú de snāa de

jnúhun ni cajetáhú űayuu cácandije, te xeēn sáha jnúhun stáhú de nájnūhun xeēn sáha yihī jeē cájehni tī lanchi. ³⁰Te suni nuū grupo maá ní quejéé sava de cahān de jnúhun stáhú, te stáhú de sava űayuu cácandije jeē na cóndiquin i jnúhun stáhú steén de. ³¹Jeē yúcuán condito ní jēe ma cóo súcuan. Te ma náa ni ni jēe uní cuiyā ndiquivī ndíñuu ni condihvī ndasí ni na ndé ndahyú na jéhē ni, ní jeni ichí ná ĩn ĩn ní jínáhan ní.

³²Te vijna, hermano, jícán tahú na núu Yaā Dios jeē coto ya nihín. Chi jnúhun jeē váha ni yā ndíso poder sáha jeē íje ga ni jíní, te suu sáha jeē ĩn quivī te cuāha ya tahū jeē ndujéhnu lúu ní ndé jíní ndihi űayuu ní nacāji ya jeē cóo ndoo coo ĩi i nuū yā. ³³Tu ní ndúcú ná jeē nihín na xúhun chí sahma nuū ní ĩn i. ³⁴Chi je cájini vāha ni jēe sa suhva ni sájniū nihín ná návāha nihín na jēe cótecu na ndé jíní táca tēe cájica jíní ná. ³⁵Te níni ní steén na núu ni jēe súcuan jíní űúhún sájniū yó návāha nihín yō jeē cuāha yó núu űayuu cúmanī nuū. Te ma náa ni ni jnúhun jeē ni cáhān maá Jítóho yō Jesús, chi suhva ni cahān yā: Ndetū gā quendōo yó jēe cuāha yó vēsú jeē nihín yō, achí yá. Achí Pablo.

³⁶Te ni ndihi ni cahān de tāca jnúhun yáha, te ni jecuiñī yití de, te ni jicān tahú de jíní ndihi tēe ún. ³⁷Yūcuán na te ndihi de ni cajecunundee jnáhan de jíní Pablo ni catechūhú de jeē cánacuatahú de, te ni candahyū de. ³⁸Chi cácuuíhyá ndasí ni de jíní jnúhun ni cahān Pablo jeē ma ndácoto

jnáhan ga de. Te cuangoo-ni de jín Pablo nde núu ín barco.

Jeē cuánuhun Pablo ñuu Jerusalén

21 Yūcuán na te ni caquendōo tācá hermano ñuu Efeso, te ni quívicoo ná barco, te cuangoo ndaā-ni ná ndé Cos. Te inga quivī ni jinūcoo ná Rodas, te yūcuan ní quendacoo ná te ni jinūcoo ná ñuu Pátara. ²Te ni cane iin barco jeē quihín Fenicia, te ni quívicoo ná cuángoo ná. ³Te nuū ní cajito ná núu Chipre jeē íne sñin nuū ndúte, te ni quendōo ichi lado jecó barco, chi ni cayāha ná cuángoo ná nde Siria. Te ni jinūcoo ná ñuu Tiro, chi yūcuan ndóo jeē ndíso barco ún. ⁴Te ni jenanducú ná ñayuu cácanđíje, te ni caquendōo ná jín i uxā quivī. Te máá Espíritu Santo ni steén nuū i jeē quíji jnūndóho siquī Pablo ñuu Jerusalén, te jeē yūcuan ní cacahān i jín de jeē ma quihín de. ⁵Te ni yāha uxā quivī ún, te ni quendacoo ná. Te tāca tée cácanđíje jín ñasihí de jín séhe de ni cachuhun ichí de sāña ní jengoo de jín ná nde yatā ñúu, te ni cajecuiñi yití ná jín de yumar te ni cajicān tahu na. ⁶Te ni cañunundee jnáhan ná ní canacuatáhú ná yūcuán, te ni quívicoo ná barco cuangoo ná. Te ni canandió cóo de cuanungoo de vehe de.

⁷Te ni quendacoo ná ñuu Tiro cuangoo ná jín barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jín táca hermano, te ni caquendōo ná jín de iin quivī. ⁸Te inga quivī un ní cajica jéhé ná jín Pablo, te ni jinūcoo ná ñuu

Cesarea, te ni quívicoo ná vehe Felipe, tēe nácani jnūhun vāha ya. Tēe un cúu jnáhan jeē ndihúxá tēe jeē ní casaja staā nuū ñáhan viuda. Te ni caquendōo ná jín de. ⁹Te tēe un íyó cúun séhe síhí de jeē cáhíyo máá i, te cánacani i jnūhun Yaā Dios. ¹⁰Te ni coyūcu ná yūcuán tijní quivī. Te ichi Judea ni quiji iin tēe nácani jnūhun Yaā Dios, nání de Agabo. ¹¹Te ni quee de nuū ná. Te ni quihin de sanchíi Pablo, te ni jihni de ndaha de jín jéhē de, te ni cahān de:

Suhva cáhán Espíritu Santo. Jnáhan yó hebreo súcuan cuhni i tēe chíi sanchíi yáha ini ñuu Jerusalén, te nastúu i de nuū ñayuu sñin nación, áchí de.

¹²Te jeē ní cajini sōho na jnūhun yáha te máá ná jín táca tée cácanđíje cáyūcú ñuu Cesarea ni cacahān ndahú ná jín Pablo jeē ma quihín de ñuu Jerusalén. ¹³Yūcuán na te ni cahān Pablo:

¿Najehē cándahyū ni jijnáhan ní, te casáha ní jéē cucuíhyá ni ná? Chi sāñá je íyó túhva ná jéē násūu máá jéē cónuhni ná ini ñuu Jerusalén, chi suni jeē vésú na cúu na jéē siquí maá Jítoho yō Jesús, áchí de.

¹⁴Te jeē tu ní cúu cuiti casicoo ná, yūcuán na te sa suhva ni cacahān ná:

Na cóo ndese cúní maá Jítoho yō nuu súcuan, áchí ná.

¹⁵Yūcuan na te sáá te ni casátühva ná, te cuangoo ná ñuu Jerusalén. ¹⁶Te suni jecu tēe ñuu Cesarea jeē cácanđíje cuangoo de jín ná. Suni cuahān iin tēe Chipre nání de Mnasón, te je ni cuu cuehē cuiyā candíje de. Te ná ni jinūcoo

ná ñuu Jerusalén, te ni cacoyūcu ná vehe de.

Jeē ni jécondēhe Pablo Jacobo

¹⁷Te nuū ni jínūcoo ná ñuu Jerusalén, te hermano cáyūcu ñuu ún yōhyo ni cacusī ni de jeē ni jínūcoo ná. ¹⁸Te inga quivī un ní cajengoo ná jíjnáhan ná jíin Pablo vehe Jacobo, te yūcuan ní candutútú táca tée jéhnū cándiso jníñu nuū ñayuu cácañdije. ¹⁹Te Pablo ni sáha de saludar tēe ún jíjnáhan de. Yūcuán na te ni castūhún de ndihī jniñu ní sáha Yaā Dios ná ni nacani de jñūhun ya nuū ñayuu tācá nación jeē tu cājini i jñūhun ya. ²⁰Te ni cajini sōho de jñūhun yáha, te ni cacahān de jeē yóhyo cújéhnū Yaā Dios. Te ni cacahān de jíin Pablo:

Hermano, vijna te jíni ni náa cuehē mil jnáhan ñuu yō hebreo ni cacandije i Jesús, te cácahān nihin i jeē cánuú squícu yó ley jeē ni jéhe ya nuū Moisés. ²¹Te ni canihin i jñūhun cácahān jeē stívi ní steén ni núu tāca jnáhan yó ñayuu hebreo cáyūcu jíca i tāca gá nación, chi ni steén ni núu i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i tāca gá jeē tajnúni jenahán. ²²¿Nde se sáha ní núu súcuan? Chi cuni ñayuu un jēē ní ndee ní te cutútú cuéhē i. ²³Suhva sáha ní núu súcuan. Yáha íyó cúun tēe jeē ní cajejnūhun de iin jeē squícu de nuū Yaā Dios. ²⁴Cueca ní tēe yáha quíhīn ni jíin de templo, te cuchī ní nasándoo ní máá ní jíin de nuū yā, te cuaan ní jeē socó de nuū Yaā Dios jijnáhan de. Yūcuán

na te cuu sāté de xinī de, te suu stéén jeē ní casquícu de ndihī jeē ní cajejnūhun de nuū yā. Yūcuán na te cuni ndihī ñayuu jeē tú ndaā tāca jñūhun ni cajini sōho i siquī ní, chi coto i jeē suni máá ní sa squícu ní ley yā. ²⁵Te ñayuu tācá nación jeē násūu ñayuu hebreo cácuu i te ni cacandije i ya, je ni catee ná carta cuahān nuū i jeē tu cánuú squícu i ley un, chi máá-ni jeē ma cāji i cūñu jeē ni sóco nuū ídolo ni niñī ni quiti jeē jihī jeē tu jéti niñī tī, te ni ma cáca jnéni i, áchí de.

Jeē ní cajniī de Pablo ini templo

²⁶Yūcuán na te ni jeca Pablo tēe ún, te inga quivī un ní cajichi de ni canasándoo de máá de nuū yā. Te ni quivī Pablo ini templo ni cachi de nuū sutú na quivī jínu jeē nasándoo tēe un máá de nuū yā, te quindeca de quiti jeē socó de nuū yā.

²⁷Yūcuán na te cácuu de jeē sínu de ndihúxá quivī jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndihī ñayuu, te ni cajniī i Pablo. ²⁸Te ni cacana jee i:

Tēe ñuu yō Israel, cuāha núu ní ndaha jíjnáhan ní na jniī yó tēe yáha. Chi máá de cúu tēe jíca cuu ní cáhnu stéén de nuū tāca ñayuu, te cáhán de siquī nación yō jíin síquī ley jeē ni jéhe ya nuū Moisés jíin síquī templo yáha. Te suni je ni quivícoo de jíin jecu tēe griego ini templo ii yáhá, te súcuan stívi de jñūhun ii jeē cahán jeē ma cúu quivī ñayuu ini templo te núu násūu ñayuu hebreo cúu i, áchí.

²⁹Chi nde na íne Pablo ini ñuu un ní cajini tēe hebreo jeē jíca de jíín Trófimo, tēe ñuu Efeso jeē násúú hebreo cúu de, te cájeni ni de jeē ní quívi tēe un jíín Pablo ini templo.

³⁰Te ndíhi ñayuu ñuu un ní cuvaā, te ni cacutútú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí. ³¹Te ni cacuni i cahni i de núú. Te general, tēe cújéhnú nuū ndíhi soldado, ni nihin de jnúhun jeē ndíhi ñayuu ñuu Jerusalén ni candonda i cácuvaā i. ³²Te ni jeca general tēcá soldado jíín capitán, te cájini de cuango de nde nuū cáhiin ñayuu cuehē ún. Te ná ni cajito ñayuu jeē ni jíínúcoo general jíín soldado, te ni cajecuíñi i jeē cácani i Pablo. ³³Yūcuán na te ni quívi general mēhñu ñáyuu, te ni jni de Pablo, te ni ndacu de jniñu jeē conuhni de jíín úu cadena. Yūcuán na te ni cajnúhún general ndé tēe cúu Pablo te na cuēchi ni sáha de. ³⁴Te ni cacana ñayuu cuehē ún, sava i iin jnúhun te sava ga i inga jnúhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahán Pablo nde cuartel. ³⁵Te nuū ni jíínú Pablo escalera cuartel ún, te soldado ni cajni de Pablo cándiso de siquí jeē cácani ñayuu ún jni i Pablo sáha xeēn i jíín de. ³⁶Chi ndíhi i vejicoo i ichi yátá soldado, te cácana jee i:

Cahni ni tēe jííná, achí i.

**Jeē ni cáhán Pablo jehē
maá de nuū ñáyuu**

³⁷Te cásquívi de Pablo ini cuartel nuú, te jíín jnúhun griego ni cahán Pablo jíín general:

¿A cuáha ni jnúhun cahán ná iin jnúhun jíín ní? achí de.

Te ni cahán general jíín de:

Te jíín rō cahán rō yuhu griego jeē súcuan. ³⁸Núu súcuan te nasúu róhó cúu tēe Egipto jeē jé ni cuu quívi ni ndonda siquí gobierno te ni quenehen cuūn mil tēe jéhní ndíyi cuango jíín de nde nuū ñúhun téhé, achí.

³⁹Yūcuán na te ni cahán Pablo:

Tuú, chi tēe hebreo cúu ná, te ni cacu ná ñuu Tarso, iin ñuu jeē cújéhnú ndañú Cilicia. Te quíñuhun ni ni cuáha ní jnúhun na cáhán na jíín ñáyuu yáha jíínáhan i, achí de.

⁴⁰Te general ni jēhe de jnúhun jeē cahán de. Te ni jecondichi Pablo nuū escalera, te ni sáha de seña jíín ndaha de jeē na cúu nayúú ñáyuu ún. Te nuū ní cuu nayúú-ni i, te jíín jnúhun yuhu ñúú de hebreo ni cahán de:

22 Ndíhi níhín jeē cácuu ní jnáhan ñuu yō jíín ndíhi níhín jeē cácujehnú ní núú ñúú yō, cuni sōho ní jnúhun cahán na jéhē maá ná, achí de.

²Te ni cajini sōho i jeē cahán Pablo yuhu hebreo jeē cúu yuhu ñúú i, te víhyá gā ni cacunahín i. Te ni cahán Pablo:

³Maá ná cúu jnáhan ñuu yō hebreo, te ni cacu ná ini ñuu Tarso ndañúú Cilicia. Te ini ñuu Jerusalén yáha ní jehnu ná, te ni cutúhva ná núú Gamaliel, te ni steén de nuū ná ndíhi siquí ley jeē ni jēhe ya nuū jíí yō. Te nde jíín ini jíín ánuá na ní nducú ndéyí ná squícu ná súcuan nuū Yā Dios, nájnúhun cása ha maá ní vijna. ⁴Te ni jito xeēn na

ñáyuu cácandíje i jnūhun Jesús te nde cuní na jéē na cúū ndíhi i núú. Chi cúū tēe cúū ñahan ni jnií ná ni chuhun ná vecāa. ⁵Te sutū cujéhnua ga jíín táca tēe jéhnua cándiso jniínu nuū nūū yō, cácuu de testigo jeē súcuan ni sáha ná, te suni máá de ni cajēhe de tijni carta cuahān na jíín jéē cuáha na núū táca jnāhan yō cáyūcú ñuu Damasco. Chi cuahān ná ñuu un jéē jnií ná ñáyuu cácandíje i Jesús te quindecena ná i ñuu Jerusalén yāha, návāha ndoho i núú.

Jeē ní cachi Pablo ndese ni sama ya de

(Hch. 9.1-19; 26.12-18)

⁶Te ni quihin ná ichi cuahān ná, te cuacuyajni ná ñuu Damasco, te nájñūhun caxū cúū. Te ichi ándiví ní quiji iin nduva ní ndindēē ndaxiín núū ná. ⁷Te ni cotúú-ni ná núū ñūhun, te ni jini sōho ná iin jnūhun cáhān jíín ná: Saulo, Saulo, ¿najeheé jito xeēn rō ruhū? achí. ⁸Yūcuán na te ni cahān ná: ¿Na nihín cúū jeē cahán, Tātā? achí ná. Te ni cahān yā jíín ná: Máá rí cúū Jesús jeē ní jehnu ñuu Nazaret, te jeē jito xeēn rō ñayuu cácandíje i ruhū cúū jeē jito xeēn rō ruhū, achí yá. ⁹Te tēe cuangoo jíín ná ni cajini ndije de jeē ndíndēē, te ni cayūhú de, te tu ní cájini sōho de ndese ni cahān yā jíín ná. ¹⁰Yūcuán na te ni cahān ná: Tātā, ¿na vé cuní ni jéē sáha ná? achí ná. Te ni cahān maá Jítoho yō jíín ná: Ndocuiñi te quihin rō ñuu Damasco, te yūcuan íyō iin tēe jeē cachi nuū rō na vé cúū jeē cánuú sáha ró, achí yá jíín ná. ¹¹Te jeē ní ndindēē un ní sacuaá núū ná, te

tēe cuangoo jíín ná un ní cajnií de ndaha ná cuángoo de jíín ná ní jinūcoo ná ndé ñuu Damasco.

¹²Te yūcuan ní condee iin tēe nání Ananías, te táca jnāhan yō hebreo yūcuan cácahān jeē tēe vāha cúū Ananías, chi vāha squícu de ley jeē ni jéhe ya nuū Moisés. ¹³Te ni quee tēe un núū néne ná, te ni cahān de jíín ná: Hermano Saulo, na ndúndijin tinūu ní, achí de. Te ni ndundijin-ni tinūu ná, te ni jito ná núū de. ¹⁴Te ni cahān Ananías: Máá Yáa Dios táca jíí yō, je ni nacāji ya nihín návāha cuni ní na vé cuní yā jeē sáha ní, te coto ní núū maá Cristo, Yāa ndaā, te cuni sōho ni jnūhun jeē cahán yā. ¹⁵Te nacani ní jnūhun ya nuū ndivii ñayuu táca jéē ní jito ní jíín jéē ní jini sōho ní. ¹⁶Ma cúhuun ni ní núu súcuan. Ndocuiñi ní, te cuandute ní te cahān ndahú ní jíín máá Jítoho yō, návāha nacate ya anuá ni núū cuéchi, achí de jíín ná.

Jeē ní cachi Pablo ndese ni tají Yāa Dios de nuū ñáyuu táca gá nación

¹⁷Te ni nandió cóo na ní ndee ná ñuu Jerusalén. Te jíicán tahu na ini templo, te ni sáha máá Jítoho yō jeē ní jito ndijin ná. ¹⁸Te ni jini na núū yā ni cahān yā jíín ná: Yachi quenda ró ñuu Jerusalén yāhá, chi ma cuatáhú ñáyuu yáha jéē nacani ró jnūhun ri nuū i, achí yá. ¹⁹Te ni cahān na jíín yá: Tuú, chi cuatáhú i, Tātā, chi je cájini i jeē ni quívi ná ndijnahan vehe i sinagoga ni jnií ná táca ñáyuu cácandíje i nihín, te ni cani ná i, te ni chuhun ná i vecāa. ²⁰Te je cájini i jeē quiví ní cajehni i Esteban, tēe ni nacani cáji jnūhun

ní, suni ni indichi na yúcuán, te ni jejnúhún ná jeē na cúu de, chi ni condito ná sahma tēe ni cajehni Esteban, áchí ná jíin yá. ²¹Te ni cahān yā jíin ná: Cuáhán, chí máá rí tají rí rohó quíhín jicá ró nde nuū ñáyuu tǎcá nación jeē tu cǎjini i jnūhun ri, achí yá jíin ná. Achí Pablo.

Jeē ni íne Pablo nuū general

²²Te tǎca ñáyuu ún vāha-ni ni cǎjini sōho i te nde jnūhun sandīhi yáha jēē ní tají yá de nuū ñáyuu tǎca gá nación. Yūcuán na te ni cacuvaā i, te ni cacahān jee i:

Na cúu tēe jíiná, chí tú vāha jeē cótecu gā de, áchí i.

²³Te súcuán cǎcana jee i, te ni cascándoó i ticāchí i, te ni cascánda i ticachā. Te súcuán cǎstéén i jeē cǎquítí xēēn ni i. ²⁴Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jíin cuarta ñii, návāha cujnúni ni general na siquī cúu jeē ní candonda ñáyuu un síquī de. ²⁵Te ni cajihni de Pablo návāha súcuán te caní de. Te ni cahān Pablo jíin capitán jeē índichi tūhva:

¿A jéhe ley jnūhun jeē caní ní cuarta tēe cúu sēhe nación Roma núu ná tu sándaā ní núu íyó cuéchi de? áchí de.

²⁶Te ni jini sōho capitán jnūhun yáha, te ni jecahān jíin general:

Coto vāha ní jēē ma stívi ní sáha ní jíin tēe yáha, chí cúu de sēhe nación Roma, achí.

²⁷Yūcuán na te ni jinū general nuū Pablo, te ni cǎjnūhún de:

Cachi núu jendaá cúu jeē sēhe nación Roma cúu ró, áchí.

Te ni cahān Pablo:

Suu cúu ndije ná, áchí de.

²⁸Te ni cahān general:

Ruhū chí nde jeē ni jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sǎñá chí nde quívi ní cacu ná cúu ná sēhe nación yō Roma, achí de.

²⁹Yūcuán na te tǎca tēe jeē cǎcuni caní Pablo nuú, ni cacujíyo-ni cuango, te suni nde general ni yūhú de, chí ni stívi de jeē ní jihni de Pablo, chí tu íyó vāha sáha súcuán jíin sēhe nación Roma.

Jeē ni índichi Pablo nuū junta cujéhnu ga jnáhan ñuu de hebreo

³⁰Te ínga quívi un cúní general cundaā vāha ni de na siquī cúu jeē ní candonda tēe hebreo siquī Pablo. Te ni ndají de cadena jeē nuhní Pablo, te ni ndacu de jniñu ni cacutútú tǎca sūtū cǎcujéhnu jíin tǎca tēe cásáha junta cujéhnu ga, te ni quenehen de Pablo, te ni jeni de nuū tēe ni candutútú un.

23 Yūcuán na te ni ndacoto Pablo nuū tēe ni candutútú junta un, te ni cahān de:

Tátā jíináhan ní, ní ndé vijna vāha íyó ni anuá na jēē tú na cuéchi ná, jíto jínū Yā Dios, áchí de.

²Yūcuán na te Ananías, sutū cujéhnu ga, ni cahān jíin tēe cáhiin yajni nuū de jeē na cātu maá yuhu de. ³Te ni cahān Pablo jíin sūtū cujéhnu ga ún:

Yā Dios stóho ya nihín chí tēe stáhú-ni cúu ní, chí néne ní jēē sándaā ni núu ni stívi ná ley yā, éte

naun stávi máá ní ley jeē ndácu ní jniñu jeē cáni de sãhá? áchí de.

⁴Te ni cacahān tēe cáhiin nuū de ún:

¿Naun cáhán rō súcuan jíin sútú cujéhnu ga? Chi nuū Yaā Dios jejniñu de, áchí jíin de.

⁵Te ni cahān Pablo:

Tátā jijnáhan ní, tu ní jíiní na jéē sutú cujéhnu ga cúu de, chi núu ní jíiní na te ma cahán na súcuan núu, chi yósó núu tútu ii jeē ni cáhān yā jeē ma cahán neé yó coto yó táca tēe cácujuhnu nuū yō, áchí Pablo.

⁶Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ñin jnáhan grupo fariseo, te suni súcuan ni iyo tátá na. Chi suni máá ná ñúhun ni na jéē nastécu yā ndīyi, te siquī yúcuan cúu jeē cácahān ni cuéchi siquī ná, áchí de.

⁷Te jeē súcuan ni cahān de te ni cacusiin ni tēe junta jeē cácuu grupo fariseo jíin grupo saduceo, te ni cacahān nihin. ⁸Chi cácahān tēe grupo saduceo jeē ma nátecu ndīyi, ni tu cáhiyo ndajéhé yā ni ánuá, te tēe grupo fariseo cájejnúhún de ndinúní jnúhun yáha. ⁹Te yōhyo ni cuvaā. Te sava tēe cástéén jnúhun cáhán tutu ley yā jeē cácuu jnáhan grupo fariseo, ni candocuiñ de, te ni cacahān de:

Tú ni ñin cuéchi cánihin na síquī tēe yáha. Sanaa te ni cahān ndije ñin ánuá jíin de chí ñin ndajéhé yā. Ma sáníhni ni yō nuū Yaā Dios nuu súcuan, áchí.

¹⁰Te yōhyo ni catejnéhan, te yúhú general jeē quende i chiyō Pablo,

te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

¹¹Te jecuāa un ní quee-ni máá Jítóho yō nuū de, te ni cahān yā jíin de:

Pablo, cuandeyí ni rō, chi nájnūhun ni nacani ró jnúhun ri ini ñuu Jerusalén yāhá, suni súcuan nacani nahín ró jnúhun ri ini ñuu Roma, achí yá.

Jeē ní casquíjnáhan jnúhun cahni Pablo

¹²Te nuū ní cundijin te ni cacutútú sava ñayuu hebreo, te ni casquíjnáhan jnúhun, te ni cacahān teyí i jeē ma cáji cuíti i ni ñin ni ma cóho cuíti i nde núu tu cahni i Pablo.

¹³Te víhyá gā uū xico tēe hebreo ni cacahān teyí jnúhun yáha. ¹⁴Te ni jengoo nuū sutú cácujuhnu jíin núu tēe jéhnu cándiso jniñu nuū ñáyuu hebreo, te ni cacahān jíin tēe ún:

Ni cacahān teyí ná jeē ma cáji cuíti ná ni ñin níiní nde ná tu cahni na Pablo. ¹⁵Núu súcuan te máá ní jijnáhan ní jíin táca gá tēe cásaaha junta cujéhnu ga, cuácáhān ni jíin general jeē quenehen de Pablo na jéé de nuū junta sajnē, chi cachi ni jéé cácuuni ni stíchí vāha ga ní de. Te máá ná jijnáhan ná cotūhva ná cahni ná de nde ná tu quee de nuū cáhiin tútú ní, achí.

¹⁶Te sēhe yíí cuáha Pablo ni nihin i jnúhun jeē súcuan ni cacahān, te ni jehēn i cuartel, te ni castūhún i nuū Pablo. ¹⁷Te ni cana Pablo xini ñin jnáhan capitán, te ni cahān de:

Condeca ní súchi yáha quíhin ni jíin i nuū general, chi íyó ñin jnúhun castūhún i nuū de, áchí de.

¹⁸Te capitán un ní jeca de i cuahān i jíin de nuū general, te ni cahān de:

Pablo, tēe íne vecāa, ni cana de sañá, te ni cahān de jíin ná jeē quíndeca ná súchi yáha núu ní, chí íyó ìin jnūhun cahān i jíin ní, áchí de.

¹⁹Te ni jniī general ndaha i cuahān de jíin i ìin lado, te yuhu-ni ni cajñuhún de i:

Na jnūhun cúní rō cahān rō jíin rí, áchí de.

²⁰Te ni cahān i:

Tēe hebreo ni casquíjnáhan jnūhun de jeē cahān ndahú de jíin ní quenehen ní Pablo sajnē quihīn de nuū tāca tēe cásáha junta cujéhnu ga, chí cahān-ni de jíin ní jeē cáconi de jeē stichí vāha ga de Pablo. ²¹Te ma cuáha ni jnúhun, chí víhyá gā uū xico de cándētu sāhí de ichi, te ni cacahān teyí de jeē ma cáji cuiti de ni ìin ni ma cóho cuiti de nde núu tú cahni de Pablo, te vijna je cándētu tūhva de jeē cuáha ni jnúhun quihīn Pablo nuū junta, áchí i.

²²Te ni cahān general jíin i jeē ma cáchi i nuū ní ìin ñayuu jeē ni cáhān i jnūhun yáha jíin de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

²³Yūcuán na te ni cana general uū capitán de, te ni ndacu de jniñu jeē sātūhva de uū ciento soldado cájica jéhé jíin únī xico uxi jeē cáyōsō caballo jíin úu ciento jeē cándāha lanza, chí cahīin jecuāá ún quendacoo de jíin Pablo quingoo de nde ñuu Cesarea. ²⁴Te suni

ni ndacu de jniñu jeē coo tūhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. ²⁵Te ni tee de ìin carta jeē cahán jnūhun yáha:

²⁶Máa ná cúu Claudio Lisias, te tēe ná carta yáha cuájeē nuū ní, señor Félix, gobernador cujéhnu. Ndeese tahū cúu ní. ²⁷Ñayuu hebreo ni cajniī i tēe yáha, te je yajni cahni i de núu, te ni jnama ná de jíin soldado, chí ni jini na jéé séhe nación Roma cúu de. ²⁸Te ni jendeca ná de nuū junta maá i jíjnáhan i jeē sándaā i núu na cuēchi ni sáha de. ²⁹Te ni jini na jéé siquí ley maá i cúu cuēchi cácahān i siquí de, te tu níhín na ni ìin cuēchi siquí de jeē cúu de ni jeē cóne de vecāa. ³⁰Te ni nihīn na jnúhun jeē sava tēe hebreo ni casquíjnáhan jnūhun de jeē cahni de tēe yáha, te jeē yúcuán cúu jeē yachí ni tají ná de cuajeē de nuū ní. Te suni je ni cahān na jíin ñayuu cájicān cuēchi siquí de jecoo i nuū ní, te jiñā cahān i jíin ní na cuēchi ni sáha de. Je ni cahān yō, achí carta.

³¹Te ni cajeca ñuú-ni soldado Pablo cuangoo jíin de nde ñuu Antípatris, nájnūhun ni tahū jniñu nuū de. ³²Te ìnga quivī ni canandió cóo-ni soldado cájica jéhé cuánungoo nde cuartel, te soldado cáyōsō caballo cuangoo de jíin Pablo. ³³Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de. ³⁴Te ni cahu gobernador carta un. Te ni cajñuhún de ndé ñuu cúu Pablo, te ni jini de jeē tēe

ndañū Cilicia cúu Pablo. ³⁵Te ni cahān de:

Nde na quécoco tēe cájequin cuēchi siquī rō te cuni nahín rí jñūhun cahān rō, áchí de.

Te ni cahān de jeē na quíndihyū Pablo ini palacio ndīyi Herodes.

**Jeē ni cáhān Pablo jehe
maá de nuū Félix**

24 Te nuū uhún quivī te Ananías, sutū cujéhu ga, ni quee de ñuu ún. Te suni ni quecoco sava tēe jéhu cándiso jñīñu nuū jnáhan ñuu de hebreo jíin iin tēe cúu abogado, nání de Tértulo. Te ni quívicoo de nuū gobernador jeē cahān de cuēchi siquī Pablo. ²Te ni cana gobernador Pablo ni quee de. Te ni quejé Tértulo cahán de cuēchi siquī Pablo, chi suhva ni cahān de jíin Félix:

Tátā gobernador, siquī jeē cúu ní tóhō jeē váha ndíchí ndácu ní jñīñu, te jeē yúcuán tú na jñūhun cájejnáhan íyó, chi cáyūcu váha yó. ³Te na cútahū ná, chi táca quívī váha cúu táca núu ndácu ní jñīñu jeē váha sáha ní, tátā Félix. ⁴Te tu cúni na snāá na cuéhē tiempo ni, te cáhán ndahú ná jíin ní cuni nahín ní jecu-ni jñūhun cahān na jíin ní. ⁵Chi ni cajini na tēe yáha jēe cúu de iin tēe tíxín, te sáha de jeē cánacuajnáhan máá jnáhan ñuu ná hebreo ní cáhnu-ni táca lado, te cúu de tēe cújéhu nuū ñáyuu cascuáha jñūhun tēe nání Jesús jeē ní jehnu ñuu Nazaret. ⁶Te suni je ndúcú de jeē stívi de táca jñīñu ini templo i, te ni cajni ná de. Te cácu ni na sándaá na síquī de núu, nájnūhun cáhán ley ñuu ná. ⁷Te ni

jñū-ni general Lisias, te ni quende fuerza de tēe yáha núu na jíjnáhan ná. ⁸Te ni ndacu de jñīñu jeē táca ná jeē cácahān na cuēchi siquī tēe yáha quijicoo ná ndé nuū ní. Te vijna cuu stíchí maá ní de, te jíin jñūhun cahān maá de te cuni ni jēe ni sáha de cuēchi jeē cácahān na jíin ní, áchí Tértulo.

⁹Te suni ni cacahān tēe hebreo jeē ni jíinucoo jíin de jeē iyó ndáá jeē súcuán cúu cuēchi Pablo.

¹⁰Yúcuán na te ni sáha gobernador seña nuū Pablo jeē na cáhán de, te ni cahān Pablo:

Je jíin na jēe cuéhē cuiyā cúu ní gobernador ñuu yáha, te jeē yúcuán nújnahan ni na jēe sándaá ni síquī ná. ¹¹Chi máá ní cuu nanducú ní te cuni ni jēe sáá máá úxí uū quivī ni cuu jeē ni jéhen ná ñuu Jerusalén jeē chiñúhún ná Yaā Dios. ¹²Te tu ní stáhán jnáhan ná jíin ni iin ñayuu, ni tu ní stónnda ná ñáyuu ini templo ni ini vehe i sinagoga ni ini maá ñuu. ¹³Ni tú na jíin stéen de jeē iyó ndáá jñūhun cácahān de siquī ná. ¹⁴Te jñūhun cáhán cají ná jíin ní cúu jeē chiñúhún ná Yaā Dios táca jíi na, te suu cúu jeē chiñúhún ná maá Jesucristo, te máá jñūhun yáha-ni cúu jeē cácahān de jeē stívi ná. Te cándije ná táca jñūhun yósó núu tútu ley yá jíin núu tútu jeē ní catee tēe ni canacani jñūhun ya nde jenahán. ¹⁵Te inuú ñūhun ni na jíin de jeē sáha Yaā Dios jeē nátecu táca ndíyi, cúu ñayuu ní casáha váha jíin ñáyuu ní casáha néé. ¹⁶Te jeē yúcuán máni jeē váha ndíhví ni na sáha ná. Súcuán te váha íyó ni anuá na jēe tú na cuēchi ndéé siquī na núu Yaā Dios ni nuū ñáyuu.

17 Te ni jica cuu ná táca ñuu jicá jecu cuiyā, te sáá te ni ndee na jíin xúhun jéé ní cajēhe tāca ñáyuu jeé chindéé ñáhán i jnáhan ñuu na cáyūcú Jerusalén. Te suni ni ndee na jéé socó na quití nuū Yaā Dios.

18 Te íne ná ini templo siquī jeé cuchí ná ndundoo ná núū Yaā Dios te socó ná. Te jecu jnáhan ñuu ná hebreo jeé véjicoo Asia ni cajito de sáná ini templo, te tú na ñayuu cuehē ni cóyūcu jíin ná jeé sávaā i. 19 Te núu ni stívi ná ¿te naun tu ní quíjicoo tēe Asia un návāha suni cahān de ndese ni stívi ná? 20 Chí tēe ni quecoo yāhá na cáhán maá de núu na cuēchi ni canihīn de siquī na ná ni indichi na núū junta tēe cácujuhnu ini ñuu ná. 21 ¿Te chí cájequin de cuēchi siquī na jéé ni cáhán jee ná suhva ná ni iyo ná nuū junta naún? Chi ni achi na jéé cándíje ná jéé nátecu tāca ndíyi, te jeé yúcuan cájequin ni cuēchi siquī ná, ni achi na jíin de. Achí Pablo.

22 Te Félix chi je jíin vāha de ndese cácuandíje ñayuu Cristo. Te jeé ní jini sōho de jñūhun yáha te ni stétu de un jíin náhan, te ni cahān de:

Nde na queé general Lisias te cajñūhun gá rī siquī jñíñu yáha, áchí de.

23 Te ni ndacu de jniñu nuū capitán jeé na cóne ga Pablo vecāa, te ma cási jeé sáha de jeé cuní de, te ni ma cási jeé quíjicoo jnáhan de jeé chindéé ñáhán i de.

24 Te ni cuu jecu quivī, te ni quiji tucu Félix jíin ñasihí de Drusila, te ñahan hebreá cúu ña. Te ni ndacu de jniñu jeé na quíji Pablo návāha nacani de jñūhun ndese cándíje yó Jesucristo. 25 Te ni cahān Pablo jíin

de jeé cánuú sáha yó jniñu ndaā, te cánuú coto yó máá yó jeé ma sáha yó jniñu stívi, chi quivī sándihí te sándaā Yaā Dios jniñu ndívii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeé núne ri te cana ri rohó quiji ró, áchí de.

26 Te ñūhun ni de jeé cuāha Pablo xūhun núu de te siáá de quenda de vecāa. Jeé yúcuan tñjñi jínu ni cana de Pablo ni candajnūhún de. 27 Te súcuan ni cuu uū cuiyā, te sáá te ni nucuiñi Porcio Festo nuū Félix. Te cúní Félix jeé na cúsiñi ni ñayuu hebreo jíin de, te jeé yúcuan ní squéndoo de Pablo vecāa.

Jeé ni indichi Pablo nuū Festo

25 Te sáá úní quivī jeé ni quivī Festo cuu de gobernador Judea, te ni quenda de ñuu Cesarea cuahān de ñuu Jerusalén. 2 Te tāca sūtū cácujuhnu jíin tēe cácujuhnu nuū ñáyuu hebreo ni jinūcoo nuū Festo, te ni cajicān cuēchi siquī Pablo. 3 Te ni cacahān ndahú jíin Festo jeé núu vāha ni de te na nátají de Pablo ndiji ñuu Jerusalén. Súcuan ni cacahān, chi je ni casquíjnáhan jñūhun jeé cahni Pablo ichi. 4 Te ni cahān Festo jeé yíndesi vāha Pablo nde ñuu Cesarea, te je jéni ni de jeé jecu na quivī te nuhūn maá de ñuu Cesarea. 5 Te jeé yúcuan ní cahān de jíin táca tēe ún:

Tāca níhín jeé cándiso jniñu, na quíngooyó nde Cesarea, te yúcuan cácuñi ni cuēchi siquī de te núu íyó cuēchi de, áchí de.

6 Te ni íne de yúcuan únā chí úxi-ni quivī, te ni ndee de ñuu

Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo. ⁷Te je cáhiin tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndūū nuū de, te ni caquejéé-ni cásájnúhún téyí síquī de, te tú na jíin ní cástéén jeē iyó ndāā jnūhun cácahān. ⁸Te ni cahān Pablo jehē maá de:

Tu ní sáha ná ni iin cuēchi síquī ley ñuu na jéē cácuu ná ñayuu hebreo, ni síquī templo, ni síquī rey nación Roma, achí de.

⁹Te Festo chi cúní de jeē cusīi ni ñayuu hebreo jíin de, te ni cajnūhún de Pablo:

¿A tu cúní rō quinuhun rō Jerusalén te yūcuan sándaā rī síquī rō? achí de.

¹⁰Te ni cahān Pablo:

Je índichi na núū cúndaā jniñu jeē ndácu máá tēe cúu rey nación Roma, te yāha cúu nuū cánuú cundaā jniñu ná. Máá ní je jíiní vāha ni jéē tú na cuēchi ní sáha ná síquī tāca jnáhan ñuu ná hebreo.

¹¹Chi núu ni sáha ná iin cuēchi xeēn jeē jíiní ñúhún cuu ná, te íyó vāha jeē cúu na núu súcuan. Te núu tu íyó ndāā jnūhun jeē casájnúhún tēe yáha síquī ná, te ni iin tēe ma cúu chihi de sāná ndaha tēe yáha jíjnáhan de. Núu súcuan te cúní na quíhīn na núū maá rey nación Roma sándaā de síquī na, achí de.

¹²Te ni cajnūhun Festo ndese cájeni ni tēe cándiso jniñu jíin de. Yūcuán na te ni cahān de jíin Pablo:

Je ni cahān rō jeē cuní rō quihīn rō nuū maá rey nación Roma sándaā de síquī rō. Núu súcuan te quihīn nahín ró nuū de, achí de.

Jeē ni índichi Pablo nuū rey Agripa

¹³Te ni cuu jecu quivī, te rey Agripa jíin Berenice ni jecondéhé de Festo nde ñuu Cesarea. ¹⁴Te tijni quivī ni coyūcú de yūcuán. Te ni nacani Festo jnūhun síquī Pablo nuū rey un. Te suhva ni cahān de:

Félix jeē ní cuu de gobernador, ni stóo de iin tēe íne vecāa yāhá. ¹⁵Te ná ni jehēn ná ñuu Jerusalén, te sutū cácujeñnu jíin ñayuu jéñnu cándiso jniñu nuū ñayuu hebreo ni jinūcoo i nuū na cájequin i cuēchi síquī tēe ún, te cácuni i jeē na cúu de. ¹⁶Te ni cahān na jíin i jeē tu íyó costumbre tāca tóhō Roma jeē cahni de iin tēe súcuan-ni, chi jíiní ñúhún condichi de jíin ñayuu cájequin cuēchi síquī de, návāha cahān de jehē maá de te cundaā núu íyó cuēchi de. ¹⁷Yūcuán na te ni quecoo tútú i yāhá. Te inga quivī ún tu ní cúcuéé ná, chi ni cucōo na mesa nuū sándaā na síquī cuēchi, te ni ndacu ná jniñu jeē na quíji tēe ún. ¹⁸Te cáhiin ñayuu cájequin cuēchi síquī de. Te ni jeni ni na jéē iyó cuēchi xeēn cahān de síquī tēe un núu, te tú cuiti. ¹⁹Chi jeē cácahān de cúu máni síquī jnūhun cácaandíje-ni máá de, jíin síquī iin tēe nání Jesús jeē jé ni jihí de, te Pablo cahán nihin de jeē ní natecu ndije tēe ún. ²⁰Te tu ní cújnúní cuiti ni ná ndese sándaā ná, te ni cajnūhun ná de núu cúní de quihīn de ñuu Jerusalén te yūcuán cundaā síquī de. ²¹Te máá Pablo ni cahān de jeē cuní de quihīn de nuū Augusto, rey yō nación Roma, te yūcuan sándaā rey cuēchi de, ni achí de. Te ni cahān na jéē na cóne de vecāa nde tají ná de quihīn de nuū rey un, achí Festo.

²²Yūcuán na te ni cahān Agripa jíin Festo:

Suni cúní maá ná cuni sōho ná jéē cahán tēe un, áchí de.

Te ni cahān Festo:

Sajnē te cuni sōho ní jéē cahán de núu súcuan, áchí de.

²³Te inga quivī un ní quecoo Agripa jíin Berenice. Te cáñūhun de sahma cújéhnū de, ni quīvicoo de ini vehe juzgado jíin táca general jíin tēe cácujuhū ini ñuu ún. Te ni ndacu Festo jniñu jeē na quíji Pablo.

²⁴Te ni cahān Festo:

Cáhán na jíin ní, tátā rey Agripa, jíin ndíhi níhín jéē cáyūcu jíin yó yāhá vijna. Yāha cúu tēe jeē síquī de ni candonda ndívii jnáhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú vāha jeē cótecu gā de. ²⁵Te jéni ni maá ná jéē tú na cuēchi xeēn ni sáha de jeē cúu de. Te je ni cahān de jeē cuní de quihín de nuū rey Augusto jeē sándaā rey un síquī de, te jeē yúcuán ní cahān na jéē tají ná de quihín de nuū rey un. ²⁶Te tu cúcáhnū ni ná na jnúhun tee ná núu tútu quihín jíin de nuū rey yō. Jeē yúcuán ní ndacu ná jniñu ni quee de nuū yō jíjnáhan yó, te cánuú gá nuū maá ní, tátā rey Agripa. Te stíchí ni de návāha nihín na jnúhun tee ná síquī de, te quihín jnúhun un jíin de nuū rey. ²⁷Chi tu jéjníñu cuítí jeē tají ná iin preso quihín te núu tú castūhun ná nuū tútu na cuēchi ni sáha de, áchí Festo.

Jeē ni cáhān Pablo jehē maá de nuū rey Agripa

26 Yūcuán na te ni cahān rey Agripa jíin Pablo:

Vijna te jéhe ri jnúhun cahān rō jehē maá ró, áchí de.

Te Pablo ni sáha de ndaha de jeē ní quejéé de cáhán de, te suhva ni cahān de:

²Tátā rey Agripa, cúsiī ni ná vijna jeē cúu cahān na jíin ní síquī ndíhi jeē casájnúhún ñayuu ñuu yō hebreo síquī ná. ³Chi je jíiní vāha máá ní táca jéē ní tajnúní ñayuu ñuu yō hebreo jíin táca jnúhun jeē tu cáhiin inuú i jíin. Jeē yúcuán cáhán ndahú ná jíin ní jeē coo paciencia ni cuni sōho ní jnúhun cahān na jíin ní.

Jeē ní cachi Pablo ndese ni sáha de nde ná tu sama ya ini de

⁴Je cájini táca jnáhan ñuu yō hebreo ndese ni sáha ná ini ñuu nuū ní cacu ná jíin ini ñuu Jerusalén nde ná lulí ná. ⁵Te núu cácu ni maá de cahān ndaā de, te je cájini de sāña jéē ndé lulí ná ni quivī ná nuū grupo fariseo, te grupo un nihín ga cánducú ndéyí de síquī de ley yā vēsú táca gá grupo tēe nación yō. ⁶Te ñúhun ni na jnúhun ni jejnúhun Yaā Dios nuū táca jíí yō jeē nastécu yā ndíyí, te máá síquī táca jnúhun yáha-ni cúu jeē cájequin de cuēchi síquī ná. ⁷Chi máá yó jeē cácuu yó jnáhan ndihúxí uū yucūn ñayuu Israel, cáñūhun ni yō jnúhun ni jejnúhun ya jeē nastécu yā ndíyí, te jeē yúcuán nduú ñuu cáchiñúhún yó Yaā Dios te cájejníñu yó núu yā. Te suni súcuan ñúhun ni maá ná, tátā rey Agripa, te síquī jeē nácani ná jnúhun jeē natecu ndíyí cúu jeē cájicān jnáhan ñuu yō hebreo cuēchi síquī ná. ⁸¿Te chí má nastécu Yaā Dios táca ndíyí cájeni ni ní naún?

**Jeē ní cachi Pablo ndese ni jito
xeēn de ñayuu cácanđíje**

⁹Te máá ná chi ni jeni ni na jéē jíní ñúhún ndonda ná síquī ñayuu cácanđíje i Jesús, Yaā ní jehnu ñuu Nazaret. ¹⁰Te súcuan ni sáha ná ini ñuu Jerusalén, chi tāca sūtū cácujuhnu ni cajēhe de jñuhun jeē cóndiso jñíñu ná chuhun ná cuéhē ñayuu vecāa síquī jeē cácanđíje i Jesús, te íyó váha ni na núu cájehni de i. ¹¹Te tijní jínu ni sáha ndevāha na jíní i ini tācá vehe ii sinagoga jeē ni sáha fuerza na i jeē na stóo i jñuhun cácanđíje i. Te xeēn ni quítī ni na núu i, chi nde ñuu jicá ní jehēn ná ni sáha xeēn na jíní i.

**Jeē ní cachi tucu Pablo ndese ni
sama ya ini de**

(Hch. 9.1-19; 22.6-16)

¹²Te sutū cácujuhnu ni cajēhe de jñuhun jeē cóndiso jñíñu ná quíhīn na sáha xeēn na jíní ñáyuu cácanđíje cáyūcú ñuu Damasco nuú. ¹³Te cuahān ná ichi ún, tátā rey, te caxū cúu, te ichi ándiví ní quiji iin nduva ni ndindēē ndaxín núu na jíní núu téē cuango jíní ná, te víhyá gā ndíí vēsú niāndii. ¹⁴Te ndíhi ná ní cacotúú ná nuú ñúhun. Te ni jini sōho ná iin jñuhun ni cahān jíní ná jíní jñuhun yuhu yó hebreo: Saulo, Saulo, ¿najehē jító xeēn rō ruhū? Chi jeē sáha ró súcuan cúu nájnūhun stiquī jeē tu jéndije tī, te jéñú yatá tí xini pulla, te súcuan stóho tī máá tí, áchí. ¹⁵Yūcuán na te ni cahān ná: ¿Na nihín cúu jeē cahán, Tátā? achí ná. Te máá Jítoho na ní cahān yā jíní ná: Máá rí cúu Jesús, te jeē jító

xeēn rō ñayuu cácanđíje i ruhū cúu jeē jító xeēn rō ruhū. ¹⁶Ndonda condichi rō, chi vēji ri nuū rō jeē tejníñu ri rohó sáha ró jniñu cúní rī, te nacani cájí ró jñuhun tāca jéē ní jito ró vijna, jíní jéē steén gā rī nuū rō tāca quívī quíji. ¹⁷Te jnama ri rohó núu tāca jnáhan ñuu rō jíní núu ñáyuu tāca gá nación, chi nuū ñáyuu un tájí rí rohó quíhīn rō. ¹⁸Te tájí rí rohó quíhīn rō nuū i, chi nájnūhun nanune ró tñúú i cúu jeē steén rō jñuhun ri nuū i te jecūhun ni i. Chi ñayuu ná tu candíje i ruhū, nájnūhun cájica i nuū néē. Te jeē candíje i ruhū, quívi i nuū luz rī, te tuá quíhi i chíji jniñu jeē cuní jexeēn jeē cúu Satanás, chi sa suhva quíhi i chíji jniñu cúní máá rí. Te tájí rí rohó quíhīn rō nuū i, návāha candíje i ruhū te cone cáhnu ni rī nuū cuéchi i. Yūcuán na te iñuú níhīn tahú i jíní táca gá ñayuu jeē ni sándoo ri anuá i, áchí yá jíní ná.

**Jeē ní cachi Pablo ndese ni
jetáhú de jñuhun ni cahān yā**

¹⁹Jeē yūcuan tu ní sánihni ni na núu jñuhun ni cahān yā ichi ándiví jíní ná, tátā rey Agripa. ²⁰Chi ni jetáhú ná, te ni nacani ná jñuhun ya xihna gā nuū ñáyuu ñuu Damasco, te sáá te ni nacani ná jñuhun ya nuū ñáyuu ñuu Jerusalén jíní ní región Judea jíní núu ñáyuu tāca gá nación. Te jñuhun ni nacani ná núu i cúu jeē na nácani ni i jeē stóo i cuéchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. ²¹Te síquī jeē súcuan ni nacani ná jñuhun te ni cajnií jnáhan ñuu yó hebreo sañá ini templo, te ni cacuni i cahni i

sāna núu. ²²Te ni chindéé ñáhán Yáa Dios sāná, te jeē yúcuan índichi nihin na ndé vijna nácani cájí ná jnūhun ya nuū ñáyuu cácujuhnu jíin núu tācá-ni ñayuu. Chi tu chíso gá na jnúhun siquī jnúhun jeē ní nacani Moisés jíin táca gá tēe ni canacani jnūhun Yaā Dios nde jenahán. ²³Te ni cundaā jnūhun ni canacani de un jēē cánuu ndoho Cristo nde cuu yā, te xihna gā maá yá natecu vēsú tāca gá ndīyi, te súcuan stéén cají yá nuū ñáyuu jeē jnáma ya i, cúu ñayuu nación yō Israel jíin ñáyuu tāca gá nación, áchí Pablo.

Jeē ní nducú ndéyí Pablo scandíje de Agripa jnūhun Jesús

²⁴Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuan ní tívi xíní rō, áchí de.

²⁵Te ni cahān Pablo:

Tu ní tívi xíní na, tátā Festo, chi sa suhva íyó cájí ndāā jnūhun cáhán na. ²⁶Te maá rey Agripa je jíiní vāha de tācá jniñu ní íyo jeē ní nacani ná, te tu yúhú ná cahān na táca jnúhun yáha, chi je jíiní vāha na jēē jíiní de tāca jnúhun yáha, chi tú sāhi ní cúu tācá jniñu yáha. ²⁷Tátā rey Agripa, á cándíje ní jnúhun jeē ní cacahān tēe ni canacani jnūhun ya nde jenahán? Jéni ni na jēē candíje ní, áchí Pablo.

²⁸Yūcuán na te ni cahān Agripa jíin Pablo:

Va jéni ni rō jeē jíin jecu jnūhun ni cahān rō te sāha ró jeē candíje ri Cristo, achí de.

²⁹Te ni cahān Pablo:

Vēsú jíin jecu-ni jnūhun chí jíin cuéhē, te jícán tahú na jēē maá ní jíin táca gá tēe cájini sōho jnūhun cáhán na vijna, na cándíje ní nájñūhun cándíje máá ná, te tu cúni na jēē cónuhni ni nájñūhun núhni na.

³⁰Te ni ndīhi ni cahān Pablo tāca jnúhun yáha. Te ni ndocuiñī rey jíin gobernador jíin Berenice jíin táca gá tēe cácujuhnu cáyūcu jíin de. ³¹Te ni cacujiyo de, te ni candajñūhun síin máá de:

Tú ni ñin cuēchi ní sāha tēe yáha jēē cúu de ni jeē cóne ga de vecāa.

³²Te ni cahān Agripa jíin Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma nuú, áchí de.

Jeē ní catají de Pablo cuahān de ñuu Roma

27 Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhiin vecāa ni quivicoo de ndaha ñin capitán naní Julio jeē quíndēca de tēe un ndé Italia. Te Julio cúu ñin jnáhan grupo soldado naní Augusto. ²Te nde ñuu Adramitio nuū cájecuiñī barco ni quenda ñin barco ni quee, te ni quivicoo ná, te quihín barco un táca ñuu jeē yíhi chíji Asia jeē yúcu yumar. Te suni cuahān Aristarco jíin ná, te maá de cúu tēe ñuu Tesalónica región Macedonia. ³Te ñga quivī ni jinūcoo ná ñuu Sidón nuū cájecuiñī barco. Te Julio ni cundáhú ni de Pablo, te ni jēhe de jnūhun ni jecondēhe Pablo tācá amigo de, te ni cachindéé ñáhán

i de. ⁴Te ñuu yúcuán ní quenda barco cuahān jíin ná. Te siquī jeē níhin yíhi tachī te tu ní cúu quihīn yohó barco, te ni tee xīn barco cuahān jíin ná xiin isla Chipre, ñuhun jeē íne sīn nuū ndúte, te lado jecó barco ni quendōo Chipre. ⁵Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañúu Licia.

⁶Te ñuu yúcuán ní nihīn capitán iin barco jeē véji ñuu Alejandría te quihīn ichi Italia, te ni cahān de jíin ná ni quivīcoo ná barco un. ⁷Te cuehē quivī ni cahīn na núu ndúte jíin barco, chi cuéé ní jica, te fuerza-ni ni jinūcoo ná yuñúu Gnido. Te tuá ni jéhe tachī un jnúhun quihīn yohó barco, te ni cayāha ná núu jnúhma tachī xiin ñúu Salmón jeē íne nuū isla Creta. ⁸Te yōhyo ni canducú ndéyí tée cascáca barco un, ní yāha jíin ná ñí yumar xiin Creta. Te ni jinūcoo ná iin lugar naní Buenos Puertos nuū cájecuñī barco, te yajni un íne ñuu Lasea.

⁹Te je ni cuu cuehē quivī ni cajica ná jíin barco. Te je yajni quejéé vico mójin, te yúcuán cúu tiempo jeē yí jica barco te sanaa te coo jnūndóho nuū mar. Te ni cahān nihin Pablo jíin de:

¹⁰Tātā jijnáhan ní, jíin na jéé yóhyo yí coo viaje yáha, te quiji jnūndóho siquī barco, te naa barco jíin ndajniñu, te nde maá yó sanaa te cuu yō, achí de.

¹¹Te tu ní chúsóhó capitán jeē cahán Pablo, chi sa suhva jeē cahán tēe scáca barco un jíin tēe chíi barco. ¹²Te siquī jeē tu íyó váha lugar nuū ni jécuiñī barco

un jéé cóyucú de ní vico mójin, te ni cajeni ni cuehē gā de jeē váha ga núu quendacoo de yúcuán. Chi cájeni ni de jeē núu cuu te jinūcoo de ñuu Fenice te yúcuán coyucú de vico mójin. Chi Fenice suni íne yundúte isla Creta nuū cájecuñī barco, te ndijin ichi noroeste jíin suroeste.

Jeē ni jécuiñī iin tachī níhin jeē stónnda ndute mar

¹³Te ni jequñī vīta táchi ichi sur, te ni cajeni ni de jeē jinú de Fenice nuú, te ni cascáca ga de barco jica jíin de xiin Creta. ¹⁴Te ni cunúu jecu gā, te ni quejéé-ni iin tachī níhin ndasí jeē naní táchi nordeste. ¹⁵Te tuá ni cúu ga quihīn yohó barco, chi ni chundahá-ni tachī cuahān jíin, te ni casiáá-ni de jeē cascáca de, te cháha chúcuan cuahān barco jíin ndíhi ná sáha tachī. ¹⁶Te ni yāha jíin ná xiin isla lulí jéé naní Clauda, nuū jnúhma tachī. Te vēsú súcuan te yōhyo uhū ni cascáca ná barco lulí jeē ndiquín yatā barco cáhnu. ¹⁷Te ni casquívī ná ini barco cáhnu. Te ni casucun núu de barco cáhnu jíin yoho. Te cáyuhú de jeē quihín barco nuū yaxín ndute nuū naní Sirte te jñī nuū ñíti, te jeē yúcuán ní casnúu de sahma cóquin jeē stechí te jica barco. Te ni casiáá de jeē na quihín ndé chi chundahá táchi. ¹⁸Te tu jécuiñī cuiti jeē yíhi tachī níhin. Te inga quivī un ní caquejéé de cájete de ndajniñu ndíso barco, návāha nduñama gā barco te ma queé chíi ndute. ¹⁹Te quivī uní ni cajēhe núu ná ndaha ni cajete ná máá ndajniñu jéjníñu barco. ²⁰Te cuehē quivī tu

ní cájito ná nándii ni quĩmi siquĩ jeē ín vicō, ni tu jécuiñĩ cuiti tachĩ níhin ún, te tuá cáñũhun ni na cácu ná.

²¹Te ni cuu quivĩ jeē tuá cáyeji cuiti na stáa. Te ni jecondichi Pablo sava mēhũu tée ún, te ni cahān de:

Tátā jijnáhan ní, núu ní cájetahú ní jnũhun jeē ni cahān ná te ma quéndacoo yó Creta nuú, te ni ma cóto yó jnúndóho yáha ni ma náa ndajniñu núu. ²²Te vijna cáhān níhin na jíin ní jeē cuandeyĩ ni ni jijnáhan ní, chi ni iin ní má cúu ní, vēsú naa barco. ²³Chi jeē cúni ni quiji iin ndajéhé jeē ní tají máá Yáa Dios nuú ná. Chi máá yá cúu Jitoho ná, te jéjniñu ná núu yā.

²⁴Te ndajéhé yā ún suhva ni cahān yā jíin ná: Pablo, ma yũhu ró, chi vāha-ni jinũ rō nuú rey nación Roma, te jeē siquĩ rohó te sáha Yáa Dios jeē cácu ndihi tēe cáhiin jíin ró ini barco yāhá, áchí yá jíin ná.

²⁵Tátā jijnáhan ní, ma yũhu ní núu súcuan, chi máá ná cúcáhnu ni na Yáa Dios jeē coo nájnũhun ni cahān ndajéhé yā jíin ná. ²⁶Te jinũ nahín yó iin isla, te ma jinũ yachĩ yō nuú quíngoo yó, áchí de.

²⁷Te ni cuu uxĩ cuũn jecuáa nde jeē ní quejéé táchi, te jica barco nuú mar Adria, te cháha chúcuan cuahān barco sáha tachĩ. Te máá jecuáa ún te jeē ní cuu sava ñuú te cájeni ni tēe cáscáca barco jeē jé cuacuyajni jinũ barco ñuhun íchi. ²⁸Te ni casínga de iin jeē cáchicuāhá de nasaa cúnu ndute, te ni cajini de jeē iyó ócō xahũn iin metro. Te ni jica barco jecu gā te ni casínga tucu de, te ni cajini de jeē iyó ócō uxā na metro. ²⁹Te

cáyũhú de jeē jécujnáhan barco jíin toto, te ni cajihni de cuũn cāa gancho náhnu yatā barco un, te ni cascāne de nde jehē ndute návāha chituu te jecuiñĩ barco. Te yōhyo jnāa de jeē na cúndijin yachĩ. ³⁰Te tēe cáscáca barco un ní canducú de cunu de quíngoo de jíin barco lulí te cácu de nuú jnúndóho quiji siquĩ barco cáhnu núu. Jeē yúcuan ní casnúu de barco lulí un núu ndute, te casáha-ni de nájnũhun jeē snúu de inga cāa gancho ichi núu barco návāha tú cuni ñayuu jeē cécuni de cunu de quíngoo de. ³¹Te ni cahān Pablo jíin capitán jíin táca soldado:

Núu tú coyũcu tée yáha ini barco cáhnu jíin yó, te ma cácu cuiti maá ní jijnáhan ní, áchí de.

³²Yũcuán na te soldado ni cajehnde de yoho núhni barco lulí, te ni jneni-ni cuahān.

³³Te nuú cuácundijin te ni cahān Pablo jíin táca tēe un jéē na caji de staā. Te suhva ni cahān de:

Vijna iyó úxĩ cuũn quivĩ jeē cándito ní te tu cáyeji cuiti ni stáa.

³⁴Te cáhān ndahú ná jíin ní jeē na caji ni stáa, návāha nanihín ni ní te cácu ní, chi ni iin yó má cúu, ni ma tují cuiti yō, achí de.

³⁵Te ni ndihi ni cahān de jnũhun yáha, te ni quihin de iin staā, te mēhũu táca ñayuu un ní nacuatáhú de nuú Yáa Dios, te ni tahú sáva de staā ún, te ni quejéé de yéji de.

³⁶Yũcuán na te ni candusiĩ ni ndihi de, te suni ni cayejí de staā. ³⁷Te ndivii na jéē cáñũhun ná ini barco cúu uũ ciento unĩ xico xahũn iin ná. ³⁸Te ni cayejí vāha ndihi ná. Yũcuán na te ni cajete de trigo cuahān nuú ndute un, návāha na ndũñama gā barco.

Jeē ni quée barco chiji ndute

³⁹Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuiñi ndute, te suni máá ñíti cúu, te cájeni ni de jinū de yūcuan jíin barco núu na cúu núu. ⁴⁰Te ni cajehnde de yoho núhni cāa gancho yūcuan, te ni caquendōo cāa un núu mar. Te ni canandají de yujnu jeē scotú chíi barco, te ni nacata caa de sahma cóquin ichi núu návaha chundahá táchi barco, te ni quejéé caca quihīn jíin de ichi núu iyó ñíti. ⁴¹Te ni jinū barco nuū níhin náquijnáhan ndute. Te ni quée barco nuū ñíti ñuhun chiji ndute, te ni jñi-ni ichi núu te tuá ni jíca cuiti, te yatā barco un ní cahya-ni jeē níhin ni cani suhmā ndute mar. ⁴²Yūcuán na te ni candajñuhún soldado jeē cáhni de tāca preso návaha ma sūte i te cunu i quingoo i. ⁴³Te cúní capitán un jéē cācu Pablo, te ni jesicoo de. Chi sa ni cahān de núu ndé ñáyuu jiní sūté te xihna gā i na nungoo i sūté i nuū ndúte, te na quenda-ni i quihīn i nuū ñuhun íchi. ⁴⁴Te suni súcuan na quécōo ndīhi i quihīn i, sava i coso candá i jíin yujnu cúnu te sava ga i jíin pedazo yujnu barco. Te súcuan ni cacācu ndīhi ná ní jinūcōo ná ñuhun íchi.

Jeē ni íne Pablo isla Malta

28 Te nuū ní cacācu ná te ñáyuu cáyūcu yūcuan ní cacachi i nuū na jéē isla un nání Malta. ²Te ñáyuu un ní cacundáhú ni i sāna jíináhan ná, te ni cascáyú i ñin ñuhūn cáhnu, te ni cacahān i

jíin ná jeē nasaā ná, chi mijin sáha jeē cúun saū. ³Te ni stutú Pablo jecu tujnu íchi. Te jeē jnāā de tujnu un núu ñuhūn te ñin coō xeén jínu tí ni quenda tí tujnu un jéē ní cujihní, te ni chiyuhú-ni tí ndaha de. ⁴Te ñáyuu cáyūcu yūcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyi núu súcuan, te vēsú je ni cācu de nuū mar, te máá yāá sándaā jniñu ñáyuu tu jéhe ga yā jñuhun jeē cótecu de, áchí i.

⁵Te ni caja Pablo ndaha de, te ni ñinga coō un núu ñuhūn, te tú na vé ni ndóho de. ⁶Te cándētu tāca ñáyuu jeē chúhun i cuiñi de chí cotúú-ni de te cuu de. Te ni cunahán téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñin yaā cúu Pablo.

⁷Te yajni yūcuan íyó ñuhun tēe cújéhnu ga Malta un, nání de Publio. Te ni cana tēe un sāña jíináhan ná, te ni jéhe núu de vehe de ni coyūcu ná jíin de uní quivī, te ni jito yúcún de sāñá. ⁸Te tátá Publio cāa de, chi ndóho de cuehyī quiji jíin cuehyī niñi. Te ni jecondēhe Pablo tēe ún, te ni jicān tahú de te ni soó de ndaha de siquī tēe ún, te ni nduvāha-ni de. ⁹Yūcuán na te ni quijicoo ndīhi ga ñáyuu cácuñu yūcuán, te suni súcuan ni canduvāha-ni i. ¹⁰Te ñáyuu un ní cajēhe i cuehē ndajniñu ni cacutahū ná. Te nuū ni jíin quivī jeē quingoo tucu ná jíin barco, te ni cajēhe i tācá ndajniñu cuu ná ichi.

Jeē ni jíin Pablo ñuu Roma

¹¹Te uní yoō ni coyūcu ná Malta. Te ñin barco jeē vējí ñuu Alejandría

ni ine Malta ní vico m̄jín, te ichi núú barco un ndéé uū figura ídolo ñuu de nání Cástor jíín Pólux. Te ni quívicoo ná barco un cuángoo ná. ¹²Te ni jinūcoo ná ñuu Siracusa, te yūcuan ní coyūcu ná unī quivī. ¹³Te ni quenda barco cuahān jíín ná nduu nduu yundúte, te ni jinūcoo ná ñuu Regio. Te inga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli. ¹⁴Te yūcuan ní caquijnáhan ná jíín jecu hermano cácanđíje, te ni cacana de sãña ní coyūcu ná jíín de ñin semana. Yūcuán na te ni quendacoo ná jéé quihīn ná ñuu Roma. ¹⁵Te hermano cáyūcú ini ñuu Roma, je ni canihīn de jnūhun jeē jinūcoo ná, te ni quendacoo de, te sava de ni caquijnahan de sãña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jíjnáhan de, te ni nacuatáhú de nuū Yaā Dios, te ni ndundeyí ni de. ¹⁶Te sáa te ni jinūcoo ná ini ñuu Roma, te capitán ni squívi de tāca preso ndaha tēe cújéhnū nuū tācá soldado ñuu Roma. Te ni cajēhe de jnūhun jeē cone s̄ín Pablo te condito ñin soldado de.

Jeē ní nacani Pablo jnūhun ya ini ñuu Roma

¹⁷Te nuū unī quivī te ni cana Pablo tāca tēe cácujehnū nuū jnáhan ñuu de hebreo cáyūcú ini ñuu Roma. Te ni cacutútú de, te ni cahān Pablo jíín de:

Tátā jíjnáhan ní, tú cuiti na vé ni sáha ná síquī jnáhan yó hebreo ni síquī tācá jniñu ní catajnúní jíí yō. Te vēsú súcuan te ni cajniī i

sãña ndé ñuu Jerusalén ni casquívī i sãñá ndaha tēe ñuu Roma jíjnáhan de. ¹⁸Te tēe ñuu Roma jeē cácujehnū cáyūcú Cesarea ni castíchí de sãñá, te cácuñi de siáá de sãña núú, chi ni cajini de jeē tú na cuēchi ná jéé cúú ná. ¹⁹Te jnáhan ñuu yō hebreo tu ní cájēhe de jnūhun. Jeē yūcuan ní cahān na jéé quiji ná núú maá rey cujehnū ga nde ñuu Roma yāhá te sãndaā maá de síquī ná. Te tú vēji ná jéé cáquin na cuēchi síquī ñayuu nacióñ yō. ²⁰Jeē yūcuan ní cana ná níhín jíjnáhan ní, návāha cuni na táca ní te ndajnūhun yó. Chi yóhó ñayuu Israel cáñūhun ni yō jeē nátecu ndīyí, te suu jnūhun un nácani ná, te jeē yūcuan cúu jeē nuhní na jíín cadena yáha, áchí de.

²¹Te ni cacahān tēe un jíín Pablo:

Tú ni ñin carta ni cátají ñayuu cáyūcú Judea nuū na jéé cástūhún de jnūhun ní, te tāca jnáhan yó Judea jeē ní quijicoo yāhá, tú ni ñin jnūhun néé ní cacahān de síquī ní. ²²Te cánujnahan ni ná cuni sōho ná ndese cúu jnūhun jeē cahán ni, chi je cajini na jéé tācá-ni lado cacahān ñayuu contra síquī jnúhun jeé jéé steén ni, áchí de.

²³Te ni cajeni de ñin quivī, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenéhen te nde ní ini. Te súcuan ni nducú ndéyí de scándíje de tāca tēe un jnúhun Jesús, te ni steén de jeē suni súcuan cáhán ley jeē ni jéhe ya nuū Moisés jíín jnúhun jeē ní catee tēe ni canacani jnūhun Yaā Dios nde jenahán. ²⁴Te ni cacandíje sava de

jnūhun ni cahān Pablo, te sava ga de tu ní cájetáhú de. ²⁵Chi tú inuú cáhiyo ni de. Te sáá cánducú de quingoo de te ni cahān Pablo:

Ndaā cahán jnūhun jeē ni cáhān Isaías, tēe ni nacani jnūhun Yaā Dios nde jenahán, chi suhva ni cahān de jín táca jí yō ni sáha Espiritu Santo:

²⁶Ni cahān Yaā Dios:

Cuáhán núu jnáhan ñuu rō yāhá te cahān rō jín i:

Vēsú cuni nahín váha ró te ma jécūhun ni rō,
te vēsú coto vāha ró te ma cúni rō.

²⁷Chi yōhyo nīhni ni rō,
chi tu cáconi rō cuatáhú ró.
Te yōhyo uhū cájini sōho ró,
chi tu cánujnahan ni rō cuni sōho ró jnúhun ri.
Te nájñūhun cájesi rō tinūu ró cúu jeē tu cáconi rō nanducú ró ndese cúu,

te tu cáconi rō jeē násāma ini rō návāha nasávāha ri anuá rō nuū cuéchi ró, ní achi Yaā Dios.

Achí tutu. ²⁸Núu súcuan te na cástūhun ná nuū ni jéē jnúhun ni tají Yāā Dios jeē jnáma ya yohó, nde vijna te tájí yá jnūhun yáha quíhīn nuū ñáyuu táca nación jeē tu cájini i jnūhun ya, te máá i chi cuni sōho i, áchí de.

²⁹Te ni jīnu ni cahān de jnūhun yáha, te cuangoo jnáhan de hebreo, te yōhyo ni cacahān de siquī jnúhun yáha jíjnáhan de.

³⁰Te ni condee Pablo uū cuiyā vehe jeē ní quihīn núu de ún. Te ni cusīi ni de cahān de jín táca ñáyuu ní quiijicoo nuū de. ³¹Te jéhnū-ni ni nacani de jnūhun ndese ndácu Yaā Dios jniñu, te ni steén de jnūhun máá Jítóho yō Jesucristo, te tú ni ñin ní jési jeē nácani de jnūhun.